

लूकासे भिबा थार्बा पिन्बा समाचार

चु किताबला बारेरी पाङ्तो:मा

भिबा म्हि: येशूला मुल चेला पावलला ह्यो लूकासे भिबा मुबा (२ तिमोथी ४:११)। थे अर्गु यहलला म्हि हिन्ना ओच्छे थे डाक्टर मुबा (कलस्सी ४:१४)। थेसे मुल चेलागदेला गेला बारेरीनोन भिबा मुला (मुल चेला १:१-२)।

भिबा ग्ला: रोम शहररी भिबा मुबा।

भिबा साल: ओस्पन ईश्वी संवत् ६०-७० (विक्रम संवत् ११७-१२७) सालला गुडरी भिबा मुबा।

खाल्दा भिबा: येशूला बारेरी तबा तामगदे घोना लबाला लागिरी थियोफिलस भिबा म्हिदा भिबा हिन्ना।

चु थार्बा पिन्बा समाचाररी येशूला बारेरी चुहङ् लसी भिबा मुला, इस्राएलीगदेला गुडरी फेप्खला भिसी कबुल लबा थार्बा पिन्बा ग्लेदेन जम्मान यहलला म्हिगदेदा सोना लबा येशू ख्रीष्ट हिन्ना। थे दुख याङ्बा म्हिगदेदेन प्राङबो म्हिगदे ओच्छे जम्मान म्हिगदेदा थार्बा पिन्बा समाचार थे:ना लगै भिसी परमेश्वरला आत्माग्याम जम्बुलिङरी पुङ्खबा हिन्ना। चु थार्बा पिन्बा समाचाररी जम्मान खाल्ला दुखरी परब तबा म्हिगदेदा वास्ता लसी भिबा हिन्ना। चुरी ताङ्तो:बा तामगदे प्रस्टन प्राङ्मुला। पाङ्नोन तो:मा चुरी डाच्छाला अध्यायगदेरी येशू जम्बुलिङरी फेप्खबा ताम ओच्छे लिच्छापट्टिला अध्यायगदेरी चा येशू स्वर्गरी फेप्बा तामला बारेरी भिबा मुला।

येशू स्वर्गरी फेप्माहेन्से येशूदा विश्वास लबागदे ल्हानान बढब तबान निजी ओच्छे येशूला बारेरी ल्हानान ग्लारी थे:बान निबा तामगदे लूकासे “मुल चेलागदेला गे” भिबा किताबरी भिबा मुला।

मुल तामगदे

- शुरुला ताम १:१-४
- बप्तिस्मा पिन्बा यूहन्नादेन येशू न्हबा ओच्छे येशू जजा मुबा धुइला
ताम १:५-२:५२
- बप्तिस्मा पिन्बा यूहन्नासे लबा गे ३:१-२०
- येशूसे बप्तिस्मा किन्बादेन शैतानसे येशूदा फसब लबारी
म्हाइबा ३:२१-४:१३
- येशूसे गालील अञ्चलरी लबा गे ४:१४-६:५०
- येशू गालील अञ्चलहेन्से यरूशलेम शहरधोना फेब्बा ६:५१-१६:२७
- यरूशलेम शहररी येशूला गे थुम्बा धुइ १६:२८-२३:५६
- येशू सिबाग्याम सोबादेन स्वर्गरी फेब्बा २४:१-५३

लूकासे भिबा थाबा पिन्बा समाचार


लूकासे येशूला बारेरी भिबा

१ परमेश्वरसे डन्ना गुडरी लबा गेला बारेरी ल्हानान म्हिगदेसे भिबारी छ्याइबा मुला।^२ डाच्छाहेन्सेन येशूसे लबा गेदेन लोप्बा ताम म्राड्बा म्हिगदेसे डन्दा थेःना लजी।^३ थेतबासेलमा माननीय थियोफिलस, डाइएनोन डाच्छाहेन्सेन जम्मान ताम म्हाइसी घोबासे लमा हाडला लागिरी मेलोसेन भिमा ज्यबा तला भिसी म्हन्जी।^४ तिग्दा भिसम हाडदा पाड्बा तामगदेरी सत्य ताम घोगै भिसी डाइ चु हाडला लागिरी भिबा हिन्ना।

बप्तिस्मा पिन्बा यूहन्ना न्हला भिसी पाड्बा ताम

५ यहूदिया यहुल्साला हेरोद ग्लेला धुइरी अबिया भिबा समूहरी परमेश्वरला मन्दिररी पूजा लबा जकरिया भिबा म्हि मुबा। थेला म्रिड एलीशिबाएनोन परमेश्वरला मन्दिररी पूजा लबा हारूनना वंशरी न्हबा

मुबा।^{*} ६ परमेश्वरसे कुल्बा जम्मान ताम ड्यान्बासे लमा थे न्हीनोन परमेश्वरला डाच्छा ज्यबा म्हि मुबा।^७ तर एलीशिबाग्याम कोला आतबासे लमा थे न्हीला कोलागदे आरेबा मुबा। थे न्हीला दिडएनोन निसी जिन्बा मुबा।^८ तिरेकुनु जकरिया हाडला समूहला पालोरी परमेश्वरला मन्दिररी पूजा लबान मुबा। ६ परमेश्वरला मन्दिररी पूजा लबा समूहला ठिम अन्छार चिट्टा युमा, परमप्रभुला मन्दिर न्हडरी वाड्सी धूप म्राबा गे जकरियाला मिनरी थोन्जी।^{१०} परमेश्वरला मन्दिर न्हडरी धूप म्राबा धुइरी म्हिला हुल मडग्यार प्रार्थना लसी चिबा मुबा।^{११} धूप म्राबान लबा धुइरी जकरियासे धूप म्राबा ग्लाला दाहिनेपट्टि स्वर्गदूत खसी राप्सी चिबा म्राड्जी।^{१२} स्वर्गदूतदा म्राड्सी जकरिया आतेब तसी लोड्जी।^{१३} तर स्वर्गदूतसे थेदा “थालोड्गो जकरिया, तिग्दा भिसम परमेश्वरसे एला प्रार्थना सान्बा मुला। दाहेन्से एला म्रिड एलीशिबासे भा गिक न्हला। एसे थेला मिन यूहन्ना



धूप म्नाबा ग्ला (१:११)

थान्गो। १४थे न्हबा धुइरी ए ल्हानान ताङ्ला, ओच्छे स्थान्दो ल्हानान म्हिगदेएनोन ताङ्ला। १५तिग्दा भिसम थे परमप्रभुला डाच्छापट्टि घेन म्हि दोला। ओच्छे थेसे अङ्गुरलानिङ्गुदेन खजिबै अर्गु ड्य्होइबा स्हे आथुङ्। थे आमाला फोरी खमाहेन्सेन परमेश्वरला आत्मा थेदेन छ्याम तला। * १६थेसे ल्हानान इस्राएलीगदेदा परमप्रभु परमेश्वरला ग्यामरी दोःसी भला। १७आबागदेला सेम कोलागदेपट्टि तना लबारी ओच्छे परमेश्वरसे कुल्बा ताम

आङ्ग्यान्बागदेदा परमेश्वरसे कुल्बा ताम ड्यान्बा म्हिगदे हङ्बा स्होसी प्रभुला ग्याम च्यासी चिबा य्हुल स्होबाला लागिरी थे प्रभुला डाच्छा एलियाला आत्मादेन शक्तिरी भला। *

१८जमाहेन्से जकरियासे स्वर्गदूतदा “डाइ चु ताम खाहङ् लसी विश्वास लसे? तिग्दा भिसम डा खेप्बा दोसी जिन्जी ओच्छे डाला मिडलाएनोन दिङ निसी जिन्बा मुला” भिसी भिमा, १९स्वर्गदूतसे जकरियादा “डा परमेश्वरला डाच्छा राप्सी चिबा गब्रिएल हिन्ना। डादा परमेश्वरसे एदेन छ्याम ताम लबारी ओच्छे चु ज्यबा समाचार पाङ्बारी पुइखबा हिन्ना। * २०एसे डाइ पाङ्बा ताम विश्वास आलबासे लमा चु ताम पूरा आततेधोना एसे ताम पाङ्आखम। तर चु ताम ततोःबा धुइरी तनोन तला” भिसी भिजी।

२१जकरिया परमेश्वरला मन्दिर न्हङरी घइना चिबासे लमा मङ्ग्यार जकरियादा भ्रान्सी चिबा म्हिगदेदा सुर्दा तजी। २२थे परमेश्वरला मन्दिर न्हङ्ग्याम मङ्ग्यार थोन्सी खमा थेसे तिगै ताम पाङ्आखम्नी। थेतबासेलमा मङ्ग्यार मुबा म्हिगदेसे थेसे तिगै म्नाङ्जीनम भिसी म्हन्जी। जकरियासे थे म्हिगदेदा या लिप्बान ताम लबारी छ्याइजी। ओच्छे थे ताम पाङ्आखम्बाला आखम्बान तजी।

२३ परमेश्वरला मन्दिर न्हडरी पूजा लतोःबा हाडला पालो जिन्माहेन्से जकरिया दिमरी निजी। २४ तिगै धिन लिच्छा थेला मिड एलीशिबा न्हसेला तजी। जमाहेन्से एलीशिबा ला डाधोना दिम ख्लासी खानडएनोन आनिनी। २५ ओच्छे थेसे “दाहेन्से खालैसे डादा हेला थालगै भिसी परमेश्वरसे डादा दया लसी चु लबा हिन्ना” भिसी भिजी।

येशू न्हला भिसी पाड्बा ताम

२६-२७ गालील अञ्चलला नासरत भिबा नाम्सारी मरियम भिबा कन्याकेटी गिक मुबा। थेदा दाऊद ग्लेला वंशला योसेफ भिबा म्हिसे ब्याह लबारी हीबा मुबा। एलीशिबा न्हसेला तबा ला ढु तमा परमेश्वरसे गब्रिएल स्वर्गदूतदा मरियम मुबा ग्लारी पुडखजी। * २८ जमाहेन्से स्वर्गदूत थे कन्याकेटी मुबा ग्लारी निसी, “लास्सो माइ, एदा परमेश्वरसे ल्हानान दयामाया लबा मुला। थेतबासेलमा एदेन छ्याम परमप्रभु मुला” भिसी भिजी।

२९ स्वर्गदूतला ताम थेःसी मरियम उदेक तजी। ओच्छे “आहिन, चु तिग भिबा?” भिसी सेमरी म्हन्जी। ३० तर स्वर्गदूतसे थेदा “थालोङ्गो मरियम, तिग्दा भिसम परमेश्वरसे

एदा ल्हानान मोलम पिन्बा मुला। ३१ दाहेन्से ए न्हसेला तला ओच्छे एसे भा गिक न्हला। एसे थेला मिन येशू थान्गो। * ३२ थे घेन म्हि दोला ओच्छे थेदा जम्मान भन्दा घेन परमेश्वरला भा भिला। परमप्रभु परमेश्वरसे थेदा दाऊदला यहुल्सारी शासन लबारी ग्ले स्होला। ३३ थेसे सदनना लागिरी याकूबला वंशथोरी शासन लला। ओच्छे थेला शासन खाइमै आजिन” भिसी भिजी। *

३४ स्वर्गदूतला चुहड्बा ताम थेःसी मरियमसे “चु खाहड् लसी तला? तिग्दा भिसम डाइ ब्याह लबान आरे” भिसी भिजी।

३५ स्वर्गदूतसे मरियमदा “एथोरी परमेश्वरला आत्मा फेप्खला। ओच्छे एसे जम्मान भन्दा घेन परमेश्वरला आत्माला शक्तिसे कोला न्हला। थेतबासेलमा थे कोलादा परमेश्वरला भा भिला। ३६ च्यागो, एला हाडला म्हि एलीशिबादाएनोन दिड निबासे लमा कोला आन्ह भिसी भिमुबा। तर दान्दे थे न्हसेला तबा ला ढु तबा मुला। ३७ थेतबासेलमा परमेश्वरसे लआखम्बा गे तिगै आरे” भिसी मरियमदा जोहाब पिन्जी। *

३८ ओच्छे मरियमसे स्वर्गदूतदा “डा परमेश्वरदा तेन्बा म्हि हिन्ना, डादा

ह्वाडसे भिबा ह्ङनोन तगै” भिसी
भिमाहेन्से स्वर्गदूत निजी।

मरियम एलीशिबादा हुप तबारी निबा

३६ तिगै धिन लिच्छा मरियम योना
योना लसी यहूदिया अञ्चलला
गडपट्टिला नाम्सा गिकरी निजी।
४० ओच्छे जकरियाला दिमरी वाङ्सी
एलीशिबादा “लास्सो फ्याफुल्ला”
भिजी। ४१ मरियमसे लास्सो फ्याफुल्ला
भिबा एलीशिबासे थे:माहेन्से
एलीशिबाला फोरी मुबा कोला भोल्जी।
ओच्छे एलीशिबाथोरी परमेश्वरला
आत्मा फेप्खजी। ४२ जमाहेन्से
एलीशिबासे घेन काइ लसी,
“म्रिडम्हेमेगदे न्हडरी ए परमेश्वरग्याम
मोलम याङ्बा म्हि हिन्ना। ओच्छे
एला फोरी मुबा कोलादाएनोन ल्हानान
मोलम पिन्बा मुला। ४३ खाल्ला दयासे
लमा डा ह्ङबाला दिमरी डाला प्रभुला
आमा खजी? ४४ च्यागो, एसे लास्सो
फ्याफुल्ला भिबा डाइ थे:मैछ्याम
डाला फोरी मुबा कोला ताङ्सी
भोल्जी। ४५ परमप्रभुसे सुङ्बा ताम पूरा
तला भिसी विश्वास लबासे लमा एसे
परमेश्वरग्याम मोलम याङ्बा मुला।”
भिसी भिजी।

मरियमसे परमेश्वरदा धन्यवाद पिन्बा

४६ ओच्छे मरियमसे चुहङ् भिसी
व्हाइ गोबारी छ्याइजी,
“डाला परमप्रभु परमेश्वरदा
जयजयकार तगै।”
४७ डादा थार्बा पिन्बा परमेश्वरदेन
छ्याम डा सेमहेन्सेन ताङ्बा
मुला।
४८ तिगदा भिसम परमेश्वरदा तेन्बा डा
ह्ङ्बा जजा म्हिदाएनोन वास्ता
लबा मुला।
दाहेन्से जम्मान म्हिगदेसे डादा
परमेश्वरग्याम मोलम याङ्बा
म्हि भिसी भिला।*
४९ तिगदा भिसम जम्मान भन्दा घेन
परमप्रभु परमेश्वरसे डाला
लागिरी घेन गे लसी पिन्बा
मुला।
परमप्रभुन परमेश्वर† हिन्ना।
५० परमेश्वरदा मान लबा म्हिगदेदा
परमेश्वरसे जुकजुकधोनान
दया लला।
५१ ओच्छे सेमरी डा ह्ङ्बा खालै
आरे भिसी भ्रबा म्हिगदेदा
परमेश्वरसे ह्वाडला शक्तिसे
ससा बडबड तना लबा मुला।

१:४६ चु पदरी “परमप्रभु परमेश्वर” भिसी पाङ्बा ताम ग्रीक बाइबलरी “थेला छान चोखो
मुला” भिसी पाङ्बा मुला। चुला मुल अर्थ चा थे जम्मान भन्दा घेन हिन्ना ओच्छे थे ह्ङ्बा
स्थान्दो खालै आरे भिबा हिन्ना। थेतबासेलमा जम्मासेन थेदा तेन्तो:ला।

१:४६-५५ १ शमू २:१-१० १:४८ १ शमू १:११

५२ शासन लबा म्हिगदेदा परमेश्वरसे
थेला ग्लाग्याम ते:बा मुला।

ओच्छे प्राडबोगदेदा परमेश्वरसे
घेन म्हि स्होबा मुला।*

५३ ओच्छे फोखेन्बागदेदा परमेश्वरसे
सदन ज्यबा ज्यबा स्हे पिन्सी
मेन्ना लबा मुला।

तर फ्युकपो म्हिगदेदा तिगै
आपिन्ना या थान्थान पुइबा
मुला।

५४ परमेश्वरसे हाडसे लबा
दया ढन्सी हाडदा तेन्बा
इसाएलीगदेदा हो लबा मुला।

५५ ओच्छे य्हाडला आखे म्हेमेदा
सुड्बा हड् अब्राहामदेन थेला
सन्तानगदेदा जुकजुकधोनाला
लागिरी दया लबा मुला।”*

५६ मरियम ला सोमधोना
एलीशिबादेन छ्यामनोन चिसी हाडला
दिमरी निजी।

बप्तिस्मा पिन्बा यूहन्ना न्हबा

५७ ओच्छे एलीशिबासे कोला न्हबा
धुइ तसी थेसे भा न्हजी। ५८ जमाहेन्से
परमप्रभु परमेश्वरसे एलीशिबादा दया
लबा मुला भिबा थे:सी थेला हाडला
म्हिदेन खिम्जेमगदे ल्हानान ताड्जी।

५९ कोला न्हसी भ्रे:रे तमाहेन्से
थेनीगदे थे कोलाला खतना लबारी
खजी। ओच्छे थेनीगदेसे थे कोलाला
मिन थेला आबाला हड्बान जकरिया

थान्बारी छ्याइजी,* ६० तर थेला
आमासे “आहिन, थेला मिन यूहन्ना
थान्तो:ला” भिसी भिमा, ६१ थेनीगदेसे
“थेहड्बा मिन एला हाडला म्हि
न्हडरी खालैला आरे” भिसी भिजी।

६२ जमाहेन्से थेनीगदेसे थेला
आबादा भाला मिन तिग थान्बा
भिसी या लिप्सी ड्योइमा,
६३ जकरियासे पाटी गिक हीसी थे
पाटीरी थेला मिन यूहन्ना हिन्ना
भिसी भिजी। चुहड्बा म्राड्सी
थेनीगदे जम्मान उदेक तजी। ६४ थेनोन
धुइरी जकरियासे ताम पाड्बारी
छ्याइजी। ओच्छे थेसे परमेश्वरदा
धन्यवाद पिन्जी। ६५ चुहड् तबा
म्राड्सी थेला खिम्जेमगदे जम्मान
उदेक तसी लोड्बा खजी। ओच्छे
यहूदियाला गडरीक्यारला नाम्सा
नाडनोन चु ताम थे:जी। ६६ चु ताम
थे:बा जति जम्मासेन “लिच्छा चु
कोला खाहड्बा तला” भिसी हाड
हाडला सेमरी म्हन्जी। तिगदा भिसम
थे कोलादेन छ्याम परमेश्वर मुबा।

जकरियासे गोबा व्हाइ

६७ यूहन्नाला आबा जकरियाथोरी
परमेश्वरला आत्मा फेप्खजी। ओच्छे
परमेश्वरला आत्मासे कुल्बा हड्नोन
थेसे पाड्बारी छ्याइजी।

६८ “इसाएलीगदेला परमप्रभु
परमेश्वरला जयजयकार तगै

तिग्दा भिसम परमेश्वर फेप्खसी
हाडला म्हिगदेदा हो लसी
पापग्याम फेबा मुला!

६६ परमेश्वरसे थेदा तेन्बा दाऊदला
वंशरी

यहाडदा थार्बा पिन्बा शक्तिशाली
म्हि गिक पुइखबा मुला।

७०-७१ यहाडला शत्रुगदेदेन यहाडदा
हेला लबागदेग्याम

थार्बा पिन्ना भिबा ताम
दडबोरीन परमेश्वरसे हाडला
अगमवक्तागदेग्याम सुइसी
जिन्बा मुबा।

७२ ओच्छे परमेश्वरसे यहाडला आखे
म्हेमेदेन छ्याम लबा हाडला
कबुल ढन्सी

यहाडदा दया लबा मुला।

७३ थे कबुल परमेश्वरसे यहाडला
म्हेमे अब्राहामदेन छ्याम लबा
मुबा।

७४-७५ थेतबासेलमा शत्रुगदेग्याम
थार्बा याड्बाला लागिरी
आलोड्ना

यहाड सोतेधोना परमेश्वरला
डाच्छापट्टि ज्यबा म्हि दोसी
यहाडसे ज्यबा गे लसी
परमेश्वरदा तेन्म्याड्गै।

७६ डाला भा,
दाहेन्से एदा जम्मासेन जम्मान
भन्दा घेन परमेश्वरला
अगमवक्ता भिसी भिला।

तिग्दा भिसम ए प्रभुला डाच्छा
डाच्छा निसी थेला ग्याम
स्होला।*

७७ ओच्छे पापला दोष मेटब तमाहेन्से
थार्बा याड्बाला भिसी एसे
परमेश्वरला म्हिगदेदा लोप्ला।
७८ तिग्दा भिसम यहाडला
परमेश्वर दया लबा परमेश्वर
हिन्ना।

थेतबासेलमा परमेश्वरसे यहाड
मुबा ग्लारी स्वर्गग्याम यहाल
पुइखला।

७९ परमेश्वरसे धोपधोपरी भ्रबादेन
सिला भिसी लोड्बा म्हिगदेदा
यहाल पिन्ना।

ओच्छे थेनोन यहालसे
यहाडदा शान्तिला ग्यामरी
भ्रपुइला।”*

८० यूहन्ना परमेश्वरला आत्माग्याम
ज्ञान बुद्धि याड्बान घेन तबान
निजी। ओच्छे इस्राएलीगदेला गुडरी
परमेश्वरला यहुलसाला समाचार
थे:ना लबा धुइ आततेधोना यूहन्ना
तोडतोडबा ग्लारी चिजी।

येशू न्हबा

मत्ती १:१८-२५

२ थे धुइरी रोमी ग्याल्बो कैसर
अगस्टससे जम्मान यहुलसाला
म्हि भ्याबाला लागिरी जम्मालान मिन
भ्रिउ भिसी कुल्जी। २सिरिया भिबा

गलाला हाकिम कुरेनियस मुबा धुइरी चुहङ् लसी म्हिगदे भ्याबा डाच्छा रेम तबा मुबा। ३जमाहेन्से जम्मान म्हिगदे मिन भिबारी हाड हाडला आखे म्हेमेला नाम्सारी निजी।

४थे धुइरी योसेफ गालील अञ्चलला नासरत भिबा गलारी चिबा मुबा। थेएनोन हाडला मिन भिबारी यहूदिया अञ्चलला बेथलेहेम भिबा दाऊदला शहररी निजी। तिग्दा भिसम थे दाऊद गलेला वंशला मुबा। ५ओच्छे योसेफसे हाडसे ब्याह लबारी छ्याइबा मरियमदाएनोन छ्यामनोन भोर्सी बेथलेहेमरी मिन भिबारी निजी। थे धुइरी मरियम न्हसेला मुबा। ६थेनीगदे बेथलेहेमरी मुमान मरियमसे कोला न्हबा धुइ तजी। ७जमाहेन्से मरियमसे बेथलेहेमरीन हाडला थेबा भा न्हजी। थे भादा ल्हेथानरी रिल लसी म्हे मुइदा खोले पिन्बा डूँडरी नाइजी। तिग्दा भिसम थेनीगदेसे खजिबै दिमरी चिबा ग्ला आयाङ्नी।

गोठालोगदेसे लैनु येशूदा स्याप्बा

८थे गलाला डामला पाङ्ग्यालरी गोठालोगदे म्हुनड ग्युगदे खुङ्सी चिबा मुबा। ९थेनोन धुइरी थेनीगदेसे स्वर्गदूत गिक म्हाङ्जी। ओच्छे थेनीगदेला क्युर्नोन परमेश्वरला स्हेरसे य्हाल य्हाल तजी। चुहङ् तबा म्हाङ्सी थेनीगदे लोङ्जी। १०तर स्वर्गदूतसे थेनीगदेदा “थालोङ्गो! तिग्दा भिसम डाइ एनीगदेला लागिरी थार्बा पिन्बा

समाचार भसी खबा मुला। चु समाचार जम्मान म्हिगदेला लागिरी हिन्ना। ११तिनी दाऊदला शहररी एनीगदेदा पापग्याम थार्बा पिन्बा म्हि गिक न्हबा मुला। थेनोन थार्बा पिन्बा ख्रीष्ट प्रभु हिन्ना। १२ओच्छे एनीगदेला लागिरी चिनु चा चु तला, एनीगदेसे कोला गिकदा ल्हेथानसे रिल लसी म्हे मुइदा खोले पिन्बा डूँडरी नाइसी थान्बा स्याप्ला।”

१३थेनोन धुइरी स्थान्दो स्वर्गदूतला हुल म्हाङ्जी। ओच्छे थे स्वर्गदूतगदेसे परमेश्वरदा धन्यवादला व्हाइ गोबारी छ्याइजी,

१४“स्वर्गरी धन्छ्याबा परमेश्वरला जयजयकार,
जम्बुलिङरी जुन म्हिदा परमेश्वरसे धम्बा मुला थेनीगदेदा शान्ति तगे!”

१५स्वर्गदूतगदे स्वर्गरी निमाहेन्से गोठालोगदेसे हाड हाड न्हडरी “लु, भ्रउ, य्हाडदा परमेश्वरसे सुङ्बा चु ल्हेङ्मो च्याबारी बेथलेहेमरी निङ्” भिसी भिजी।

१६जमाहेन्से थेनीगदे योना योना लसी बेथलेहेमरी निजी। थेरी थेनीगदेसे मरियमदेन योसेफ ओच्छे लैनु कोलादा चा म्हे मुइदा खोले पिन्बा डूँडरी नाइसी थान्बा म्हाङ्जी। १७जमाहेन्से थे कोलाला बारेरी थेनीगदेदा स्वर्गदूतसे पाङ्बा ताम थेनीगदेसे जम्मान म्हिगदेदा थे:ना लजी। १८ओच्छे गोठालोगदेसे पाङ्बा

ताम थे:बा म्हिगदे जम्मान उदेक तजी।
 १९तर मरियमसे चा चु जम्मान ताम
 म्हन्सी सेमरीन थान्जी। २०ओच्छे
 स्वर्गदूतसे भिबा हङ्गनोन म्राङ्बासे
 लमा गोठालोगदेसे परमेश्वरदा घेन
 मानदेन जयजयकार लसी धन्यवादला
 व्हाइ गोबान निजी।

येशूदा परमेश्वरला मन्दिररी भोर्सी अर्पण लबा

२१थे कोला न्हसी भ्रे:रे तमा खतना
 लबा धुइरी थेला मिन येशू थान्जी।
 थेला मिन आमाला फोरी खबा भन्दा
 डाच्छान स्वर्गदूतसे पाङ्बा मुबा।*
 २२ओच्छे मोशाला ठिम अन्छार
 थेनीगदे चोख्याब लबा धुइ तमाहेन्से
 येशूदा थेला आबादेन आमासे
 परमप्रभुला डाच्छा अर्पण लबाला
 लागिरी यरूशलेमरी परमेश्वरला
 मन्दिररी भजी।* २३परमप्रभुसे मोशदा
 पिन्बा ठिमरी भ्रिबा अन्छार जम्मान
 भन्दा डाच्छा न्हबा भा परमप्रभुला
 लागिरी फेसी थान्तो:बा मुबा।*
 २४ओच्छे परमेश्वरसे मोशदा पिन्बा
 ठिमरी मुबा अन्छार जोर गिक ढुकुर
 तसै जोर गिक परेवा तसै परमप्रभुदा
 फुलतो:बासे लमा थेनीगदे बलि
 फुल्बारी खजी।
 २५थे धुइरी यरूशलेमरी शिमियोन
 भिबा म्हि गिक मुबा। थे परमेश्वरसे

म्हन्बा अन्छार भ्रबादेन परमेश्वरदा
 तेन्बा म्हि मुबा। थेदा परमेश्वरसे
 इस्राएलीगदेदा थार्बा पिन्बा म्हि
 पुइखला भिसी सुङ्बा ताम पूरा लला
 भिसी भ्रान्सी चिबा मुबा। २६ओच्छे
 “थार्बा पिन्बा ख्रीष्टदा आम्राङ्तेधोना
 ए आसि” भिसी परमेश्वरला
 आत्मासे डाच्छान थेदा पाङ्बा मुबा।
 २७परमेश्वरला आत्मासे कुल्बा
 हङ्ग शिमियोन परमेश्वरला मन्दिररी
 निजी। थे धुइरी येशूला आबादेन
 आमासे परमेश्वरसे मोशदा पिन्बा
 ठिम अन्छार तिग लतो:बा मुबा, थे
 लबारी येशूदा परमेश्वरला मन्दिररी
 भसी खजी। २८जमाहेन्से शिमियोनसे
 लैनु येशूदा कुरी किन्सी परमेश्वरदा
 धन्यवाद पिन्सी चुहङ्ग भिजी,
 २९“परमप्रभु हाङ्गसे सुङ्बा ताम पूरा
 तबा मुला। दाहेन्से हाङ्गदा
 तेन्बा म्हि डा सिसै ढुक्क मुला।
 ३०तिगदा भिसम हाङ्गसे कबुल लबा
 हङ्गनोन थार्बा पिन्बा ख्रीष्टदा
 डाङ्ग म्राङ्सी जिन्बा मुला।
 ३१चु कोलादा हाङ्गसे जम्मान
 म्हिगदेला लागिरी पुइखबा
 हिन्ना।
 ३२अर्गु यहुलला म्हिगदेदा ख्रीष्टसेन
 हाङ्गला ग्याम उन्ना,
 ओच्छे चुसे लमा इस्राएलीगदेसे
 मान याङ्गला।”*

३३ ओच्छे शिमियोनसे लैनु
 येशूला बारेरी पाङ्बा ताम थे:सी
 येशूला आबादेन आमा उदेक तजी।
 ३४ जमाहेन्से शिमियोनसे मरियमदा
 मोलम पिन्बान भिजी, “च्यागो, चु लैनु
 इस्राएलीगदेदा थार्बा पिन्बादेन नाश
 लबाला लागिरी परमेश्वरसे पिन्बा
 चिनु हिन्ना। थेदा ल्हानान म्हिगदेसे
 बिरोध लला। ३५ थेतबासेलमा
 ल्हानान म्हिला सेमरी म्हन्बा तामगदे
 परमेश्वरसे उन्ना। ओच्छे एला सेमरी
 ल्हानान दुख तला।”

३६-३७ थेरी आशेर वंशला फनुएलला
 भामे हन्ना भिबा बोगल ब्लिसे ब्लि
 दिङ तबा म्रिडम्हेमे गिक मुबा। थे
 अगमवक्तास्या मुबा, ब्याह तसी निस
 दिङ तमा थेला ह्वेम्बो सिजी। ओच्छे
 थे फोइथान चिसी धिन म्हुननोन
 परमेश्वरला मन्दिररी प्रार्थना लबान
 परमेश्वरदा तेन्मुबा। ३८ थेनोन धुइरी
 हन्ना खसी परमेश्वरदा धन्यवाद
 पिन्जी। ओच्छे थेसे परमेश्वरसे
 यरूशलेमदा पापग्याम फेबा धुइदा
 भ्रान्सी चिबा म्हिगदेदा थे कोलाला
 बारेरी पाङ्सी पिन्जी। ३९ जमाहेन्से
 थेनीगदेसे परमेश्वरसे मोशादा पिन्बा
 ठिम अन्छार लतो:बा जम्मान गे
 जिन्ना लसी गालील अञ्चलला
 ह्वाडलान नासरत शहररी निजी।*
 ४० लैनु येशू घेन घेन तबान खमाहेन्से
 थेला बुद्धिऐनोन खजी। तिग्दा भिसम

परमेश्वरला मोलम थेदेन छ्याम
 मुबा।

**येशूसे यहूदी धर्मगुरुगदेदेन छ्याम
 ताम लबा**

४१-४२ मिश्र यहूल्साग्याम फेसी खबा
 धिनदा ढन्सी धङ्बा चाडरी चाडला
 ठिम अन्छार येशूला आबा आमा
 दिङएदङसे यरूशलेमरी निबा लमुबा।
 थेतबासेलमा येशू च्युक न्ही दिङ
 तमाएनोन येशूला आबादेन आमासे
 येशूदा छ्यामनोन भोर्सी यरूशलेमरी
 निजी।* ४३ चाङ धङ्सी जिन्माहेन्से
 थेनीगदे दिमरी निजी। तर येशू चा
 यरूशलेमरीन धन्छ्याजी। चु ताम
 थेला आबादेन आमासे था आयाङ्नी।
 ४४ येशूला आबादेन आमासे येशू
 म्हिला हुलरी मुला तला भिसी म्हन्सी
 तिरेला ग्याम भ्रसी निजी। ओच्छे
 थेनीगदेसे येशूदा ह्वाडला म्हिदेन
 डोसेबा म्हिगदे मुबा ग्लारी निसी
 म्हाइजी, ४५ तर आस्याप्बासे लमा
 थेनीगदे थेदा म्हाइबान यरूशलेमरी
 दो:सी खजी। ४६ थेनीगदेसे सोमरेरी
 येशूदा परमेश्वरला मन्दिररी स्याप्जी।
 थेरी थे यहूदी धर्मगुरुगदेदेन छ्याम
 धन्छ्यासी थेनीगदेसे पाङ्बा ताम
 इयान्सी, इयोइबा छार्बा लसी
 धन्छ्याबा मुबा। ४७ थेरी येशूला ताम
 इयान्सी चिबागदे येशूसे ताम घोसी
 जोहाब पिन्बा म्हाङ्सी उदेक तबा

मुबा। ^{४८}येशूला आबादेन आमासे थेदा
प्राङ्सी उदेक म्हन्सी थेला आमासे
“च्यागो भा, एला आबादेन डा एदा
म्हाइमा म्हाइमा हैरान तजी, एसे
चुहङ् तिग लबा?” भिमा, ^{४९}येशूसे
थेनीगदेदा “हाङनीसे डादा तिग्दा
म्हाइबा? डा डाला आबाला दिमरी
चितो:बा भिसी हाङनीदा था आरे?”
भिसी सुङ्जी। ^{५०}तर थेला आबादेन
आमासे चु ताम आघोनी।

^{५१}जमाहेन्से येशू हाङला आबा
आमादेन छ्यामनोन नासरतरी फेज्जी।
ओच्छे हाङला आबा आमासे पाङ्बा
ताम ड्यान्सी धन्छ्याजी। तर थेला
आमासे चु जम्मान ताम हाङला
सेमरीन थान्जी। ^{५२}ओच्छे येशू
परमेश्वरदेन म्हिगदेला दयामायारी
घेन घेन तमाहेन्से बुद्धिनोन बढब
तबान निजी।*

बन्तिस्मा पिन्बा यूहन्ना

मत्ती ३:१-१२; मर्कूस १:१-८;

यूहन्ना १:१९-२८

३ रोमी ग्याल्बो कैसर तिबेरियाससे
शासन लबा च्युक डा दिङ तमा
पन्तियस पिलातस भिबा म्हि यहूदिया
अञ्चलला हाकिम मुबा। जमा धुइरी
हेरोद गालील अञ्चलला ग्ले मुबा,
ओच्छे थेला आले फिलिप इतुरियादेन
त्राखोनिटिस भिबा ग्लाला ग्ले मुबा,
थेहङ् लसीन लुसानियास अबिलेने

अञ्चलला ग्ले मुबा। ^२ओच्छे
हन्नासदेन कैयाफा परमेश्वरला
मन्दिररी पूजा लबा मुल म्हि मुबा।
थेनोन धुइरी परमेश्वरसे जकरियाला
भा तोडतोडबा ग्लारी चिबा यूहन्ना
मुबा ग्लारी हाङला बचन पुइखजी।
^३यूहन्नासे म्हिगदेदा हाङ हाङला
पाप रूलासी परमेश्वरपट्टि दो:गो,
ओच्छे बन्तिस्मा किन्गो। जमाहेन्से
परमेश्वरसे एनीगदेला पापला दोष
मेटब लला भिबान थार्बा पिन्बा
समाचार थे:ना लबान यर्दन स्योडला
क्यारमारला जिल्लारीक्यार खजी।
^४चु ताम यशैया भिबा अगमवक्तासे
चुहङ् लसी भिबा मुबा,

“तोडतोडबा ग्लारीक्यार म्हि गिक

क्रिङ्बान चुहङ् भिसी भ्रला,

‘परमप्रभुला ग्याम तयार लउ,

ओच्छे परमप्रभु भ्रबाला लागिरी

थेला ग्याम सोजो स्होउ,

^५मुबा जे गडदेन होपगदे सम्म

स्होला,

ओच्छे काङलाङ कुडलीडबा

ग्यामगदे सोजो तला

ओच्छे पगल पोगल मुबा

ग्लाएनोन सम्म तला।

^६जमाहेन्से जम्मान म्हिगदेसे

परमेश्वरसे पिन्बा थार्बा

प्राङ्गला।’”*

^७थेतबासेलमा यूहन्नासे बन्तिस्मा
किन्बारी खबा म्हिगदेदा चुहङ्

भिसी पाङ्जी, “पुख्रीला कोलागदे, एनीगदेदा परमेश्वरला बमोग्याम स्योरम्याङला भिसी खाल्से भिजी?”^{*} ८ चुदे एनीगदे हाङ हाङला पाप रुलासी परमेश्वरपट्टि दोःबान हिन्सम परमेश्वरदा सेम निबा गे लउ, ओच्छे एनीगदे हाङ हाङ न्हडरी डनी अब्राहामला कोलागदे भिसी पाङ्बारी थाम्हाङगो। तिग्दा भिसम परमेश्वरसे अब्राहामला लागिरी चु युडबागदेग्यामसेनोन कोलागदे स्होबारी खम्ला। ९ च्यागो, दोड थाबारी तरी थीसी जिन्बा मुला। थेतबासेलमा ज्यबा रो आरोबा जम्मान दोड टाहेन्सेन थासी मेरी फर्ला।”^{*}

१० जमाहेन्से म्हिगदेसे यूहन्नादा “थेहङ् भिसम दाहेन्से डन्से तिग लउ?” भिसी ड्योडमा, ११ यूहन्नासे थेनीगदेदा “जुन म्हिदेन छ्याम स्हुर्दम न्ही मुला थेसे आरेबा म्हिदा पिन्नौ, ओच्छे जुन म्हिदेन छ्याम चबा स्हे मुला थेसे आरेबागदेदा भो लसी पिन्नौ” भिसी जोहाब पिन्जी।

१२ ओच्छे तिरो दुइबा म्हिगदेएनोन यूहन्ना मुबा ग्लारी बप्तिस्मा किन्बारी खसी, “गुरु, डन्से चा तिग लउ?” भिसी ड्योडजी।^{*}

१३ यूहन्नासे थेनीगदेदा “एनीगदेसे तिरो दुइमा सरकारसे तोगब लबा भन्दा ल्हाना थाकिन्गो” भिसी भिजी।

१४ ओच्छे सिपाहीगदेएनोन खसी, “डन्से चा तिग लउ?” भिसी ड्योडजी। यूहन्नासे थेनीगदेदा “खालैदा अत्याचार लसी आहिन्बा तामदा हिन्ना भिसी टाङगा थाकिन्गो, हाङला खतोःबा जे टाङगा किन्सी सन्तोक लसी चिउ” भिसी भिजी।

१५ जमा धुइरी म्हिगदेसे थाबां पिन्बा ख्रीष्ट फेप्खला भिसी आश लसी चिबा मुबा। थेतबासेलमा थेनीगदेसे यूहन्नादा म्हाङ्सी चुनोन ख्रीष्ट हिन्ना वा भिसी सेमरी म्हन्सी चिबा मुबा। १६ तर यूहन्नासे थेनीगदेदा “डाइ एनीगदेदा क्युइसे बप्तिस्मा पिन्ना। तर डा भन्दा शक्तिशाली फेप्खबान मुला डा थेला लखमला तुना ब्लबाधोनाला आरे। थेसे एनीगदेदा परमेश्वरला आत्मादेन मेसे बप्तिस्मा पिन्ना। १७ ग्वा य्हाप्बा नारुले थेलान छ्यारी मुला। थेसे खलारी ग्वा ज्यना लसी य्हाप्सी ग्वा जति भकारीरी युला। ओच्छे पोलोवा जति खाइमै आसिबा मेरी खाङ्ला” भिसी भिजी। १८ चुहङ् लसी यूहन्नासे अर्गु ल्हानान अर्ती पिन्सी, लोप्सी म्हिगदेदा परमेश्वरला य्हुल्साला समाचार थेःना लजी। १९ तर हेरोद ग्लेसे हाङला आले चाङ हेरोदियास भिबादा थान्बासे लमा थेला जम्मान पाप गे म्हाङ्सी यूहन्नासे थेदा बङ्बा मुबा। २० थेतबासेलमा थेसे यूहन्नादा

भयाल्खानरी भाङ्सी पापथोरी भन
पाप गे लजी। *

येशूसे बप्तिस्मा किन्बा

मत्ती ३:१३-१७; मर्कुस १:९-११;

यूहन्ना १:३२-३४

२१ म्हिगदेसे बप्तिस्मा किन्बान
लबा धुइरी येशूसेनोन बप्तिस्मा
किन्जी। थेसे प्रार्थना लबान लबा
धुइरी स्वर्ग ठोङ्बा म्राङ्जी।
२२ ओच्छे परमेश्वरला आत्मा थेथोरी
दुकुर हङ् लसी फाप्खजी। ओच्छे
स्वर्गयाम “ए डाइ सेमहेन्से माया
लबा डाला भा हिन्ना, ए म्राङ्सी
डा ल्हानान ताङ्बा मुला” भिबा काइ
खजी। *

येशूला आखे म्हेमे

मत्ती १:१-१७

२३ येशूसे हाडला गे लबारी छ्याइबा
धुइरी येशू बोगल गिकसे च्युइ दिङ
तबा मुबा।

जम्मान म्हिगदेसे येशू योसेफलान
भा भिसी म्हन्बा मुबा।

योसेफ एलीला भा मुबा।

२४ एली मत्तातला भा,
मत्तात लेवीला भा,
लेवी मल्कीला भा,
मल्की यान्नाला भा,
यान्ना योसेफला भा,

२५ योसेफ मत्ताथियासला भा,
मत्ताथियस आमोसला भा,
आमोस नहूमला भा,
नहूम इसलीला भा,
इसली नगैला भा,

२६ नगै माथला भा,
माथ मत्ताथियासला भा,
मत्ताथियस सेमैनला भा,
सेमैन योसेखला भा,
योसेख योदाला भा,
२७ योदा योआननला भा,
योआनन रेसाला भा,
रेसा यरुबाबेलला भा,
यरुबाबेल शालतिएलला भा,
शालतिएल नेरीला भा,

२८ नेरी मल्कीला भा,
मल्की अदीला भा,
अदी कोसामला भा,
कोसाम एलमादमला भा,
एलमादम एर्ला भा,

२९ एर यहोशूला भा,
यहोशू एलीएजरला भा,
एलीएजर योरीमला भा,
योरीम मत्तातला भा,
मत्तात लेवीला भा,

३० लेवी शिमियोनला भा,
शिमियोन यहूदाला भा,
यहूदा योसेफला भा,
योसेफ योनानला भा,
योनान एल्याकीमला भा,

३१ एल्याकीम मलेआला भा,
 मलेआ मिन्नाला भा,
 मिन्ना मत्ताथाला भा,
 मत्ताथा नातानला भा,
 नातान दाऊद ग्लेला सन्तान,
 ३२ दाऊद यिशैला भा,
 यिशै ओबेदला भा,
 ओबेद बोअजला भा,
 बोअज सल्मोनला भा,
 सल्मोन नहशोनला भा,
 ३३ नहशोन अम्मीनादाबला भा,
 अम्मीनादाब आरामला भा,
 आराम हेस्रोनला भा,
 हेस्रोन फारेसला भा,
 फारेस यहूदाला भा,
 ३४ यहूदा याकूबला भा,
 याकूब इसहाकला भा,
 इसहाक अब्राहामला भा,
 अब्राहाम तेरहला भा,
 तेरह नाहोरला भा,
 ३५ नाहोर सरूगला भा,
 सरूग रऊला भा,
 रऊ पेलेगला भा,
 पेलेग एबेरला भा,
 एबेर शेलहला भा,
 ३६ शेलह केनानला भा,
 केनान अर्पक्षदला भा,
 अर्पक्षद शेमला भा,
 शेम नोआला भा,
 नोआ लेमेखला भा,
 ३७ लेमेख मतूशेलहला भा,

मतूशेलह हनोकला भा,
 हनोक येरेदला भा,
 येरेद महलालेलला भा,
 महलालेल केनानला भा,
 ३८ केनान एनोशला भा,
 एनोश शेतला भा,
 शेत आदमला भा,
 आदम परमेश्वरला भा मुबा।

शैतानसे येशूदा सेम फसब लबारी म्हाइबा

मत्ती ४:१-११; मर्कुस १:१२-१२

४ परमेश्वरला आत्मा येशूथोरी
 फेप्खमाहेन्से येशू यर्दन
 स्योङ्ग्याम दोःजी। ओच्छे परमेश्वरला
 आत्मासे थेदा तोङ्तोङबा ग्लारी
 भोजी। २थेरी शैतानसे येशूदा बोगल
 न्ही धिनधोना फसब लबारी म्हाइजी।
 ओच्छे बोगल न्ही धिनधोना येशूसे
 तिगै आसोल्नी। थेतबासेलमा येशूदा
 ल्हानान फोखेन्जी। ३थेनोन धुइरी
 शैतानसे येशूदा “हाङ परमेश्वरला
 भा हिन्बान हिन्सम चु युङ्बादा गेङ
 स्होउ” भिसी भिजी। ४ओच्छे येशूसे
 शैतानदा “गेङसे जे म्हे आसो भिसी
 बचनरी भिबा मुला” भिसी सुङ्जी।*
 ५-६ जमाहेन्से शैतानसे येशूदा नोबा
 गडरी भोर्सी जम्बुलिङला जम्मान
 यहुल्सागदे उन्बान, “डाइ हाङदा चु
 जम्मान यहुल्साला ग्लेदेन चु जम्मान
 धन सम्पत्तिला मालिक स्होला,

तिगदा भिसम चु जम्मान डादा पिन्बा मुला। ओच्छे डाला सेमसे म्हन्बादा डाइ पिन्ना। ^७थेतबासेलमा हाडसे डादा फ्या लजी भिसम चु जम्मान हाडला तला” भिसी भिमा, ^८येशूसे थेदा “बचनरी चुहङ् भिसी भिबा मुला, ‘एसे हाडला परमप्रभु परमेश्वरदा फ्या लउ, ओच्छे थेदा जे तेन्गो’ ” भिसी सुङ्जी। *

^९दोःसी शैतानसे येशूदा यरूशलेमरी भोर्सी परमेश्वरला मन्दिरला थोबोरी राप्पुङ्जी। ओच्छे थेसे येशूदा चुहङ् भिसी भिजी, “हाड पक्कान परमेश्वरला भा हिन्सम चु ग्याम मार छ्योङ्गो, ^{१०}तिगदा भिसम बचनरी चुहङ् भिसी भिबा मुला,

‘परमेश्वरसे हाडदा जोगब लबाला लागिरी हाडला स्वर्गदूतगदेदा कुल्ला। *

^{११}ओच्छे एला काड युङ्बारी थाठोकै भिसी

थेनीगदेसे एदा या यारीन ताला’ भिसी भिबा मुला।” *

^{१२}तर येशूसे थेदा “बचनरी चुहङ्बाएनोन भिबा मुला, ‘एसे हाडला परमप्रभु परमेश्वरला सेम च्याबा गे तिगै थालउ’ ” भिसी सुङ्जी। * ^{१३}जमाहेन्से शैतानसे येशूदा तिगै लसी फसब लबारी आखम्बासे लमा दोःसी मौका आयाङ्तेधोना थेसे येशूदा ख्लासी निजी।

येशूसे म्हिगदेदा लोप्बारी छ्याइबा

मत्ती ४:१२-१७; मर्कस १:१४-१५

^{१४}जमाहेन्से परमेश्वरला आत्माला शक्तिरी येशू गालील अञ्चलरी दोःसी फेप्खजी। ओच्छे थेला बारेरी क्यारमारला जम्मान ग्लारी थेःजी। ^{१५}येशू यहूदीगदे हुप तबा दिम दिमरी फेप्सी म्हिगदेदा लोप्बारी छ्याइजी। जमाहेन्से जम्मान म्हिगदेसे थेला जयजयकार लजी।

नासरतरी येशूला ताम पत्याब आतबा

मत्ती १३:५३-५८; मर्कस ६:१-६

^{१६}जमाहेन्से येशू हाड छर्बा नासरत नाम्सारी फेप्खजी। ओच्छे थे सदन हङ् लसी ब्लप्बा न्हबा धिनकुनु यहूदीगदे हुप तबा दिमरी फेप्सी परमेश्वरला बचनग्याम पढब लबारी छ्याइजी। ^{१७}ओच्छे थेदा यशैया अगमवक्तासे भिबा किताब पढब लबाला लागिरी पिन्जी। जमाहेन्से थे ठोङ्सी चुहङ् भिसी भिबा ग्ला तेःसी पढब लजी।

^{१८}“परमप्रभु परमेश्वरला आत्मा डादेन छ्याम मुला।

तिगदा भिसम प्राडबोगदेदा परमेश्वरला यहुल्साला समाचार थेःना लबारी

ओच्छे भ्याल्खानरी मुबागदेदा परमेश्वरला यहुल्साला

समाचार थे:ना लसी
भ्यालखानग्याम ते:बारी,
मी आम्राङ्बागदेदा मी म्राङ्ना
लबारी
ओच्छे दुखरी मुबागदेदा दुखग्याम
फेबारी,*

१९थेहङ् लसीन हाङला म्हिगदेदा
परमेश्वरसे थाबा पिन्बा
धुइ खसी जिन्बा मुला
भिसी

थे:ना लबारी परमेश्वरसे डादा
धम्सी पुइखबा हिन्ना।”

२०जमाहेन्से येशूसे किताब बन्द
लसी थेरी मुबा म्हिदा पिन्सी
धन्छ्याजी। यहूदीगदे हुप तबा
दिमरी मुबा जम्मान म्हिगदेसे येशूदा
च्यासी चिबा मुबा। २१ओच्छे येशूसे
थेनीगदेदा “परमेश्वरला बचनरी
भ्रिबा चु ताम तिनी एनीगदेसे
ङ्यान्ना ङ्यान्नान पूरा तबा मुला”
भिसी सुङ्जी। २२येशूसे सुङ्बा
दयामायाला ताम थे:सी थेनीगदे
उदेक म्हन्सी जम्मासेन थेला तामदा
ज्यबा भिजी। ओच्छे “चु योसेफला
भा आहिन?” भिसी थेनीगदेसे
भिजी।

२३येशूसे थेनीगदेदा “एनीगदेसे
डादा पक्कान चु उखान भिला
‘डाक्टर, हाङसे हाङदान खम्ना
लउ। एसे कफर्नहुमरी उदेकला गे

लजी भिसी ङन्से थे:मुबा थे गे एसे
हाङला नाम्सारीनोन लउ’ भिसी
पाङ्ला” भिसी सुङ्जी। २४दो:सी
येशूसे थेनीगदेदा चुहङ् भिसी सुङ्जी,
“च्यागो, खजिबै अगमवक्तादा
हाङलान नाम्सारी मान आल।” *

२५तर ङ्यान्गो, चु सत्य हिन्ना।
तिगदा भिसम एलियाला धुइरी
इसाएलरी हेम्बो सिबा मिडम्हेमगेदे
ल्हानान मुबा। थे धुइरी सोम दिङसे
ला दुधोना नाम आखबासे लमा
यहुल्सा नाङनोन अनिकाल तबा
मुबा। * २६तर परमेश्वरसे एलियादा
स्य्हान्दो खालै मुबा ग्लारी आपुङना
सीदोनला सारपत भिबा नाम्सारी
मुबा हेम्बो सिबा मिडम्हेमे मुबा
ग्लारी जे पुङ्जी। * २७थेहङ् लसीन
एलीशा अगमवक्ताला धुइरीएनोन
इसाएलरी कोरे खबा म्हिगदे ल्हानान
मुबा। तर थेनीगदे न्हङरी सिरिया
यहुल्साला नामान भिबा कोरेला जे
कोरे म्हाजी। तर स्य्हान्दो म्हिगदे
खालैलान आम्हानी।” *

२८चु ताम थे:सी यहूदीगदे हुप
तबा दिमरी मुबा जम्मान म्हिगदेदा
बोमो खजी। २९जमाहेन्से थेरी
मुबा म्हिगदेसे येशूदा शहरग्याम
मङ्ग्यार ते:जी। थे शहर गङरी
मुबा, थेतबासेलमा थेनीगदेसे येशूदा
गङला जोरी भोर्सी हिल्ना लबारी

छ्याइजी। ^{३०}तर येशू थे म्हिगदेला गुङग्याम थोन्सी फेप्जी।

येशूसे म्हड ताप्बा

मर्कस १:२१-२८

^{३१}जमाहेन्से येशू गालीलला कफर्नहुम भिबा शहररी फेप्जी। ओच्छे बलप्बा न्हबा धिनकुनु म्हिगदेदा परमेश्वरला बचनग्याम लोप्बारी छ्याइजी। ^{३२}येशूसे लोप्बा म्राङ्सी थेनीगदे उदेक तजी। तिगदा भिसम येशूसे अधिकार लसी म्हिगदेदा लोप्बा मुबा। * ^{३३}यहूदीगदे हुप तबा दिम न्हडरी म्हडसे स्याप्बा म्हि गिक मुबा। थे म्हडसे स्याप्बा म्हिसे क्रिड्बान, ^{३४}“नासरतला येशू, हाडसे डन्दा तिग लबारी छ्याइबा? तिग हाड डन्दा साइबारी फेप्खबा हिन्ना? हाड परमेश्वरसे पुडखबा परमेश्वरला म्हि भिसी डादा था मुला” भिसी भिजी।

^{३५}चुहड् भिबा थे:सी येशूसे थे म्हडदा बड्बान, “कुटिसी चिउ! थे म्हिग्याम थोन्सी निउ!” भिसी सुङ्मैछ्याम थे म्हिदा जम्मान म्हिला ओन्छाडरी लछार पछार लसी थोन्सी निजी, तर थे म्हिदा तिगै आतनी। ^{३६}चु म्राङ्सी जम्मान म्हिगदे उदेक म्हन्सी, “चु म्हिला बोली बचनरी खाहड्बा अधिकार चीम, थेला अधिकारदेन शक्तिसे कुलमैछ्याम म्हडगदे थोन्सी


याबा चीम!” भिसी भिजी। ^{३७}ओच्छे येशूसे लबा गे कफर्नहुम शहरला क्यारमारला जम्मान ग्लारी थे:जी।

येशूसे ल्हानान म्हिगदेदा खम्ना लबा

मत्ती ८:१४-१७; मर्कस १:२६-३४

^{३८}येशू यहूदीगदे हुप तबा दिमग्याम थोन्सी सिमोनना दिमरी फेप्जी। थेरी सिमोनना स्युमी छवा खसी आखम्बा मुबा। ओच्छे दिमरी मुबागदेसे “थेदा खम्ना लसी पिन्गो” भिसी बिन्ती लजी। ^{३९}जमाहेन्से येशू सिमोनना स्युमीला डामरी फेप्सी छवादा म्हासी निउ भिसी सुङ्मा थेला छवा म्हाजी। ओच्छे सिमोनना स्युमी तुरुन्तन रे:सी थेनीगदेदा क्योड्बारी छ्याइजी।

^{४०}ओच्छे धिनी घल्माहेन्से म्हिगदेसे ल्हानान थरीला रोगसे स्याप्बा म्हिगदेदा येशू मुबा ग्लारी भजी। जमाहेन्से येशूसे थेनीगदेथोरी हाडला या थान्सी थेनीगदे जम्मादान खम्ना लजी। ^{४१}जमाहेन्से ल्हानान म्हिगदेला लहुङ्ग्याम म्हडगदे चुहड् भिबान क्रिड्सी थोन्जी, “हाड परमेश्वरला भा हिन्ना।” तर येशूसे थे म्हडगदेदा बड्बान दो:सी तिगै ताम पाङ्आपुङ्नी। तिगदा भिसम येशू थाबा पिन्बा ख्रीष्ट हिन्ना भिसी थे म्हडगदेसे डोसेबा मुबा।



दोंगा (४:४४)

येशूसे परमेश्वरला यहुल्साला
समाचार थे:ना लबा

मर्कूस १:३५-३६

४२ स्थो तमाहेन्से येशू सुनसान ग्लारी फेप्जी। जमाहेन्से म्हेला हुलसे म्हाइबान येशू मुबा ग्लारी धोखजी। ओच्छे थेनीगदेसे येशूदा “डन्दा ख्लासी थाफेप्जो” भिसी रोकब लबारी म्हाइजी। ४३ तर येशूसे थेनीगदेदा “डाइ अर्गु ग्लागदेरी एनोन परमेश्वरला यहुल्साला समाचार थे:ना लतो:बा मुला। तिग्दा भिसम परमेश्वरसे डादा चुलान लागिरी पुइखबा हिन्ना” भिसी सुइजी। ४४ जमाहेन्से येशू यहूदियाला

यहूदीगदे हुप तबा दिमगदेरी फेप्सी
थार्बा पिन्बा समाचार थे:ना लजी।

येशूसे डाच्छा धम्बा चेलागदे

मत्ती ४:१८-२२; मर्कूस १:१६-२०;

यूहन्ना १:४०-४२

५ परमेश्वरला बचन ड्यान्बाला लागिरी ल्हानान म्हिगदे येशूला क्युर्सिन तोर हुइ मार हुइ लबान मुबा। थेतबासेलमा येशू गनेसरेत भिबा घ्योइला कुनीरी राप्सी धन्छ्याबा मुबा। २ ओच्छे येशूसे घ्योइला कुनीरी दोंगा न्ही म्राइजी। थे धुइरी माभीगदे दोंगा ख्लासी ह्राड ह्राडला घ्याड खुबान मुबा। ३ थेरी मुबा दोंगा गिक चा

सिमोनना मुबा। येशू सिमोनना दोंगारी क्रे:सी, “दोंगा जजाकी क्याथाड भोगों” भिसी सिमोनदा सुङ्जी। थे दोंगारी धन्छ्यासी म्हिगदेदा लोप्बारी छ्याइजी।*

५ लोप्सी जिन्माहेन्से येशूसे सिमोनदा “दोंगा नुप्बा ग्लारीक्यार भोगों, ओच्छे तार्डा चुङ्बारी घ्याड रोप्पो” भिसी सुङ्जी। ५ चु थे:सी सिमोनसे येशूदा “गुरु, डन्से म्हुन गिक घ्याड क्लाङ्सैनोन तार्डा गिकनोन आस्याप्नी। तर हाडसे कुल्बासे लमा डाइ घ्याड रोप्ला” भिसी भिजी।* ६ ओच्छे थेनीगदेसे घ्याड रोप्माहेन्से तार्डा ल्हानान स्याप्बासे लमा घ्याडनोन ठेबारी छ्याइजी।* ७ थेतबासेलमा थेनीगदेसे अर्गु दोंगारी मुबा हाडला होंगदेदा गुहार हीजी। जमाहेन्से थेनीगदे खसी तार्डा ते:बारी छ्याइजी। तार्डा ते:मा ते:मा दोंगा न्हीरीन तार्डा ल्हानान तबासे लमा दोंगा न्हीनोन डुबब तबारी छ्याइजी।

८ चु म्राङ्सी सिमोन पत्रुससे येशूला स्यहापरी फ्या लसी, “प्रभु, डा पापी म्हि हिन्ना। थेतबासेलमा हाड डा मुबाग्याम फेप्पो” भिसी भिजी। ९ तिग्दा भिसम ल्हानान तार्डा स्याप्बासे लमा सिमोनदेन थेला होंगदे उदेक तजी। १० ओच्छे सिमोनदेन छ्याम ठिक्सी गे लबा जब्दियाला भागदे याकूबदेन

यूहन्नादाएनोन ल्हानान उदेक तजी। जमाहेन्से येशूसे सिमोनदा “थालोङ्गो, दाहेन्से ए तार्डा चुङ्बा म्हि आहिन, तर एसे म्हिगदेदा परमेश्वर मुबा ग्लारी भला” भिसी सुङ्जी। ११ जमाहेन्से थेनीगदेसे दोंगा घ्योइला कुनीरी भसी हाडदेन छ्याम मुबा जम्मान स्हेगदे रूलासी येशूदेन छ्याम भजी।

येशूसे कोरे खबा म्हिदा खम्ना लबा

मत्ती ८:१-४; मार्कस १:४०-४५

१२ तिरिकुनु येशू शहर गिकरी मुबा। ओच्छे थेनोन शहररी मुबा कोरे खबा म्हि गिकसे येशूदा म्राङ्जी। जमाहेन्से थे येशूला डामरी खसी फ्या लबान, “प्रभु, हाडला सेम मुसम हाडसे डादा खम्ना लखम्ला” भिसी भिमा, १३ येशूसे थेदा हाडला छ्यासे थुर्सी, “ए खम्मौ भिबा डाला सेम मुला, ए खम्मो” भिसी सुङ्मैछ्याम थेला कोरे म्हाजी। १४ जमाहेन्से येशूसे थेदा “च्यागो, एसे चु ताम खालैदा थापाङ्गो! बरु ए निसी परमेश्वरला मन्दिररी पूजा लबा म्हिदा उन्नो। ओच्छे एला कोरे म्हाजी भिसी म्हिगदेसे था याङ्बाला लागिरी परमेश्वरसे मोशादा पिन्बा ठिमसे कुल्बा अन्छार बलि फुल्गो” भिसी कुल्जी।*

१५ जमाकुनुहेन्से भन जम्मान ग्लारी येशूसे लबा गेला बारेरी थे:जी।

५:१-३ मत्ती १३:१-२; मार्क ३:६-१०; ४:१ ५:५ यूह २१:३ ५:६ यूह २१:६

५:१४ लेवी १४:१-३२

थेतबासेलमा म्हिगदे येशूला ताम
इयान्बारीदेन हाडला रोग म्हागै भिसी
येशू मुबा ग्लारी खजी। ^{१६}तर येशू चा
सुनसान ग्लारी फेप्सी प्रार्थना लबा
मुबा।

येशूसे कुज्या म्हिदा खम्ना लबा

मती ६:१-८; मर्कस २:१-१२

^{१७}तिरेकुनु येशूसे म्हिगदेदा लोप्बान
लबा धुइरी गालील अञ्चलदेन
यहूदिया अञ्चलला नाम्सा नाम्सा-
ग्यामसे ओच्छे यरूशलेमग्याम खबा
फरिसीगदेदेन यहूदी धर्मगुरुगदेएनोन
थेरी मुबा। येशूदेन छ्याम आखम्बा
म्हिगदेदा खम्ना लबा परमप्रभुला
शक्ति मुबा। ^{१८}थेनोन धुइरी म्हिगदेसे
कुज्या म्हि गिकदा खाटरीन पुइसी
भजी। ओच्छे थेनीगदेसे थे कुज्या
म्हिदा दिम न्हडरी येशूला डाच्छापट्टि
भोर्बारी म्हाइजी। ^{१९}तर म्हिला हुलसे
लमा थेनीगदेसे थे कुज्या म्हिदा येशूला
डाच्छापट्टि भोर्बाला लागिरी ग्याम
आयाइनी। थेतबासेलमा थेनीगदेसे
थे कुज्या म्हिदा मडग्यारग्यामसे
छानारी भोर्जी। ओच्छे छाना होक्सी
थेदा तीबा नान्बादेन छ्यामनोन
येशूला डाच्छापट्टि धोना लजी। ^{२०}थे
म्हिगदेला विश्वास म्हाइसी येशूसे
थे कुज्या म्हिदा “डाइ एला पापला
दोष मेटब लबा मुला” भिसी सुइजी।
^{२१}येशूसे चुहइ सुइबा म्हाइसी यहूदी
धर्मगुरुगदेदेन फरिसीगदेसे “हाडसे
हाडदान परमेश्वर स्होसी ताम लबा

चु म्हि खाल हिन्ना? म्हिगदेला
पापला दोष मी परमेश्वरसे जे मेटब
लखम्मुला” भिसी हाड हाड न्हडरी
पाइबारी छ्याइजी।

^{२२}येशूसे थेनीगदेला सेमला ताम
था याइसी चुहइ भिसी सुइजी,
“एनीगदेला सेमरी तिगदा चुहइबा
म्हन्बा? ^{२३}चु कुज्या म्हिदा ‘एला पाप
माफ तबा मुला’ भिबादेन ‘रे:सी भ्रउ’
भिबारी खजिबा चा सजिलो मुला?
^{२४}तर च्यागो, परमेश्वरसे पुइखबा
म्हिदा चु जम्बुलिडरी म्हिगदेला
पापला दोष मेटब लबा अधिकार मुला
भिबा तामला प्रमाण डाइ एनीगदेदा
उन्ना।” जमाहेन्से येशूसे थे कुज्या
म्हिदा “ए रे:गो, ओच्छे एला तीबा
नान्बा पुइसी दिमरी निउ।” ^{२५}येशूसे
थेहइ सुइमैछ्याम थे कुज्या म्हि डोड
रे:सी हाडला तीबा नान्बा पुइसी
परमेश्वरला जयजयकार लबान दिमरी
निजी। ^{२६}जमाहेन्से थेरी मुबा जम्मान
म्हिगदे लोइसी उदेक म्हन्जी। ओच्छे
परमेश्वरला जयजयकार लबान,
“तिनी यहाडसे ल्हानान उदेकला गे
म्हाइजी” भिसी भिजी।

येशूसे लेवीदा इयोइबा

मती ९:९-१३; मर्कस २:१३-१७

^{२७}थेग्याम फेप्बान लबा धुइरी येशूसे
लेवी भिबा तिरो दुइबा म्हिदा तिरो
दुइबा ग्लारी चिबान लबा म्हाइजी।
ओच्छे येशूसे थेदा “डादेन छ्याम
भ्रउ” भिसी सुइजी। ^{२८}जमाहेन्से

लेवीसे जम्मान स्हे ख्लासी रे:जी ओच्छे येशूदेन छ्याम भ्रजी।

२६ ओच्छे लेवीसे येशूदा हाडला दिमरी भोज सोल्बारी ड्योइजी। थेरी येशूदेन छ्याम भोज चबारी चिबा म्हिगदे न्हडरी तिरो दुइबा म्हिगदेदेन ल्हानान स्थान्दो म्हिगदेएनोन मुबा।

३० जमाहेन्से फरिसीगदेदेन थेनीगदेला धर्मगुरुगदेसे येशूला चेलागदेदा बिरोध लबान, “तिगदा एनीगदे तिरो दुइबा म्हिगदे ओच्छे स्थान्दो पापीगदेदेन छ्याम चिसी चबा थुड्बा लबा?” भिसी ड्योइमा,* ३१ येशूसे थेनीगदेदा “खम्बा म्हिदा डाक्टर आतो:, तर आखम्बा म्हिदा जे डाक्टर तो:ला! ३२ थेतबासेलमा परमेश्वरला डाच्छा ज्यबा मुबा म्हिगदेदा आहिन, तर डनी पापी हिन्ना भिसी भ्रबा म्हिगदेसे हाडला पाप ख्लासी परमेश्वरपट्टि दो:गै भिसी ड्योइबारी डा खबा हिन्ना” भिसी सुड्जी।

येशूसे फोइथान चिसी प्रार्थना लबाला लागिरी लोप्बा

मत्ती ६:१४-१७; मर्कूस २:१८-२२

३३ जमाहेन्से थेनीगदेसे येशूदा “यूहन्नाला चेलागदे सदन फोइथान चिसी प्रार्थना लमुला। ओच्छे फरिसीगदेला चेलागदेसेनोन थेहड्णोन लमुला। तर हाडला चेलागदेसे चा तिगदा फोइथान चिसी प्रार्थना

आलबा?” भिसी ड्योइमा, ३४ येशूसे थेनीगदेदा “म्हाछार जन्तीगदेदेन छ्याम मुतेधोना थेनीगदेदा खाहड् लसी फोइथान चिउ भिखम्ला? ३५ तर म्हाछार थेनीगदेग्याम फेसी भोर्बा धुइरी जे थेनीगदे फोइथान चिला” भिसी सुड्जी।

३६ ओच्छे येशूसे थेनीगदेदा उखान गिकएनोन सुड्बान, “खालै म्हिसे बोक्टो क्वानरी छार क्वानगेन्से आख्या। थेहड् लसी ख्याजी भिसम छार क्वानएनोन न्होड्ला ओच्छे छार क्वानगेन बोक्टो क्वानदेन छ्याम ढिकएनोन आढिक। ३७ ओच्छे खालै म्हिसे ढिला बोक्टो ताडरी अडगुरला कलिलो निडगु आयु, युजी भिसम कलिलो निडगुसे ढिला बोक्टो ताड भोसी ढेला। जमाहेन्से निडगु डेला ओच्छे ढिला ताडएनोन गे आखेल्बा तला। ३८ थेतबासेलमा कलिलो निडगु छार ढिला ताडरी युसी थान्तो:बा मुला। ३९ खालैसे चिप्बा निडगु थुड्सी कलिलो निडगु थुड्बा सेम आल, तिगदा भिसम थेसे चिप्बा निडगुन ज्यबा भिला।”

येशू बल्ल्बा न्हबा धिननाएनोन प्रभु हिन्ना

मत्ती १२:१-८; मर्कूस २:२३-२८

६ बल्ल्बा न्हबा धिनकुनु येशू बुग्याम फेप्बान मुबा। थे धुइरी


थेला चेलागदेसे ग्वाला नम थुसी यारी न्हइसी चबारी छ्याइजी।*
 २तर फरिसीगदे न्हडरी कोइ कोइसे “थेनीगदेदा ब्लप्बा न्हबा धिनकुनु लबारी आतबा गे एनीगदेसे तिगदा लबा?” भिसी भिमा, ३येशूसे थेनीगदेदा चुहङ् भिसी सुङ्जी, “एनीगदेसे परमेश्वरला बचन पढब लबा आरे? दाऊदसे थेदेन छ्याम मुबागदे फोखेन्बा धुइरी थेसे तिग लजी?”* ४थेसे परमेश्वरला मन्दिररी पूजा लबा म्हिगदे बाहेक स्थान्दोसे चबारी आतबा गेड परमेश्वरला दिमरी वाङ्सी ते:सी चजी। ओच्छे थेसे ह्वाङ्देन छ्याम मुबागदेदा एनोन पिन्मा खालैसेन तिगै भिजी?”*

५जमाहेन्से येशूसे थेनीगदेदा “परमेश्वरसे पुइखबा म्हि ब्लप्बा न्हबा धिनना प्रभु हिन्ना” भिसी सुङ्जी।

येशूसे या खर्बा म्हिला या खम्ना लबा

मत्ती १२:६-१४; मर्कुस ३:१-६

६ब्लप्बा न्हबा अर्गु धिनकुनु येशूसे यहूदीगदे हुप तबा दिम न्हडरी परमेश्वरला यहुल्साला बारेरी लोप्बारी छ्याइजी। थेरी दाहिने या खर्बा म्हि गिक मुबा। ७ब्लप्बा न्हबा धिनकुनु येशूसे थे म्हिला खर्बा या खम्ना लला वा भिसी यहूदी धर्मगुरुगदेदेन



ढिला ताड (५:३६)

फरिसीगदेसे दोष लबाला लागिरी चिवा लसी चिबा मुबा। ८तर येशूसे थेनीगदेला सेमला ताम था याङ्सी थे या खर्बा मुबा म्हिदा “ए रे:सी चुरी राप्गो” भिसी सुङ्जी। ओच्छे थे म्हि राप्जी। ९जमाहेन्से येशूसे थेनीगदेदा “थेहङ् भिसम चु तामला जोहाब पिन्गो, ब्लप्बा न्हबा धिनकुनु ज्यबा लबादेन नइबा लबा, अथवा म्हि सोना लबादेन सिना लबा खजिबा चा ज्यबा हिन्ना” भिसी सुङ्जी। १०ओच्छे येशूसे ह्वाङ्ला क्युर्सीन मुबा म्हिगदेदा स्हीसी थे या खर्बा मुबा म्हिदा “एला या तन्गब लउ!” भिसी सुङ्जी। ओच्छे थेसे या तन्गब लमैछ्याम थेला या खम्जी। ११चु म्हाङ्सी फरिसीगदेदा बोमो रे:सी दाहेन्से येशूदा तिग लबा भिसी ह्वाङ् ह्वाङ् न्हडरी सल्लाह लजी।

येशूसे च्युक न्ही चेलागदेदा धम्बा

मत्ती १०:१-४; मर्कुस ३:१३-१६

१२तिरेकुनु येशू गडरी फेप्सी म्हुन गिकनोन परमेश्वरदेन छ्याम प्रार्थना

लजी। १३ ओच्छे स्यहो तमाहेन्से
 येशूसे हाडला चेलागदेदा ड्योइसी
 थेनीगदे न्हडरी च्युक न्ही चेलादा
 धम्जी। ओच्छे थेनीगदेदा मुल चेला
 भिसी मिन थान्जी। १४ सिमोनदा
 येशूसे पत्रुस भिसी सुड्जी, थेला
 आले अन्द्रियास ओच्छे याकूब,
 यूहन्ना, फिलिप, बारथोलोमाइ,
 १५ मत्ती, थोमा, अल्फयसला भा
 याकूब ओच्छे सिमोन। चु सिमोनदा
 हाडला यहूल्सादा माया लबा म्हि
 भिसी भिमुबा। १६ ओच्छे याकूबला
 भा यहूदा, ओच्छे यहूदा इस्करियोत
 चुनोन यहूदा इस्करियोतसे लिच्छा
 येशूदा चुड्सी म्हिगदेला यारी जिम्मा
 पिन्जी।

येशूसे ल्हानान म्हिगदेदा खम्ना लबा

मत्ती ४:२३-२५; मार्कस ३:७-१२

१७ येशू हाडसे धम्बा चेलागदेदेन
 छ्याम गडग्याम मार फाप्सी सम्म
 ग्लारी फेप्खसी राप्सी धन्छ्याजी।
 जमाहेन्से येशूदेन छ्याम भ्रबा म्हिला
 हुल ओच्छे यहूदिया अञ्चलला
 जम्मान ग्लादेन यरूशलेम, ओच्छे
 टुरोसदेन सीदोन भिबा ग्लाग्याम
 म्हिला हुल १८ येशूसे लोप्बा ताम
 ड्यान्बारी ओच्छे हाड हाडला
 रोगगदे म्हाना लबारी खजी। थेरी

म्हडसे स्याप्सी आखम्बा म्हिगदेएनोन
 खम्जी। १९ थेतबासेलमा जम्मान
 म्हिगदेसे येशूदा थुर्बारी म्हाइमुबा।
 तिगदा भिसम येशूदेन छ्याम म्हिगदेदा
 खम्ना लबा शक्ति मुबा। थे शक्तिग्याम
 रोगसे स्याप्बा जम्मान म्हिगदे खम्जी।

दुखदेन सुख

मत्ती ५:१-१२

२० जमाहेन्से येशूसे हाडला
 चेलागदेदा स्हीबान चुहड् भिसी
 सुड्जी,

“दुख याड्बा म्हिगदे†, एनीगदेसे
 परमेश्वरग्याम मोलम याड्ला।

तिगदा भिसम परमेश्वरला यहूल्सा
 एनीगदेलान हिन्ना।

२१ फोखेन्बा म्हिगदे, एनीगदेसे
 परमेश्वरग्याम मोलम याड्ला।

तिगदा भिसम एनीगदेदा ग्रेन्ना
 लला।

ओच्छे क्राबा म्हिगदे, एनीगदेसे
 परमेश्वरग्याम मोलम याड्ला।

तिगदा भिसम एनीगदे ताड्सी
 डे:म्याड्ला।

२२ “परमेश्वरसे पुइखबा म्हिदा
 विश्वास लबासे लमा म्हिगदेसे
 एनीगदेदा हेला लसी नाम्साग्यामसे
 ते:ला ओच्छे जम्मासेन एनीगदेदा
 खिसी लमाएनोन एनीगदेसे परमेश्वर-
 ग्याम मोलम याड्ला।* ”

६:२० “दुख याड्बा म्हिगदे” भिबा तामदा ग्रीक बाइबलरी प्राडबोगदे भिसी भ्रिबा मुला।

६:२२ १ पत्रु ४:१४

२३ “थे धुइरी एनीगदे फुरफुर ताङ्गो।
तिग्दा भिसम स्वर्गरी एनीगदेसे
घेन इनाम याङ्गला। एनीगदेदा दुख
पिन्बागदेला आखे म्हेमेगदेसेनोन
अगमवक्तागदेदा चुहङ्गनोन लमुबा।”*

२४ फ्युक्पोगदे, एनीगदेसे

परमेश्वरग्याम सजाय याङ्गला।

तिग्दा भिसम एनीगदेसे मोजमजा
लसी जिन्बा मुला।

२५ मेन्बागदे, एनीगदे फोइथाननोन
चितोःला।

तिग्दा भिसम एनीगदेसे

परमेश्वरग्याम सजाय याङ्गला।

ओच्छे ताङ्गबागदे दुख नासी
क्रासी चितोःला।

तिग्दा भिसम एनीगदेसे

परमेश्वरग्याम सजाय याङ्गला।

२६ म्हेगदेग्याम मान याङ्गबागदे,
एनीगदेसे परमेश्वरग्याम
सजाय याङ्गला।

तिग्दा भिसम एनीगदेला

आखे म्हेमेगदेसेनोन फट्टा
अगमवक्तागदेदा चुहङ्गनोन
लमुबा।

येशूसे शत्रुदाएनोन माया लतोःला
भिसी लोप्बा

मत्ती ५:३८-४८; ७:१२

२७ “तर डाइ लोप्बा ताम
ड्यान्बागदेदा डाइ भिला, एनीगदेसे
हाङ्गला शत्रुगदेदा माया लउ, ओच्छे

हाङ्गदा हेला लबागदेदा ज्यबा व्यवहार
लउ। २८ एनीगदेदा केःबागदेदा
परमेश्वरसे मोलम पिन्गै भिसी प्रार्थना
लउ। ओच्छे खालैसे एनीगदेदा
आज्यबा लजी भिसम थेनीगदेदा
ज्यबा तगै भिसी परमेश्वरदेन छ्याम
प्रार्थना लउ। २९ खालैसे एदा ग्रम्बा
गिकरी तोजी भिसम अर्गुपट्टिला
ग्रम्बाएनोन तासी पिन्गो। ओच्छे
एला स्कोट भोर्बारी छ्याइबादा
स्हुर्दमदाएनोन पिन्गो। ३० एदेन छ्याम
हीबागदेदा पिन्गो, ओच्छे एसे थेदेन
छ्याम दोःसी थाह्नीगो। ३१ एनीगदेदा
स्थहान्दो म्हेगदेसे जस्तो व्यवहार
लगै भिसी म्हेन्बा मुला, एनीगदेसेनोन
स्थहान्दो गदेदा थेहङ्गनोन लउ।”*

३२ “चुदे एनीगदेदा माया लबादा जे
एनीगदेसे माया लजी भिसम एनीगदेदा
तिग ज्यबा तला? तिग्दा भिसम
पापीगदेसेनोन हाङ्गदा माया लबागदेदा
माया लमुला। ३३ ओच्छे एनीगदेसे
हाङ्गदा ज्यबा लबादा जे ज्यबा
लजी भिसम एनीगदेदा तिग ज्यबा
तला? तिग्दा भिसम पापीगदेसेनोन
थेहङ्गनोन लमुला। ३४ चुदे एनीगदेसे
दोःसी याङ्गबा सेम लसी खालैदा छे
पिन्जी भिसम एनीगदेदा तिग ज्यबा
तला? तिग्दा भिसम पापीगदेसे जे
जति छे पिन्बा मुला ओतेन किन्बा
आश लसी पापीगदेदान छे पिन्बा
मुला। ३५ तर हाङ्गला शत्रुगदेदा माया

लउ, जम्मादान ज्यबा लउ, दोःसी किन्बा सेम लसी छे थापिन्गो ओच्छे एनीगदेला मान घेन तला। एनीगदे स्वर्गरी धन्छ्याबा जम्मान भन्दा घेन परमेश्वरला सन्तान तला। तिगदा भिसम परमेश्वरसे बैगुनीदेन हाडला जे ग्याम च्याबा म्हिगदेदाएनोन दया लमुला। ३६थेतबासेलमा एनीगदेला परमेश्वर आबासे दया लबा हङ् एनीगदेसेनोन दया लउ।

स्थहान्दोदा दोष थालउ

मत्ती ७:१-५

३७“स्थहान्दोदा दोष लसी थाभ्रउ ओच्छे परमेश्वरसेनोन एनीगदेदा दोष आल। म्हिगदेला निसाफ लसी थाभ्रउ ओच्छे परमेश्वरसेनोन एनीगदेला निसाफ आल। म्हिगदेदा माफ पिन्गो ओच्छे परमेश्वरसेनोन एनीगदेदा माफ पिन्ना। ३८म्हिगदेदा पिन्गो ओच्छे परमेश्वरसेनोन एनीगदेदा पिन्ना। परमेश्वरसे मी छुइसी छुइसी पिन्ना ओच्छे जुन दप्बा स्हेसे एनीगदेसे स्थहान्दोगदेदा पिन्ना, थेनोन दप्बा स्हेसे एनीगदेसे याङ्ला।”

३९येशूसे थेनीगदेदा उखानग्याम चुहङ् भिसी सुङ्जी, “तिग मी आम्राङ्बा म्हिसे मी आम्राङ्बा

म्हिदान डोज्याब लखम्ला? चुदे थेसे डोज्याब लजी भिसम थे न्हीनोन व्हाडरी ताइला।* ४०ओच्छे खजिबै चेला हाडला गुरु भन्दा घेन आत, तर थेसे लोप्सी जिन्माहेन्से गुरु हङ्बान तला।*

४१“स्थहान्दोला गोरी से: भ्रबा म्हाङ्बासे हाडला गोरी मुइ भ्रबा तिगदा आम्राङ्बा? ४२हाडला गोरी भ्रबा मुइ आम्राङ्बासे खाहङ् लसी आलेदा ‘खाइ, एला गोला से: ते:सी पिन्ना भिसी भिखम्ला।’† कप्टी, डाच्छा हाडला गोला मुइ ते:गो, ओच्छे जे एसे आलेला गोरी भ्रबा से: ते:बारी खम्ला।

ज्यबा दोडला रोदेन आज्यबा दोडला रो

मत्ती ७:१६-२०; १२:३३-३५

४३“ज्यबा दोडरी आज्यबा रो आरो ओच्छे आज्यबा दोडरी ज्यबा रो आरो। ४४जम्मान दोड थेरी रोबा रो अन्छार डोसेला। पुजुला दोडग्याम अञ्जीर आथु ओच्छे पोलाडला दोडग्यामएनोन अङ्गुर आथु।* ४५तिगदा भिसम ज्यबा सेम मुबा म्हिला सेम न्हङ्ग्याम ज्यबान ताम थोन्मुला ओच्छे नइबा सेम मुबा म्हिला सेम न्हङ्ग्याम नइबान ताम थोन्मुला।

६:४१-४२ “हाडला गोरी मुइ भ्रबा भिबादेन आलेला गोरी मुबा से:” भिबा तामदा ग्रीक बाइबलरी “हाडला मीरी मुबा मूढादा वास्ता आलना हाडला आलेला मीरी मुबा धुलु ते:सी पिन्ना” भिसी भ्रिबा मुला।

६:३६ मत्ती १५:१४ ६:४० मत्ती १०:२४-२५; यूह १३:१६; १५:२० ६:४४ मत्ती १२:३३

थेतबासेलमा म्हिला सेम न्हडरी जे मुला थेनोन थेला सुङग्याम पाङ्ला।*

बुद्धि मुबा म्हिदेन मूर्ख म्हिसे स्होबा दिम

मती ७:२४-२७

४६ “डाइ कुल्बा ताम आङ्यान्सम तिग्दा डादा ‘प्रभु, प्रभु’ जे भिबा? ४७ डा मुबा ग्लारी खबा म्हिसे डाइ पाङ्बा ताम ड्यान्ना ओच्छे डाइ कुल्बा अन्छार गे लला। थे खाह्ङ्बा म्हि हिन्ना भिबा ताम डाइ एनीगदेदा पाङ्ला। थे म्हिसे ४८ हाडला दिम स्होबा धुइरी जग नुप्ना ख्वसी स्होजी। ओच्छे नाम, भाल खमा थे दिमरी टजी। तसैनोन थे दिम आफुप्नी, तिग्दा भिसम थे दिमला जग नुप्ना ख्वसी स्होबा मुबा। ४९ तर जुन म्हिसे डाइ पाङ्बा ताम थे:सी थे अन्छार गे आल थे म्हि चा जग नुप्ना आख्वना दिम स्होबा म्हि हङ्बा हिन्ना। थेतबासेलमा नाम, भाल बाढी खबा धुइरी थे दिमरी टसी थे दिम फुप्सी ल्हानान नोक्सान तजी।”

येशूसे कप्तानला नोकरदा खम्ना लबा

मती ८:५-१३

७ चुहङ् सुङ्सी जिन्माहेन्से येशू कफर्नहुम भिबा ग्लारी फेप्जी। २ थेरी रोमी कप्तान गिकला नोकर आखम्ना सिबारीन छ्याइबा मुबा।

थेसे थे नोकरदा ल्हानान माया लमुबा। ३ थेतबासेलमा थेसे हाडला नोकरदा खम्ना लगै भिसी येशूदा फेप्खउ भिसी ड्योइबाला लागिरी यहूदी गन्बागदेदा पुइजी। तिग्दा भिसम थेसे येशूला बारेरी थे:बा मुबा। ४ जमाहेन्से थेनीगदे येशू मुबा ग्लारी खसी बिन्ती लबान, “थे हाडला दया याङ्तो:बा खाल्ला म्हि हिन्ना। ५ तिग्दा भिसम थेसे यहाड यहूदी यहूलदा माया लमुला, ओच्छे थेसेन यहूदीगदे हुप तबा दिम स्होसी पिन्बा हिन्ना” भिसी भिजी।

६ जमाहेन्से येशू थेनीगदेदेन छ्याम फेप्जी। येशू कप्तानला दिम डामरी धोमा, कप्तानसे हाडला होगदेदा चुहङ् भिउ भिसी येशू मुबा ग्लारी पुइजी, “प्रभु हाडसे दुख थालउ। तिग्दा भिसम हाड डाला दिमरी फेप्खबाधोनाला डा आरे। ७ डाएनोन हाड मुबा ग्लारी खबाधोनाला आम्हन्नी। थेतबासेलमा हाडसे डाला नोकर खम्नौ भिसी सुङ् जे सुङ्सैनोन थे खम्ला। ८ तिग्दा भिसम डाएनोन डाला हाकिमला तहरी चिबा म्हि हिन्ना। डाला तहरीनोन सिपाहीगदे मुला। डाइ कोइदा निउ भिमा निमुला, कोइदा खउ भिमा खमुला। ओच्छे डाला नोकरदा डाइ चुहङ् लउ भिमा थेसे थेहङ्गनोन लमुला” भिसी भिजी।

९ थेला चुहङ्बा ताम थे:सी येशू उदेक तजी, ओच्छे म्हिला हुलपट्टि

दोःसी, “एनीगदेसे डाला ताम ड्यान्गो, इस्राएल यहूल्साला म्हिगदे न्हडरीनोन डाइ चुहड्बा घेन विश्वास मुबा म्हि आस्याप्नी” भिसी सुड्जी।
 १० जमाहेन्से कप्तानसे येशू मुबा ग्लारी पुड्बा म्हिगदे दोःसी दिमरी निमा, थे नोकर खम्सी जिन्बा म्राड्जी।

येशूसे हेम्बो सिबा म्रिडम्हेमेला भादा सिबाग्याम सोना लबा

११ न्हडगरदड येशू नाइन भिबा शहररी फेप्मा हाडला चेलागदेदेन म्हिला हुलएनोन येशूदेन छ्याम निजी।
 १२ ओच्छे येशू शहररी धोबारीन छ्याइमा सिबा म्हि भबान मुबा। थे सिबा म्हि हेम्बो सिबा म्रिडम्हेमेला गिक जेन भा मुबा। ओच्छे शहरला म्हिगदेएनोन थेदेन छ्याम मुबा। १३ थे म्रिडम्हेमेदा म्राड्सी प्रभुदा सेमहेन्सेन दया रेःजी। ओच्छे थेदा “ए थाक्रागो” भिसी सुड्जी। १४ जमाहेन्से येशू सिबाला डामरी फेप्सी सिबादा थुर्जी। चुहड् लसी थुमैछ्याम सिबा पुड्बा म्हिगदे थेन तजी। जमाहेन्से येशूसे सिबा म्हिदा “कोला, रेःगो” भिसी सुड्जी। १५ जमाहेन्से सिबा म्हि रेःसी ताम पाड्बारी छ्याइजी। ओच्छे येशूसे थेदा थेला आमादा जिम्मा पिन्जी।

१६ चु म्राड्सी जम्मान म्हिगदे लोड्सी परमेश्वरदा जयजयकार लबान चुहड् भिजी, “य्हाडला गुडरी घेन अगमवक्ता गिक फेप्खबा मुला। ओच्छे परमेश्वरसे हाडला म्हिदा

दया लबा मुला।” १७ जमाहेन्से येशूसे लबा गेला बारेरी यहूदियाला जम्मान ग्लारीदेन डाम डामला जम्मान जिल्लारी थेःजी।

बप्तिस्मा पिन्बा यूहन्नासे हाडला चेला न्हीदा येशू मुबा ग्लारी पुड्बा

मत्ती ११:२-१६

१८ यूहन्नाला चेलागदेसे येशूसे लबा जम्मान गे हाडला गुरु यूहन्नादा पाड्जी। जमाहेन्से यूहन्नासे हाडला चेला न्हीदा ड्योइसी, १९ “डन्से फेप्खला भिसी आश लसी चिबा थार्बा पिन्बा ग्ले हाडनोन हिन्ना कि स्थान्दो खालैदा भ्रान्तोःबा हिन्ना?” भिसी येशू मुबा ग्लारी ड्योइबारी पुड्जी। २० जमाहेन्से थेनीगदे येशू मुबा ग्लारी निसी, “डन्से फेप्खला भिसी आश लसी चिबा थार्बा पिन्बा ग्ले हाडनोन हिन्ना कि स्थान्दो खालैदा भ्रान्तोःबा हिन्ना?” भिसी ड्योइबारी बप्तिस्मा पिन्बा यूहन्नासे डन्दा हाड मुबा ग्लारी पुड्खबा हिन्ना भिसी भिजी।

२१ थे धुडरी येशूसे रोगसे स्याप्बा ल्हानान म्हिगदेदेन म्हडसे स्याप्बा म्हिगदेदा खम्ना लबान मुबा। ओच्छे मी आम्राड्बा ल्हानान म्हिगदेला मी म्राड्ना लजी। २२ जमाहेन्से यूहन्नाला चेलागदेदा येशूसे चुहड् भिसी सुड्जी, “एनीगदेसे जुन जुन ताम म्राड्बादेन थेःबा मुला, थेनोन ताम यूहन्ना मुबा ग्लारी निसी पाड्गो। मी आम्राड्बागदेला मी म्राड्ना लबा मुला,

कुज्यादेन कोरे खबा म्हिगदेदा खम्ना लबा मुला, नाब्यड आथे:बागदेदा थे:ना लबा मुला, सिबागदेदा सोना लबा मुला, ओच्छे प्राडबोगदेदा परमेश्वरला यहुल्साला समाचार थे:ना लबान मुला।* २३ जुन म्हिसे शङ्का आलना विश्वास लला थे म्हिसे परमेश्वरग्याम मोलम याड्ला।”

२४ यूहन्नाला चेलागदे दो:सी निमाहेन्से येशूसे यूहन्नाला बारेरी म्हिला हुलदा चुहङ् भिसी सुङ्बारी छ्याइजी, “एनीगदे तोडतोडबा ग्लारी तिग च्याबारी निबा मुबा? तिग लाबासे य्होङ्बा मा दोड च्याबारी निबा हिन्ना? २५ ओच्छे एनीगदे तिग च्याबारी थोन्बा मुबा? ज्यबा ज्यबा क्वान क्वान्बा म्हिदा च्याबारी? च्यागो, थेहङ्बा ज्यबा ज्यबा क्वान क्वान्बादेन मोजमजा लबा म्हि मी ग्लेखाडरी जे चिबा मुला। २६ एनीगदे तिग च्याबारी निमुबा? तिग अगमवक्तादा च्याबारी निबा आहिन? हिन्ना, डाइ पाङ्ला एनीगदेसे स्थान्दो अगमवक्तागदे भन्दा घेन म्हि गिकदा म्हाङ्बा मुला। २७ थे अगमवक्ता थेनोन हिन्ना, थेला बारेरी परमेश्वरला बचनरी चुहङ्बा भिबा मुला,

‘च्यागो, डाइ डाला समाचार भोर्बा म्हिदा एला डाच्छा डाच्छा पुइखला।
थेसे एला लागिरी ग्याम स्होला’।*

२८ “थेतबासेलमा च्यागो, दान्देधोना न्हबा कोलागदे न्हडरी यूहन्ना भन्दा घेन म्हि खालै आरे। तसैनोन परमेश्वरला यहुल्सारी जुन म्हि जजा मुला थे म्हि यूहन्ना भन्दा घेन म्हि तला।”

२९ ओच्छे तिरो दुइबा म्हिगदेदेन स्थान्दो म्हिगदेसे यूहन्नाला ताम थे:सी, “परमेश्वरसे कुल्बा ताम ठीक हिन्ना” भिसी थेग्याम बप्तिस्मा किन्बा मुबा।* ३० तर फरिसीगदेदेन यहूदी धर्मगुरुगदेसे चा परमेश्वरसे कुल्बा ताम गे आखेलबा ताम हिन्ना भिसी यूहन्नाग्याम बप्तिस्मा आकिन्बा मुबा। ३१ येशूसे थेनीगदेदा चुहङ् भिसी सुङ्जी, “थेहङ्बा म्हिगदेदा डाइ तिगदेन छ्याम दाँजब लसे? थेनीगदे खाहङ्बा मुला भिसम, ३२ बजाररी चिबा कोलागदे हङ्बा मुला। थेनीगदे हाड हाड न्हडरी चुहङ् भिसी कल लमुला,

‘डन्से एनीगदेला लागिरी बाँसुरी
हाप्सी पिन्जी, तर एनीगदे
आस्थनी।

ओच्छे डन्से दुखला व्हाइ गोजी,
तर एनीगदे आक्रानी?’

३३ तिगै चबा थुङ्बादेन अडगुरला निडगुएनोन आथुङ्बा बप्तिस्मा पिन्बा यूहन्ना खमा एनीगदेसे ‘थेदा म्हडसे स्याप्बा म्हि’ भिसी भिबा मुबा। ३४ परमेश्वरसे पुइखबा म्हि चा

चबा थुङ्बा लसी भ्रजी। थेतबासेलमा म्हिगदेसे डादा ‘च्यागो, ल्हानान चबा स्हेदेन ल्हानान निङ्गु कासी ड्य्होइसी भ्रबा, तिरो दुइबादेन पापीगदेला ह्यो’ भिसी भिमुला। ३५ तर परमेश्वरग्याम बुद्धि याङ्बागदेसे जे परमेश्वरला बुद्धि ठीक हिन्ना भिसी था याङ्बा मुला।”

येशू फरिसीला दिमरी फेप्बा

३६ फरिसीगदे न्हडला गिकसे येशूदा सोल छ्योइबारी ड्योइजी। ओच्छे थेला दिमरी फेप्सी येशू सोल छ्योइबारी धन्छ्याजी। ३७ थे शहररी मुबा पापी म्रिडम्हेमे गिकसे फरिसीला दिमरी येशू सोल छ्योइबारी फेप्खजी भिबा थे:सी सिङ्गमरमरला बोटलरी अत्तर भसी येशू मुबा ग्लारी खजी।* ३८ थे येशूला ग्यापग्याम खसी येशूला डामरी राप्सी क्राजी, ओच्छे थेला मीरुलीसे येशूला स्थहाप भम्जी। जमाहेन्से थेसे हाडला क्रासे येशूला स्थहाप फ्यासी च्योक लसी† येशूला स्थहापरी अत्तर फोर्बारी छ्याइजी। ३९ चुहङ्ग लबा म्राङ्सी येशूदा ड्योइबा फरिसीसे “चु म्हि अगमवक्ता हिन्सम थेदा थुर्बा म्रिडम्हेमे खाहङ्गबा म्रिडम्हेमे भिसी डोसेसेला मुबा। तिगदा भिसम चु पापीस्या हिन्ना” भिसी हाडला सेम न्हडरी म्हन्जी।

४० थेसे सेमरी चुहङ्गबा ताम म्हन्बा था याङ्सी येशूसे फरिसीदा “सिमोन डाइ एदा ताम गिक पाङ्तो:बा मुला” भिसी सुङ्मा, थेसे “सुङ्गो गुरु” भिसी भिजी। ४१ “च्यागो, म्हि न्हीसे साहू गिकदेन छ्याम छे किन्बा मुबा गिकसे ग्यार्जा डा ओच्छे स्थहान्दोसे बोगल न्हीसे च्युइ टाङ्गा किन्बा मुबा। ४२ थे न्हीसेन छे फाआखम्बासे लमा साहूसे थे न्हीदान माफ पिन्जी। थेतबासेलमा, लु, पाङ्गो थे न्ही न्हडरी खजिबासे चा साहूदा ल्हाना माया लला” भिसी ड्योइमा, ४३ “ल्हाना माफ याङ्बासे” भिसी सिमोनसे भिमा, “एसे ठीक भिजी” भिसी येशूसे थेदा सुङ्जी।

४४ ओच्छे थे म्रिडम्हेमेपट्टि दो:सी येशूसे सिमोनदा चुहङ्ग सुङ्जी, “चुदा च्यागो, डा एला दिमरी खमा एसे डादा काङ्ग खुबारी क्युइएनोन आपिन्नी तर चुसे मी डाला काङ्ग मीरुलीसे खुसी हाडला क्रासे फ्यासी पिन्जी। ४५ एसे डादा च्योक लसी फ्याआफुल्नी, तर चुसे मी खमाहेन्सेन डाला काङ्गरी च्योक लबाला लबान मुला। ४६ ओच्छे एसे डाला थोबोरी छ्युगु फोर्सी आपिन्नी। तर चुसे मी डाला काङ्गरी अत्तर फोर्सी पिन्जी। ४७ थेतबासेलमा एसे डाला ताम ड्यान्गो, चुसे ल्हानान पाप लसैनोन माफ याङ्सी जिन्बा मुला। तिगदा भिसम चु म्रिडम्हेमेसे

७:३८ स्थहाप च्योक लबा चा यहूदीला ठिम अन्छार य्हाङ्गसे फ्या लबा हङ्बान हिन्ना।

७:३७ मत्ती २६:७; मर्क १४:३; यूह १२:३

ल्हानान मान लबा मुला। तर जुन म्हिदा जजाकी जे माफ लला, थेसे जजाकी जे मान लला।”

४८ ओच्छे येशूसे थे म्रिडम्हेमेदा “एला पाप माफ तबा मुला” भिसी सुड्जी।

४९ थेरी चबारी चिबा म्हिगदेसे चु ताम थे:सी, “पाप माफ लबा चु म्हि खाल हिन्ना?” भिसी हाड हाड न्हडरी भिवारी छ्याड्जी। ५० ओच्छे येशूसे थे म्रिडम्हेमेदा “एला विश्वाससे लमा एसे थाबा याड्बा मुला, ए ढुक्क तसी निउ” भिसी सुड्जी।

येशूसे परमेश्वरला यहुल्साला समाचार थे:ना लबा

जमाहेन्से येशू शहर शहरदेन नाम्सा नाम्सा तसी परमेश्वरला यहुल्साला समाचार थे:ना लबान फेप्जी। थेला च्युक न्ही चेलागदेएनोन थेदेन छ्यामनोन मुबा। २ ओच्छे येशूसे म्हडसे स्याप्बादेन रोगग्याम खम्ना लबा कोइ कोइ म्रिडम्हेमेगदेएनोन येशूदेन छ्याम मुबा, थेनीगदे न्हडरी मरियम मग्दलिनी भिबा म्रिडम्हेमेला ल्हुङ्ग्याम येशूसे गोर निस म्हड ताप्बा मुबा। ३ ओच्छे सुसन्नादेन हेरोद ग्लेला दिमरी गे लबा म्हिगदे न्हडला खुजास भिबा मुल म्हिला म्रिड योअन्नाएनोन येशूदेन छ्याम मुबा। ओच्छे थेनीगदेदेन स्थान्दो

म्रिडम्हेमेगदेसे हाडलान टाडगासे येशूदा हो लमुबा।*

ब्लु ढ्वबाला उखान

मत्ती १३:१-६; मर्कूस ४:१-६

जमाहेन्से नाम्सा नाम्साग्याम म्हिला हुल खसी येशू मुबा ग्लारी पोप तजी। ओच्छे येशूसे थेनीगदेदा उखान गिक चुहङ्ग भिसी सुड्जी, ५ “च्यागो, ब्लु ढ्वबा म्हि गिक ब्लु ढ्वबारी भ्रजी। थे म्हिसे ब्लु ढ्वमा कोइ ब्लु ग्यामरी परब तजी। थे ब्लु म्हिसे नाड्जी ओच्छे चरागदे खसी चजी। ६ कोइ ब्लु चा युडबाला घहड मुबा सरी परब तजी, ओच्छे फुड्मैछ्याम सिजी। तिग्दा भिसम थे स खर्बा मुबा। ७ कोइ ब्लु चा पुजु भाडरी परब तजी। ओच्छे थे ब्लु पुजुदेन छ्याम छ्यामनोन ल्हेसी निसैनोन पुजु दोडला हापसे लमा थे दोडरी तिगै आरोनी। ८ तर कोइ ब्लु चा ज्यबा सरी परब तजी, ओच्छे थे दोडरी दोब्बर, तेब्बर, चौबरधोना रोजी।” चुदे सुड्माहेन्से येशूसे थेरी मुबा म्हिगदेदा “जुन म्हिदा ड्यान्बा सेम मुला, थेसे ड्यान्सी घोउ।”

ब्लु ढ्वबा उखानना अर्थ

मत्ती १३:१०-२३; मर्कूस ४:१०-२०

जमाहेन्से चेलागदेसे येशूदा चु उखानना अर्थ तिग भिसी ड्योड्जी। १० येशूसे थेनीगदेदा चुहङ्ग भिसी

सुडुजी, “डाइ एनीगदेदा म्हिसे था
आयाड्बा परमेश्वरला यहुल्साला ताम
घोखम्बा ज्ञान बुद्धि पिन्बा मुला। तर
स्थहान्दोगदेदा चा उखानग्याम पाड्बा
मुला। थेतबासेलमा

‘थेनीगदेसे च्याबाम च्याला तर
आम्राड्,
इयान्बाम डुयान्बा मुला तर
आघो।’*

११ “च्यागो, चु उखानना अर्थ चुनोन
हिन्ना, चु ब्लु भिबा चा परमेश्वरला
बचन हिन्ना। १२ ग्यामला कुनीरीक्यार
परब तबा ब्लुला अर्थ चा जुन म्हिसे
परमेश्वरला बचन इयान्बाम इयान्ना
तर सेमरी थान्बारी चा आखम्मुला।
तिगदा भिसम थेनीगदेसे विश्वास लसी
थाबा थायाड्गै भिसी शैतान खसी
थेनीगदेला सेमग्याम परमेश्वरला
बचन ब्यन्सी भोर्मुला। १३ थेहड् लसीन
युडबाला घहडरी परब तबा ब्लुला
अर्थ चा थेनीगदेसे परमेश्वरला बचन
ज्यबा म्हन्सी विश्वास मी लला। तर
थेनीगदेला विश्वासला टा आरेबासे
लमा तिगै धिन लिच्छा थेनीगदेदा तबा
दुखसे लमा थेनीगदेसे विश्वास लबा
खलाला। १४ ओच्छे पुजु भाड न्हडरी
परब तबा ब्लुला अर्थ चा थेनीगदेसे
जम्बुलिडरी म्राड्बा धन सम्पत्तिदेन
मोजमजा, ओच्छे थेनीगदेदा तबा
धन्दा सुर्दासे लमा विश्वासरी कोड्सी

चिआखम्बासे लमा थेनीगदेला
विश्वासग्याम तिगै आरो। १५ तर
ज्यबा सरी परब तबा ब्लुला अर्थ चा
जुन म्हिसे परमेश्वरला बचन इयान्सी
हाडला ज्यबा सेमहेन्सेन विश्वास
लला। ओच्छे थेला विश्वासग्याम
गोल्से गोल्से ज्यबा रोगदे रोबान
निला।

नाडसलला अर्थ

मर्कस ४:२१-२५

१६ “खालैसे नाडसल म्रासी फामसे
घप्सी आथान, ओच्छे खाट धिरीएनोन
छुम्सी आथान। तर दिम न्हडरी खबा
म्हिगदेदा य्हाल तगै भिसी नोबा ग्लारी
थान्ना।* १७ ल्हुसैनोन आम्राड्बा स्हे
तिगै आरो। ओच्छे छुम्सी थान्सैनोन
आघोबा स्हे तिगै आरो।* १८ जुन म्हिसे
डाइ लोप्बा तामदा सेम लसी इयान्ना,
थेदा डाइ अभ घोना लला। तर डाइ
लोप्बा ताम आड्इयान्बादा चा थेसे
जुन घोबा मुला थे तामएनोन म्हाणा
लला।”*


येशूला आमादेन आलेगदे

मत्ती १२:४६-५०; मर्कस ३:३१-३५

१९ थे धुडरी येशूला आमादेन आलेगदे
येशूदा स्याप्बारी येशू मुबा ग्लारी
खजी। तर येशूला क्युर्सीन म्हिला
हुल मुबासे लमा थेनीगदेसे येशूदा

८:१० यशै ६:६-१० ८:१६ मत्ती ५:१५; लूका ११:३३ ८:१७ मत्ती १०:२६

८:१८ मत्ती २५:२६; लूका १६:२६



समुन्द्ररी छाल रे:बा (८:२३)

स्याप्बारी आखम्नी। २० जमाहेन्से थेरी मुबा खालै म्हिसे “हाडदा स्याप्बारी हाडला आमादेन आलेगदे मडग्यार भ्रान्सी चिबा मुला” भिमा, २१ “च्यागो, जुन म्हिसे परमेश्वरला बचन ड्यान्सी परमेश्वरसे कुल्बा ताम ड्यान्ना थेनोन डाला आमादेन आलेगदे हिन्ना” भिसी येशूसे थेनीगदे जम्मादान सुङ्जी।

येशूसे लाबालुडसर म्हाणा लबा

मत्ती ८:२३-२७; मर्कुस ४:३५-४१

२२ तिरेकुनु येशू हाडला चेलागदेदेन छ्याम दौंगारी क्रे:माहेन्से “लु, यहाड समुन्द्रला क्याम्सडपट्टि निइ” भिसी

चेलागदेदा सुङ्जी। जमाहेन्से येशू हाडला चेलागदेदेन छ्याम क्याम्सड फेप्जी। २३ थेनीगदे फेप्बान लबा धुडरी येशू दौंगारीन छुप निजी। जमाहेन्से समुन्द्ररी घेन लाबालुडसर खजी, लाबालुडसरसे लसी समुन्द्ररी छाल रे:जी, छालसे लमा दौंगा डुबब तबारी छ्याइजी, जमाहेन्से थेनीगदेदा आपत विपत तजी। २४ जमाहेन्से चेलागदे येशूला डामरी खसी येशूदा छिड्बान, “गुरु, यहाड सिबारी छ्याइजी” भिसी भिजी। चेलागदेला चुहड्बा ताम थे:सी येशू स्हेड्सी लाबालुडसरदा बड्जी। बड्मैछ्याम लाबालुडसर म्हासी

शान्त तजी। ^{२५}येशूसे थेनीगदेदा “खाइ, एनीगदेला विश्वास” भिसी सुङ्मा, थेनीगदे लोङ्सी उदेक म्हन्बान हाड हाड न्हडरी “चु खाल? लाबालुडसरसेनोन थेसे कुल्बा ताम इयान्बा चीम” भिसी ताम लजी।

येशूसे म्हिला ल्हुङ्ग्याम म्हड ताप्बा

मती ८:२८-३४, मार्कस ५:१-२०

^{२६}येशू हाडला चेलागदेदेन छ्याम गालील अञ्चलला क्याम्सडपट्टि गेरासेनस भिबा ग्लारी धोखजी। ^{२७}येशू दाँगाग्याम फप्मैछ्याम थे शहररी मुबा म्हडसे स्याप्बा म्हि गिक येशूदा स्याप्बारी खजी। थे क्वान आक्वान्नान भ्रबा ल्हानान तसी जिन्बा मुबा। ओच्छे थे दिमरी आचिना धुर्सारीक्यार चिबा मुबा। ^{२८}थेसे येशूदा फ्राङ्मैछ्याम क्रिङ्बान येशूला डाच्छापट्टि रूलुप तसी, “जम्मान भन्दा घेन परमेश्वरला भा येशू हाडसे डादा तिग लबा सेम मुला? डादा दुख थापिन्गो” भिसी बिन्ती लजी। ^{२९}तिगदा भिसम येशूसे थे म्हडदा थे म्हिला ल्हुङ्ग्याम थोन्सी निउ भिसी कुल्बा मुबा। थेदा थे म्हडसे ल्हानान रेम चुङ्बा मुबा। थे म्हिदा या काडरी च्याल्दासे खीसी खुङ्सी चिसैनोन म्हडला शक्तिसे लमा थेसे च्याल्दा फ्राटफ्रेट टाङ्सी थे हिरिक्यार यार्मुबा।

^{३०}येशूसे थेदा “एला मिन तिग?” भिसी ड्योइमा, “डा हुल हिन्ना” भिसी भिजी। तिगदा भिसम थे म्हिला ल्हुङ्गरी ल्हानान म्हड मुबा। ^{३१}ओच्छे म्हडगदेसे “डन्दा ल्हानान नुप्बा व्हाडरी^१ थापुङ्गो” भिसी येशूदेन छ्याम बिन्ती लजी।

^{३२}थे ग्लाला डामला गडरी ह्वला बथान छबान मुबा। थेतबासेलमा थे म्हडगदेसे डन्दा थे ह्वागदे न्हडरी वाङ्पुङ्गो भिसी बिन्ती लमा थेनीगदेदा येशूसे “निउ” भिसी सुङ्जी। ^{३३}जमाहेन्से थे म्हडगदे थे म्हिला ल्हुङ्ग्याम थोन्सी ह्वागदे न्हडरी वाङ्माहेन्से थेरी मुबा जम्मान ह्वागदे गङ्ग्याम समुन्द्ररी छ्योङ्सी सिजी।

^{३४}चुहङ् तबा फ्राङ्सी ह्वा छबा म्हिगदे यार्जी। ओच्छे नाम्सा नाम्सादेन शहर शहररी निसी थेनीगदेसे फ्राङ्बा जम्मान ताम थे:ना लजी। ^{३५}थेनीगदेसे पाङ्बा ताम थे:सी ल्हानान म्हिगदे च्याबारी येशू मुबा ग्लारी खमा, थेनीगदेसे डाच्छा म्हडसे स्याप्सी म्योसी भ्रबा म्हि खम्सी क्वान क्वान्सी येशूला डामरी चिबा फ्राङ्जी। चु फ्राङ्सी थेनीगदे लोङ्जी। ^{३६}थे म्हडसे स्याप्बा म्हि खाहङ् लसी खम्जी भिसी फ्राङ्बा म्हिगदेसे थेरी च्याबारी खबा म्हिगदेदा पाङ्जी। ^{३७}जमाहेन्से

८:३१ चु पदरी “ल्हानान नुप्बा व्हाड” भिबा चा म्हड म्हड चिबा ग्ला हिन्ना। चु ताम (रोमी १०:७; उन्बा ६:१, २, ११; ११:७; १७:८; २०:१, ३) पदरी एनोन मुला।

गेरासेनस भिबा नाम्साला क्यारमारला म्हिगदेसे येशूदा “डनी मुबा ग्लाग्याम फेप्गो” भिसी बिन्ती लजी। तिगदा भिसम थेनीगदे ल्हानान लोङ्सी उदेक तबा मुबा। थेतबासेलमा येशू थे ग्लाग्याम दाँगारी क्रेःसी फेप्बारी छ्याइमा, ^{३८}येशूसे म्हड ताप्सी खम्ना लबा म्हिसे “डाएनोन हाडदेन छ्याम निबा” भिसी येशूदेन छ्याम बिन्ती लमा येशूसे थेदा, ^{३९}“ए हाडला दिमरी निउ ओच्छे परमेश्वरसे एला लागिरी खाहड्बा गे लबा मुला, थे ताम जम्मादान थेःना लउ” भिसी सुङ्जी। जमाहेन्से थे म्हि निसी येशूसे हाडला लागिरी लबा गेला बारेरी शहरला जम्मान ग्लारी थेःना लबान भ्रजी।

याइरसला भामेदेन का निबा बेथासे स्याप्बा म्रिडम्हेमे खम्बा

मत्ती ९:१८-२६; मार्कस ५:२१-४३

^{४०}जमाहेन्से येशू दोःसी फेप्खमाहेन्से म्हिला हुलसे येशूदा फ्याफुल्जी। तिगदा भिसम थेनीगदे येशू फेप्खला भिसी भ्रान्सी चिमुबा। ^{४१}थेनोन धुइरी याइरस भिबा यहूदीगदे हुप तबा दिमला नेता येशू मुबा ग्लारी खसी येशूला स्थापरी फ्या लबान, “डाला दिमरी फेप्खउ” भिसी बिन्ती लजी। ^{४२}तिगदा भिसम थेला गिक जेन मुबा च्युक न्ही दिडला भामे सिबारीन छ्याइबा मुबा। जमाहेन्से येशू फेप्बान लबा धुइरी म्हिगदेसे तोर हुइ मार हुइ लबारी छ्याइजी। ^{४३}थेरी का निबा

बेथासे स्याप्सी च्युक न्ही दिड तबा म्रिडम्हेमे गिक मुबा। थेसे हाडला जम्मान सम्पत्ति खर्च लसी मन लसैनोन थेदा खालैसे खम्ना लआखम्बा मुबा। ^{४४}थेतबासेलमा थे येशूला ग्यापग्याम खसी येशूला क्वान्ना जोरी थुर्जी। थेसे येशूला क्वान थुमैछ्याम थेला का निबा बेथा म्हाजी।

^{४५}जमाहेन्से येशूसे “डादा खाल्से थुर्जी” भिसी सुङ्मा, जम्मासेन “डाइ थुर्बा आहिन” भिसी भिजी। तर पत्रुससे चा “गुरु, हाडदा म्हिगदेसे तोर हुइ मार हुइ लबान मुला” भिसी भिजी। ^{४६}तर येशूसे “आहिन, डादा खालैसे थुर्बा मुला, तिगदा भिसम डाग्याम डाला शक्ति थोन्सी निबा डाइ था याङ्जी” भिसी सुङ्जी। ^{४७}जमाहेन्से थे म्रिडम्हेमेसे हाड लासी चिबारी आतनम भिसी फितफित धर्बान येशूला डाच्छापट्टि खसी फ्या लबान येशूदा तिगदा थुर्जी ओच्छे थुमैछ्याम हाड खाहड् लसी खम्जी भिबा ताम जम्मान म्हिगदेला डाच्छापट्टि पाङ्जी। ^{४८}ओच्छे येशूसे थे म्रिडम्हेमेदा “भामे, एला विश्वाससे लमा ए खम्बा मुला, ए ढुक्क तसी निउ” भिसी सुङ्जी।

^{४९}येशूसे ताम लबान लबा धुइरी याइरसला दिमग्याम म्हि गिक खसी याइरसदा “हाडला भामे सिसी जिन्जी। दाहेन्से गुरुदा दुख थापिन्गो” भिसी भिजी। ^{५०}तर येशूसे याइरसदा “थालोङ्गो, एसे विश्वास जे लउ,

ओच्छे एला भामे सोला” भिसी सुङ्जी।

५१ याइरसला दिमरी धोमाहेन्से येशूसे पत्रुस, याकूब, यूहन्नादेन थे माइला आबादेन आमादा बाहेक स्थान्दो खालैदान दिम न्हडरी खआपुङ्नी। ५२ याइरसला दिमरी पोप तबा म्हिगदे थे माइ सिजी भिसी क्राबा क्रिडुबा लसी चिबा मुबा। येशूसे थेनीगदेदा “थाक्रागो, थे सिबा आरे, म्हेर्सी चिबा मुला” भिसी सुङ्जी। ५३ येशूला ताम थे:सी थेनीगदेसे डे:बान येशूदा खिसी लजी। तिग्दा भिसम थे माइ सिसी जिन्बा मुला भिसी थेनीगदेदा था मुबा।

५४ तर येशूसे थे माइला यारी चुङ्सी, “माइ, ए रे:गो” भिसी सुङ्मैछ्याम, ५५ थे माइला आत्मा दो:सी खजी ओच्छे थे डोड रे:जी। जमाहेन्से येशूसे “चु माइदा चबा स्हे पिन्गो” भिसी सुङ्जी। ५६ चु म्राङ्सी थे माइला आबादेन आमा उदेक तजी। तर येशूसे थेनीगदेदा “चु ताम खालैदा थापाङ्गो” भिसी कुल्जी।

येशूसे हाडला च्युक न्ही चेलागदेदा पुइबा

मती १०:५-१५; मर्कुस ६:७-१३

६ जमाहेन्से येशूसे हाडला च्युक न्ही चेलागदेदा ड्योइसी थेनीगदेदा म्हङ्गदे ताप्बादेन रोगगदे

म्हाना लबा शक्तिदेन अधिकार पिन्सी, २ परमेश्वरला यहुल्साला समाचार थे:ना लबारी ओच्छे आखम्बा म्हिगदेदा खम्ना लबारी पुइजी। ३ ओच्छे येशूसे थेनीगदेदा चुहङ् भिसी सुङ्जी, “एनीगदेसे ग्यामला लागिरी कडी, भोला, चबा स्हे, टाङ्गा ओच्छे पोबा क्वान तिगै थाभोर्गो। ४ जुन दिमला म्हिगदेसे एनीगदेदा मान लला, थे नाम्साग्याम थोन्सी आनितेथोना एनीगदे थे दिमरीन चिउ। ५ तर जुन ग्लाला म्हिगदेसे एनीगदेदा मान आल, एनीगदे थे शहरग्याम थोन्बा धुइरी दाहेन्से डन्से लतो:बा गे लसी जिन्जी। एनीगदेसे तिग लतो:बा लउ भिसी काङ्ला धुलु खर्सी पिन्गो।”*

६ जमाहेन्से चेलागदे नाम्सा नाम्सारी निसी परमेश्वरला यहुल्साला समाचार थे:ना लबान आखम्बा म्हिगदेदा खम्ना लजी।

येशूला बारेरी थे:सी हेरोद ग्ले अलमल तबा

मती १४:१-१२; मर्कुस ६:१४-२६

७ चु जम्मान गेला बारेरी थे:सी गालील अञ्चलरी शासन लबा हेरोद अलमल तजी। तिग्दा भिसम कोइ कोइ म्हिसे येशूदा “बप्तिस्मा पिन्बा यूहन्ना सिबाग्याम सोसी खजीम” भिसी भिबा मुबा। ८ कोइ कोइसे चा “एलिया दो:सी खजीम” भिसी भिबा

मुबा। ओच्छे स्थान्दो कोइ कोइसे चा “ओन्माला अगमवक्तागदे न्हडरी गिक सिबाग्याम सोसी खजीम” भिसी भिबा मुबा।* ६थेतबासेलमा हेरोद ग्लेसे “चुहड्बा उदेकला गे लबा म्हि खाल हिन्ना? तिग्दा भिसम यूहन्नाला थोबो मी डाइनोन आपुङ्बा हिन्ना” भिसी भिजी। ओच्छे थेसे तिरेम येशूदा स्याप्बा सेम लजी।

येशूसे हजार डा म्हिगदेदा चबा स्हे पिन्बा

मत्ती १४:१३-२१; मर्कूस ६:३०-४४;
यूहन्ना ६:१-४

१० येशूसे परमेश्वरला यहुल्साला समाचार थे:ना लबारी पुङ्बा मुल चेलागदे दो:सी खसी थेनीगदेसे लबा जम्मान गे येशूदा पाङ्जी। जमाहेन्से येशूसे थेनीगदेदा जे भोर्सी बेथसेदा भिबा शहररी फेज्जी। ११ तर चु ताम था याङ्सी म्हिला हुल येशू मुबा ग्लारी निजी। जमाहेन्से येशूसे थेनीगदेदा खपुङ्जी। ओच्छे म्हिगदेदा परमेश्वरला यहुल्साला समाचार थे:ना लबान आखम्बा म्हिगदेदा खम्ना लजी।

१२ धिनी घलबारी छ्याइमाहेन्से च्युक न्ही चेलागदे येशू मुबा ग्लारी खसी येशूदा “म्हिगदेदा चुग्याम निपुङ्गो। तिग्दा भिसम चु ग्लारी तैगै आरे। थेतबासेलमा थेनीगदे

क्यारमारला नाम्सारी निसी चबा थुङ्बादेन चिबा ग्ला ढिकना लगै” भिसी भिजी।

१३ तर येशूसे थेनीगदेदा “एनीगदेसेन चुगदेदा चबा स्हे पिन्गो” भिसी सुङ्मा, थेनीगदेसे “डन्देन छ्याम गोर डा गेडदेन तार्डा न्ही जे मुला। आतसम डनी निसी चु जम्मान म्हिगदेला लागिरी चबा स्हे ग्लुसी भतो:ला” भिसी भिजी।

१४ थेरी हजार डा ते चा हेम्फेबे जे मुबा। ओच्छे येशूसे हाडला चेलागदेदा “म्हिगदेदा बोगल न्हीसे च्युइला लाम लसी चिपुङ्गो” भिसी सुङ्जी।

१५ ओच्छे चेलागदेसे येशूसे सुङ्बा हड्गोन लसी चिपुङ्जी। १६ जमाहेन्से येशूसे गोर डा गेडदेन तार्डा न्ही छ्यारी थोसी स्वर्गपट्टि स्हीसी परमेश्वरदा धन्यवाद पिन्जी। ओच्छे येशूसे गेडदेन तार्डा क्युइसी म्हिगदेदा भो लसी पिन्गो भिसी चेलागदेदा कुल्जी। १७ जमाहेन्से जम्मान म्हिगदेसे मेन्ना चसीनोन लेङ्बा भ्राइभुइ चेलागदेसे दुङ्मा च्युक न्ही सोली तजी।

येशू परमेश्वरला म्हि ख्रीष्ट हिन्ना

मत्ती १६:१३-१६; मर्कूस ८:२७-२९

१८ तिरेकुनु येशू गिक जेन प्रार्थना लसी धन्छ्याबा मुबा। थे धुइरी थेला चेलागदेएनोन छ्यामनोन मुबा। ओच्छे

येशूसे थेनीगदेदा “म्हिगदेसे डादा खाल भिबा चीम?” भिसी ड्योइमा, १६ थेनीगदेसे “हाडदा खालैसे बप्तिस्मा पिन्बा यूहन्ना भिबा मुला, खालैसे एलिया, ओच्छे स्थहान्दोगदेसे चा ओन्माला अगमवक्तागदे न्हडला गिक सिबाग्याम सोसी खजीम भिबा मुला” भिसी जोहाब पिन्जी।* २० जमाहेन्से येशूसे दोःसी चेलागदेदा “तर एनीगदेसे चा डा खाल भिसी म्हन्मुला?” भिसी ड्योइमा, पत्रुससे “हाड परमेश्वरसे पुइखबा थाबा पिन्बा खीष्ट हिन्ना” भिसी जोहाब पिन्जी।*

२१ जमाहेन्से येशूसे, “च्यागो, एनीगदेसे चु ताम खालैदा थापाङ्गो” भिसी कुल्जी। २२ ओच्छे येशूसे थेनीगदेदा “परमेश्वरसे पुइखबा म्हिसे ल्हानान दुख नातोःला। ओच्छे यहूदी गन्बागदे, परमेश्वरला मन्दिररी पूजा लबा मुल म्हिगदेदेन यहूदी धर्मगुरुगदेसे बिरोध लसी साइला। तसैनोन थेदा सिबाग्याम सोमरेमाकुनु सोना लला” भिसी सुइजी।

चेलागदेसे नातोःबा दुख

मती १६:२४-२८; मर्कुस ८:३४-६:१

२३ जमाहेन्से येशूसे थेरी मुबा जम्मान म्हिगदेदा चुहङ् भिसी सुइजी, “खालै म्हि डाला चेला दोबा सेम मुसम थेसे

हाडला ज्याननोन माया मारब लसी हाडला कुस हाडसेन धिन धिननोन पुइसी डादेन छ्याम भ्रगै।* २४ तिगदा भिसम जुन म्हिसे हाडला ज्यान जोगब लबारी म्हाइला, थे म्हिसे चा जुकजुकधोनाला जुनी आयाङ्। तर डाला लागिरी हाडला ज्याननोन पिन्खम्बा म्हिसे चा जुकजुकधोनाला जुनी याङ्ला।* २५ चुदे खालै म्हिसे जम्बुलिडनोन यारी किन्सी थेला ज्याननोन निजी भिसम तिग ज्यबा तला? २६ ओच्छे खालै म्हि डादेन डाला तामरी पेःजी भिसम परमेश्वरला स्वर्गदूतगदेदेन छ्याम परमेश्वरसे पुइखबा म्हि डाला आबा परमेश्वरला य्हालदेन शक्तिरी खमा थेदा हाडला भिबारी पेःला। २७ तर एनीगदेसे डाला ताम ड्यान्गो, चुरी मुबा म्हिगदे न्हडला कोइ कोइ म्हि चा परमेश्वरला यहुल्सा आम्राङ्तेधोना आसि।”

येशूला स्थाल पोबा

मती १७:१-८; मर्कुस ६:२-८

२८ येशूसे चु ताम सुइसी भ्रेःरे तमा पत्रुस, यूहन्नादेन याकूबदा प्रार्थना लबारी गडरी भोर्सी फेज्जी। २९ थेरी येशू प्रार्थना लबान लबा धुइरी येशूला स्थाल पोजी। ओच्छे येशूला क्वान धिनीला स्हेर हङ्बान य्हाल

६:१६ मती १४:१-२; मर्कुस ६:१४-१५; लूका ६:७-८ ६:२० यूह ६:६८-६९

६:२३ मती १०:३८; लूका १४:२७ ६:२४ मती १०:३६; लूका १७:३३; यूह १२:२५

यहाल तजी ३० ओच्छे म्हि न्ही येशूदेन
छ्याम ताम लबा म्हाङ्गी। थे म्हि न्ही
मोशादेन एलिया मुबा। ३१ थेनीगदेला
स्थहाल यहाल यहाल तबा मुबा।
ओच्छे येशू यरूशलेमरी सितोःला
भिबा तामला बारेरी येशूदेन छ्याम
ताम लबान मुबा।

३२ थे धुइरी चा पत्रुस ओच्छे
थेदेन छ्याम मुबागदे म्हेर्बा मुबा।
थेनीगदे फातछोर्मा येशू स्वर्गला
यहालरी ओच्छे स्थहान्दो म्हि
न्हीएनोन येशूदेन छ्याम राप्सी चिबा
म्हाङ्गी। ३३ ओच्छे थे म्हि न्ही येशू
मुबाग्याम दोःसी निबारी छ्याइमा
पत्रुससे “गुरु, यहाड चुरी मुबा ज्यबा
तजीम। दाहेन्से डन्से चुरी छाप्रो
सोम स्होइ, गिक ह्माडला लागिरी,
गिक मोशाला लागिरी ओच्छे गिक
एलियाला लागिरी” भिसी भिजी। तर
पत्रुसदा तिग ताम पाङ्तोःबा थे था
आरेमुबा। ३४ पत्रुससे चुहङ् पाङ्ना
पाङ्नान खसु खसी थेनीगदेदा
घण्जी। चु म्हाङ्सी चेलागदे लोङ्गी।
३५ ओच्छे खसु न्हङ्ग्याम चुहङ्बा
काइ थेःजी, “चु डाइ धम्बा डाला
भा हिन्ना, चुसे भिबा ताम एनीगदेसे
ड्यान्गो।” * ३६ चु काइ थेःसी
जिन्माहेन्से चेलागदेसे थेरी येशूदा जे
म्हाङ्गी। जमाहेन्से थेनीगदे कुटिसी
चिजी। ओच्छे थेनीगदेसे म्हाङ्बा चु
ताम थे धुइरी खालैदा आपाङ्नी।

येशूसे म्हाङ्से स्याप्बा म्हिदा खम्ना लबा

मत्ती १७:१४-१८; मार्कस ९:१४-२७

३७ न्हङगरदड येशू ह्माडला
चेलागदेदेन छ्याम गङ्ग्याम मार
फेप्खबा धुइरी म्हिला हुल गिक
येशूदा स्याप्बारी खजी। ३८ ओच्छे
थे म्हिला हुल न्हङ्ग्याम म्हि गिकसे
क्रिङ्बान भिजी, “गुरु, डाला भादा
च्यासी पिन्गो, तिगदा भिसम चु डाला
गिक जेन भा हिन्ना! ३९ थेदा म्हाङ्से
घरिघरि चुङ्मुला, ओच्छे थे क्रिङ्सी
सिबा तेबान तमुला। जमाहेन्से थेला
सुङ्ग्याम बोप्स्या तेःबा मुला, ओच्छे
थे म्हाङ्से लछार पछार आलतेधोना
थेदा आरुलामुला। ४० डाइ थे
म्हाङ ताप्सी पिन्गो भिसी ह्माडला
चेलागदेदा भिजी, तर थेनीगदेसे
म्हाङ ताप्आखम्नी।” ४१ जमाहेन्से
येशूसे थेनीगदेदा “विश्वास
आलबादेन नइबा सेम थोबा म्हिगदे,
खाइमाधोना डा एनीगदेदेन छ्याम
तला? खाइमाधोना डाइ एनीगदेदा
नासे?” भिसी सुङ्गी। ओच्छे येशूसे
थे म्हिदा “एला भादा चुरी भउ”
भिसी सुङ्गी। ४२ ओच्छे थेसे ह्माडला
भादा भना भनान थेला भादा थे
म्हाङ्से चुङ्सी भ्याङ्गी। तर येशूसे
थे म्हाङ्दा बङ्सी थे कोलादा
खम्ना लसी थेला आबादा पिन्जी।

४३ परमेश्वरला शक्ति प्राङ्सी थेरी मुबा म्हिगदे उदेक तजी।

दो:सी येशूसे हाङ खाहङ् लसी सिला भिसी सुङ्जा

मत्ती १७:२२-२३; मर्कूस ६:३०-३२

ओच्छे थेरी मुबा म्हिगदे येशूला गे प्राङ्सी उदेक तसी चिबा धुइरी येशूसे हाङला चेलागदेदा, ४४ “च्यागो, परमेश्वरसे पुइखबा म्हिदा चुङ्सी म्हिगदेला यारी जिम्मा पिन्ना। एनीगदेसे चु ताम खाइमै थाम्ले:गो” भिसी सुङ्जी। ४५ तर चेलागदेसे चु ताम आघोनी। तिग्दा भिसम थेनीगदेसे चु ताम घोखम्बा ज्ञान आयाङ्बासे लमा येशूसे तिग सुङ्जी भिसी म्हन्बारीनोन आखम्नी। ओच्छे थेनीगदे लोङ्बासे लमा चु तामला अर्थ तिग भिसी येशूदा ड्योइबारी आखम्नी।

जम्मान भन्दा घेन खाल?

मत्ती १८:१-५; मर्कूस ६:३३-४०

४६ थे धुइरी चेलागदे हाङ हाङ न्हडरी खाल घेन भिसी ताम लबान मुबा।* ४७ येशूसे थेनीगदेला सेमला ताम था याङ्सी कोला गिकदा हाङला डामरी भसी थेनीगदेदा चुहङ् भिसी सुङ्जी, ४८ “च्यागो, जुन म्हिसे चुहङ्बा कोलादा डाला मिनरी वास्ता लला, थेसे डादाएनोन वास्ता लला,

डादा वास्ता लबासे डादा पुइखबा डाला आबादाएनोन वास्ता लला। ओच्छे एनीगदे न्हडरी जुन म्हि जम्मान भन्दा जजा मुला, थेनोन घेन तला।”*

४९ जमाहेन्से यूहन्नासे, “गुरु, डन्से हाङला मिनरी म्हि गिकसे म्हड ताप्बा प्राङ्जी। तर डन्से थेदा थेहङ् लआपुङ्नी, तिग्दा भिसम थे डनी हङ् हाङदेन छ्याम आभ्रमुला।” ५० तर येशूसे थेनीगदेदा “एनीगदेसे थेहङ् थालउ, तिग्दा भिसम जुन म्हिसे एनीगदेला बिरोध आल थे म्हि एनीगदेपट्टिला हिन्ना” भिसी सुङ्जी।

सामरीगदेसे येशूदा चिआपुङ्बा

५१ जमाहेन्से येशूसे हाङ स्वर्गरी फेप्बा धुइ तबासे लमा यरूशलेमरी निनोन तो:ला भिसी पक्का लजी। ५२ ओच्छे येशूसे कोइ कोइ समाचार भोर्बा म्हिगदेदा डाच्छान जम्मान ताम तयार लबाला लागिरी सामरियाला नाम्सा गिकरी पुङ्जी। ५३ येशू यरूशलेमरी फेप्बारी छ्याइबा ताम था याङ्सी सामरिया नाम्साला म्हिगदेसे येशूदा चिआपुङ्नी। ५४ चु प्राङ्सी येशूला चेला याकूबदेन यूहन्नासे, “प्रभु, डन्से स्वर्ग्याम मे ताइना लसी थेनीगदेदा नाश लगै भिसी भिउ भिबा हाङला सेम मुला?” भिसी भिमा,* ५५ येशू चेलागदेपट्टि दो:सी थेनीगदेदा

६:४६ लूका २२:२४ ६:४८ मत्ती १०:४०; लूका १०:१६; यूह १३:२०

६:५४ २ राजा १:६-१६

बड्जी।† ५६ जमाहेन्से येशू हाडला चेलागदेदा भोर्सी अर्गु नाम्सापट्टि फेप्जी।

विश्वासीगदेदेन छ्याम ततोःबा गुण

मत्ती ८:१६-२२

५७ ओच्छे येशू हाडला चेलागदेदेन छ्याम यरूशलेमपट्टि फेप्बान लबा धुइरी म्हि गिक खसी येशूदा “हाड खानडदमान फेप्सै डाएनोन हाडदेन छ्याम निला” भिसी भिजी।

५८ जमाहेन्से येशूसे थेदा “च्यागो, ल्हुन्दीगदे चिबारी ऊ मुला, ओच्छे चरागदे चिबारीनोन जड मुला, तर परमेश्वरसे पुइखबा म्हिदा बलप्बा न्हबारीनोन ग्ला आरे” भिसी सुड्जी।

५९ ओच्छे स्थहान्दो म्हि गिकदा येशूसे “डादेन छ्याम भ्रउ” भिसी सुड्जी। तर थेसे “प्रभु, डाच्छा डाला सिबा आबादा ल्हुसी हाडदेन छ्याम भ्रला” भिसी भिजी। ६० येशूसे थेदा “सिबागदेदा सिबागदे हड्बासेन ल्हुगै तर ए चा निसी परमेश्वरला यहुल्साला समाचार थेःना लउ” भिसी सुड्जी।

६१ दोःसी स्थहान्दो म्हि गिक येशू मुबा ग्लारी खसी, “डाएनोन हाडदेन छ्याम भ्रला, तर डाच्छा डा दिमरी निसी जम्मादान डा येशूदेन छ्याम निजी

भिसी पाड्सी खला” भिसी भिजी।* ६२ थेदा येशूसे, “मोइबा धुइरी ग्याप दोःसी च्याबा म्हि चा परमेश्वरला यहुल्सारी गे आखेल” भिसी सुड्जी।

येशूसे बोगल सोमसे च्युक न्ही चेलागदेदा परमेश्वरला यहुल्साला समाचार थेःना लबारी पुइबा

१० जमाहेन्से येशूसे स्थहान्दो बोगल सोमसे च्युइ चेलागदेदा धम्जी। ओच्छे हाड फेप्बारी छ्याइबा नाम्सादेन शहररी हाड फेप्बा भन्दा डाच्छा थेनीगदेदा गोर न्ही न्ही लसी पुइजी। २ पुइबा धुइरी येशूसे थेनीगदेदा चुहड् भिसी सुड्जी, “च्यागो, बाली मी ल्हानान मिन्बा मुला, तर बाली दुइबा म्हिगदे ल्हाना आरे। थेतबासेलमा बाली दुइबा म्हिगदे पुइखउ भिसी बालीला दोप्ता प्रभुदेन छ्याम प्रार्थना लउ।* ३ दाहेन्से एनीगदे निउ। डाइ एनीगदेदा फार्बागदेला गुडरी ग्युला कोलादा पुइबा हड् लसी पुइला।* ४ ओच्छे एनीगदेसे टाडगा, भोला, लखम तिगै थापुइगो। ओच्छे ग्यामरी खालैदेन छ्याम ल्हाना ताम थालउ।

५ “ओच्छे एनीगदे जुन दिमरी वाड्ला डाच्छा ‘थे दिमला म्हिदा

६:५५ कोइ कोइ ग्रीक बाइबलरी चु ताम काप्बा मुला: ओच्छे येशूसे थेनीगदेदा “एनीगदेला सेम खाहड्बा ततोःमुला भिसी एनीगदेसे अफ घोबा आरेम। डा परमेश्वरसे पुइखबा म्हि मी म्हिगदेदा साइबारी खबा आहिन, तर थेनीगदेदा थाबा पिन्बारी खबा हिन्ना” भिसी सुड्जी।

६:६१ १ राजा १६:२० १०:२ मत्ती ६:३७-३८ १०:३ मत्ती १०:१६

शान्ति तगै' भिसी मोलम पिन्गो। ६थे दिमरी एनीगदेदेन छ्याम ढिक्बा म्हि मुसम थेनीगदेसे शान्ति याङ्ला। तर एनीगदेदेन छ्याम ढिक्बा म्हि आरेसम एनीगदेसे पिन्बा मोलम एनीगदेदान दोःसी खला। ७ओच्छे थेनीगदेसे एनीगदेदा जस्तो चबा स्हे पिन्सै चबा थुङ्बा लसी थेनोन दिमरी चिउ। तिग्दा भिसम गे लबा म्हिसे ज्याला याङ्तोःमुला। ओच्छे एनीगदे दिम दिमरी वाङ्सी ज्यबा ज्यबा चबा स्हे म्हाइसी थाभ्रउ।*

८“थेहङ् लसी एनीगदे शहरगदेरी निबा धुइरी थे शहरला म्हिगदेसे मान लसी चबा थुङ्बारी पिन्बा स्हे चउ। ९ओच्छे थेरी आखम्बा म्हिगदेदा खम्ना लउ, ‘ओच्छे परमेश्वरला यहुल्सा खसी जिन्बा मुला’ भिसी थेनीगदेदा पाङ्गो। १०तर खजिबै शहररी एनीगदे निमा थे शहरला म्हिगदेसे एनीगदेदा मान आलनी भिसम थे शहरला ग्यामरी थोन्सी, ११‘डन्से डन्ना काङरी भेर्बा एनीगदेला नाम्साला धुलु सुतै एनीगदेदान नाम्सारी खर्बा मुला। तिग्दा भिसम डन्से पाङ्बा ताम एनीगदेसे आङ्यान्नी। तर च्यागो, परमेश्वरला यहुल्सा खसी जिन्बा मुला भिबा एनीगदेसे था याङ्गो’ भिसी

थेनीगदेदा पाङ्गो। १२एनीगदेसे डाला ताम इ्यान्गो, परमेश्वरसे निसाफ लबा धिनकुनु थे शहरला म्हिगदेला गति भन्दा मी सदोम† शहरला म्हिगदेला गति नाखम्बा तला।

येशूसे विश्वास आलबा शहरला म्हिगदेदा बङ्बा

मती ११:२०-२७; १३:१६-१७

१३“खोराजीनदेन बेथसेदाला म्हिगदे, एनीगदेसे परमेश्वरग्याम सजाय याङ्ला। तिग्दा भिसम एनीगदेला नाम्सारी लबा हङ्बा उदेकला गेगदे टुरोसदेन सीदोन शहररी लबा हिन्सम ओन्मान थेनीगदेसे बोरा क्वान्सी मेफ्रा फोर्सी हाङ हाङला पाप ख्लासी परमेश्वरपट्टि दोःसेला मुबा १४तर परमेश्वरसे निसाफ लबा धुइरी एनीगदेला गति भन्दा टुरोसदेन सीदोनला म्हिगदेला गति नाखम्बा तला। १५कफर्नहुमला म्हिगदे, तिग एनीगदे स्वर्गरीन धोला भिसी म्हन्मुला? आधो! एनीगदेदा मी नर्गरी भ्याङ्ला।”

१६येशूसे हाङला चेलागदेदा “एनीगदेला ताम इयान्बासे डाला तामदाएनोन इयान्ना, एनीगदेला ताम आङ्यान्बासे डाला तामएनोन

१०:१२ उत्पत्ति १६:२३-२६ “सदोम” भिबा चा शहर हिन्ना। थेदा परमेश्वरसे नाश लजी। तिग्दा भिसम थे शहररी ल्हानान नङ्बा गेगदे लमुबा। चु ताम, मती ११:२३-२४; लूका १०:१२, १७:२६; रोमी ९:२६; २ पत्रुस २:६; यहू १:७; उन्बा ११:८ पदरीएनोन मुला। १०:७ १ कोर ६:१४; १ तिमो ५:१८

आड्यान। ओच्छे डाला ताम
आड्यानबासे डादा पुइखबाला
तामएनोन आड्यान” भिसी सुइजी।

येशूसे पुइबा बोगल सोमसे च्युक न्ही चेलागदे दोःसी खबा

१७ येशूसे पुइबा बोगल सोमसे च्युइ
न्ही चेलागदे ताड्बान येशू मुबा ग्लारी
खसी, “प्रभु डन्से हाडला मिनरी
महडगदेदा कुल्मा थेनीगदेसे ड्यानजी”
भिसी भिजी। १८ ओच्छे येशूसे थेनीगदेदा
“डाइ शैतानदा स्वर्गयाम तिप्लीड हड्
लसी ताड्बा म्राइजी। १९ ओच्छे डाइ
एनीगदेदा पुखीदेन बिच्छीदा नाइसी
भ्रबादेन एनीगदेदा हाडला शत्रुगदेला
जम्मान शक्तिदा ढाबा अधिकार
पिन्बा मुला। थेतबासेलमा एनीगदेदा
तिगै स्हेसेएनोन न्होइना लआखम।
२० तसैनोन महडगदेदा हाडला धिरी
थान्म्याइजी भिसी एनीगदे थाताइगो।
तर हाडला मिन स्वर्गरी भ्रिबा मुला
भिसी एनीगदे ताइगो” भिसी सुइजी।

येशूसे पिन्बा धन्यवाद

मत्ती ११:२५-२७; १३:१६-१७

२१ थेनोन धुइरी येशूथोरी परमेश्वरला
आत्मा फेप्खजी। ओच्छे येशू ताइसी,
“मुदेन जम्बुलिडला प्रभु आबा, हाडदा
धन्यवाद मुला, तिगदा भिसम हाडसे
ज्ञान बुद्धि मुबा म्हिगदेदेन सेबा घोबा
म्हिगदेग्याम छुम्सी थान्बा ताम तिगै
आसेबा म्हिगदेदा उन्सी पिन्जी। हिन्ना
आबा, चुहड् लमान हाड ताइजी।

२२ “डाला आबासे डादा जम्मान स्हे
जिम्मा पिन्बा मुला। ओच्छे डा खाल
भिसी डाला आबादा बाहेक स्थान्दो
खालैदा था आरे। थेहड् लसीन आबा
खाल भिसी भादेन भासे आबादा
डोसेना लबा म्हिगदेसे बाहेक स्थान्दो
खालैदान आबा खाल हिन्ना भिसी था
आरे।”

२३ जमाहेन्से येशू हाडला चेलागदेपट्टि
दोःसी थेनीगदेदा जे चुहड् भिसी
सुइजी, “एनीगदेसे म्राइबा मुला, चु
ताम म्राइबागदे चा परमेश्वरग्याम
मोलम याइबा म्हिगदे हिन्ना। २४ तिगदा
भिसम लहानान अगमवक्तागदेदेन
ग्लेगदेसे एनीगदेसे म्राइबा चु तामगदे
च्याबारी म्हाइमुबा। तर थेनीगदेसे
आम्राइनी, ओच्छे एनीगदेसे थेःबा
ताम थेनीगदेसे थेःबारी म्हाइजी, तर
थेःबारी आम्याइनी।”

ज्यबा खिम्जेम

मत्ती २२:३४-४०; मर्कस १२:२८-३४

२५ तिरेकुनु यहूदी धर्मगुरु गिक येशू
मुबा ग्लारी खसी येशूला सेम च्याबारी
थेसे “गुरु जुकजुकधोना आसिबा जुनी
याइबारी डाइ तिग लतोःला?” भिसी
ड्योइमा, २६ येशूसे थेदा “परमेश्वरसे
मोशादा पिन्बा ठिमरी तिग भ्रिबा मुला?
एसे पढब लबा आरे?” भिसी सुइजी।
२७ जमाहेन्से थेसे येशूदा “हाडला
सेमहेन्सेन, हाडला प्राणसे, हाडला
बुद्धिसे ओच्छे हाडला शक्तिसे एसे
परमप्रभु हाडला परमेश्वरदा माया

लउ। ओच्छे एसे हाडला खिम्जेमदा हाडदा हङ्गोन माया लउ” भिसी भिबा मुला। ^{२८}भिसी भिमा, येशूसे थेदा “एसे ठीक भिजी दाहेन्से एसे थेहङ्गोन लउ। जमाहेन्से ए जुकजुकधोना सोला” भिसी सुङ्गी। ^{२९}तर थे म्हिसे हाडसे हाडदान डा ठीक मुला भिसी उन्बाला लागिरी “थेहङ्ग भिसम डाला खिम्जेम खाल हिन्ना?” भिसी येशूदा ड्योइजी।

^{३०}जमाहेन्से येशूसे थेदा चुहङ्ग भिसी सुङ्गी, “च्यागो, म्हि गिक यरूशलेमग्याम यरीहो भिबा ग्लापट्टि निबान लमा थेदा यहोगदेसे स्याप्सी लिगन्डीन लसी सिबाधोनान तोजी। ^{३१}ओच्छे छिन्नड लिच्छा परमेश्वरला मन्दिररी पूजा लबा म्हि थेग्यामसेन खजी। तर थेसे थे यहोगदेसे तोसी सिबा तेबान तबा म्हिदा म्राङ्सीनोन आम्राङ्बा स्होसी निजी। ^{३२}थेहङ्ग लसीन स्थान्दो लेवी गिकएनोन थेग्यामसेन खजी थेसेनोन थे सिबा तेबान तबा म्हिदा म्राङ्सीनोन आम्राङ्बा स्होसी निजी। ^{३३}तर स्थान्दो सामरी यहुलला[†] म्हि गिकएनोन थेग्यामसेन खजी। थे सिबा तेबान तबा म्हिदा म्राङ्सी थेदा ल्हानान दया रे:जी। ^{३४}जमाहेन्से थे सिबा तेबान तबा म्हि मुबा ग्लारी निसी थेसे थे म्हिला पोरगदेरी छ्युगुदेन अङ्गुरला निङ्गु फोर्सी क्वानगेनसे खीजी। ओच्छे थेसे थे म्हिदा हाडलान

गधाथोरी थान्सी म्हिगदे बास चिबा पाटी गिकरी भोर्सी म्हुन गिक हाडसेन थे म्हिला सयार लजी। ^{३५}न्हङ्गरदङ्ग निबा धुङ्गी थेसे थे पाटीला धनीदा म्हुइला डबल न्ही पिन्सी थेसे “ज्यना लसी चुला सयार लउ, अम्भ खर्च ल्हानान निसम डा दो:सी खमा हाडदा पिन्ना” भिसी भिजी।”

^{३६}येशूसे थेदा “एला बिचाररी चु म्हि सोम न्हङ्गी खजिबा चा थे यहोसे स्याप्बा म्हिला खिम्जेम तजी?” भिसी ड्योइमा, ^{३७}थेसे येशूदा “थे यहोगदेसे तोबा म्हिदा दया लबा म्हि” भिसी भिजी।

ओच्छे येशूसे थेदा “दाहेन्से निसी एसेनोन थेहङ्गोन लउ” भिसी सुङ्गी।

येशू मार्थादेन मरियमला दिमरी फेप्बा

^{३८}ओच्छे येशू हाडला चेलागदेदेन छ्याम फेप्बान लमा नाम्सा गिकरी धोजी, थे नाम्सारी मुबा मार्था भिबा म्रिङ्ग्मेमेसे येशूदा हाडला दिमरी ड्योइजी। ^{३९}थे म्रिङ्ग्मेमेला मरियम भिबा आडा गिक मुबा, थे चा येशूला डामरी चिसी येशूला ताम ड्यान्मुबा। ^{४०}मार्था चा येशूदा क्योङ्बाला लागिरी चबा स्हे स्होबा गेरी कोल्सी चिबा मुबा। ओच्छे थे येशूला डामरी खसी, “प्रभु, चबा स्हे स्होबारी आडासे डादा हो आलबा

१०:३३ “सामरी यहुल” चा यहूदीगदेलाला लागिरी जजा यहुलला म्हि हिन्ना।

हाडसे म्राड्बा आरे? हाडसे डादा हो लबारी निउ भिसी थेदा सुङ्सी पिन्गो” भिसी भिजी। ^{४१}तर येशूसे थेदा “मार्था, ए ल्हानान तामरी धन्दा सुर्दा जे लमुला। ^{४२}तर तोःबा स्हे गिक जेन मुला, थेनोन स्हे मरियमसे धम्बा मुला। थेतबासेलमा थेग्याम चु आब्यन” भिसी सुङ्जी।

येशूसे प्रार्थना लबारी लोप्बा

मत्ती ६:९-१३; ७:७-११

११ तिरेकुनु येशूसे ग्ला गिकरी प्रार्थना लबान मुबा। येशूसे प्रार्थना लसी जिन्माहेन्से थेला चेला गिकसे “प्रभु, यूहन्नासे हाडला चेलागदेदा प्रार्थना लबारी लोप्सी पिन्बा हङ् लसी डन्दाएनोन प्रार्थना लबारी लोप्सी पिन्गो” भिसी भिमा, ^२येशूसे थेनीगदेदा “एनीगदेसे चुहङ् लसी प्रार्थना लउ” भिसी सुङ्जी,

“परमेश्वर आबा,
हाडदा^१ जम्मासेन मान लगै,
ओच्छे जम्मानथोरी हाडला शासन
खगै।

^३डन्से धिन धिननोन चतोःबा स्हे
डन्दा धिन धिननोन पिन्गो।

^४डन्ना पाप माफ लसी पिन्गो।
तिगदा भिसम डन्सेनोन डन्दा
बिरोध लसी पाप लबागदेदा
माफ लबा मुला।

ओच्छे डन्दा पापरी फसब तबा
ग्यामरी भ्रआपुङ्गो।”

^५जमाहेन्से येशूसे हाडला चेलागदेदा दोःसी चुहङ् भिसी सुङ्जी, “एनीगदे न्हडरी खालैला हो गिक मुला भिसी म्हन्गो। थे म्हुन गुडरी थे हो मुबा ग्लारी निसी ‘डादा गोर सोम गेड भउले ज्योज्यो, ^६डाला दिमरी थारेडग्याम डोन्बो गिक खबा मुला। दान्दे डादेन छ्याम चबा स्हे तिगै आरे’ भिसी भिमा, ^७थेला होसे दिम न्हडग्यामसेन ‘डा प्राप दुङ्सी कोलागदेदेन छ्याम म्हेसी जिन्जी। थेतबासेलमा डादा दुख थापिन्गो। दान्दे डा रेःसी एदा तिगै पिन्आखम’ भिसी भिजी। ^८तर डाइ एनीगदेदा पाङ्ला, थे होसे थेदा हो म्हन्सी तिगै आपिन्सैनोन थेसे हीबाला हीबान लमाहेन्से थे रेःसी थेदा तोःतेधोना पिन्ना।

^९“थेतबासेलमा एनीगदेसे डाला ताम ड्यान्गो, हीसम पिन्ना, म्हाइसम स्याप्ला ओच्छे प्रापरी ढ्वक ढ्वक लसम एनीगदेला लागिरी प्राप ठोङ्सी पिन्ना। ^{१०}तिगदा भिसम जुन म्हिसे हीला थेदा पिन्ना, ओच्छे जुन म्हिसे म्हाइला थेसे स्याप्ला ओच्छे जुन म्हिसे प्रापरी ढ्वाक ढ्वाक लला थेदा प्राप ठोङ्सी पिन्ना।

^{११}“ओच्छे एनीगदे न्हडरी खाल्ला आबासे चा हाडला कोलासे गेड

११:२ चु पदरी ग्रीक बाइबलरी “हाडला छानदा मान लगै” भिसी भिबा मुला। तर मुल अर्थ चा परमेश्वरदा मान तगै भिबा हिन्ना।

ह्रीमा युडबा, ताडा ह्रीमा पुख्री,
 १२ओच्छे नागाफुम ह्रीमा बिच्छी
 पिन्ना? आपिन। १३एनीगदे पापी
 तसीनोन हाडला कोलागदेदा ज्यबा
 स्हे पिन्बारी सेमुला भिसम एनीगदेला
 स्वर्गरी मुबा परमेश्वर आबासे थेदेन
 छ्याम ह्रीबागदेदा गाते ल्हाना लसी
 हाडला आत्मा पिन्ना।”

येशूदेन म्हडला ग्ले बालजिबुल

मत्ती १२:२२-२६, ४३-४५;

मर्कुस ३:२०-२७

१४येशूसे म्हडसे स्याप्सी ताड दोबा
 म्हिला लहुङ्ग्याम थे ताड दोना लबा
 म्हड ताप्जी। जमाहेन्से थे म्हिसे ताम
 पाङ्बारी छ्याडबा म्राङ्सी थेरी मुबा
 म्हिगदे उदेक तजी। १५तर थेनीगदे
 न्हडरी कोइ कोइसे “चु म्हिसे
 मी म्हडगदेला ग्ले बालजिबुलला
 शक्तिग्याम जे म्हडगदे ताप्बा हिन्ना”
 भिसी भिजी। १६ओच्छे स्थान्दो कोइ
 कोइसे चा येशूला सेम च्याबाला
 लागिरी “डन्दा स्वर्गला चिनु गिक
 उन्सी पिन्नो” भिसी भिजी।

१७तर येशूसे थेनीगदेला सेमला ताम
 था याङ्सी थेनीगदेदा “च्यागो, जुन
 यहुल्साला म्हिगदे हाड हाड न्हडरी
 तोबा छेबा लला, थे यहुल्सा नाश
 तला, ओच्छे जुन दिमला म्हिगदे हाड
 हाड न्हडरीन तोबा छेबा लला, थे
 दिमएनोन फुप्ला।” १८थेतबासेलमा
 शैतानएनोन हाड हाड न्हडरी
 आढिकनी भिसम खाहङ् लसी थेला

यहुल्सा टुला? तिग्दा भिसम एनीगदेसे
 डादा बालजिबुलला शक्तिग्याम
 म्हड ताप्बा मुला भिसी भिबा मुला।
 १९डाइ बालजिबुलला शक्तिग्याम
 म्हड ताप्मुला भिसम एनीगदेला
 चेलागदेसे चा खाल्ला शक्तिग्याम
 म्हड ताप्बा हिन्ना? थेतबासेलमा
 एनीगदेला गल्ती थेनीगदेसेन उन्ना।
 २०तर डाइ परमेश्वरला शक्तिग्याम
 म्हड ताप्बा मुला भिसम एनीगदेला
 गुडरी परमेश्वरला यहुल्सा खसी
 जिन्बा मुला।

२१ओच्छे भड्बा म्हिसे हतियार
 थोसी हाडला दिम खुङ्जी भिसम
 थेला मालसामान खालैसे भोरआखम।
 २२तर थे भन्दान भड्बा म्हि खजी
 भिसम थेदा ढासी थेसे भर लबा
 जम्मान हतियारगदे ब्यन्ना, ओच्छे
 थेला जम्मान मालसामान ब्यन्सी
 जम्मादान भो लसी पिन्ना। २३जुन म्हि
 डादेन छ्याम आढिक, थे म्हि डाला
 बिरोधी तला। ओच्छे जुन म्हिसे
 डादेन छ्याम गे आल थे म्हिसे डाला
 बिरोधरी गे लला।

डाच्छा थोन्सी निबा म्हड दोःसी खमाहेन्से

मत्ती १२:४३-४५

२४“म्हड म्हिला लहुङ्ग्याम थोन्सी
 निमाहेन्से थेसे ब्लप्बा न्हबारी
 तोडतोडबा ग्लारीक्यार ग्ला म्हाइसी
 भ्रला, तर थेसे खानडएनोन ब्लप्बा
 न्हबा ग्ला आयाङ्माहेन्से ‘डा जुन

म्हिला ल्हुङ्ग्याम थोन्सी खजी थेनोन
म्हिला ल्हुङ्गरी चिबारी निङ्' भिसी
दोःसी निला। ^{२५}ओच्छे थे म्हड दोःसी
खमा थेसे डाच्छा हाड चिबा ग्ला
साडसाडबा म्राङ्ला। ^{२६}जमाहेन्से
थे म्हड निसी हाड भन्दा नइबा अर्गु
गोर निस म्हडगदे भसी थे म्हि न्हङरी
वाङ्सी चिमुला। थेतबासेलमा थे
म्हिला गति डाच्छाला भन्दा लिच्छाला
गति भन नइबा तला।”

सुख याङ्बागदे

^{२७}येशूसे चु ताम सुङ्बान लमा
म्हिला हुल न्हङ्ग्याम क्रिङ्बान
प्रिङ्महेमे गिकसे “हाडदा न्हसी इहे
रूवाबा आमासे परमेश्वरग्याम मोलम
याङ्बा मुला,” भिसी भिजी। ^{२८}तर
येशूसे “जुन म्हिसे परमेश्वरला बचन
ङ्यान्सी परमेश्वरसे कुल्बा अन्छार
लला, थे म्हिसे परमेश्वरग्याम भन
मोलम याङ्ला,” भिसी सुङ्जी।

म्हिंगदेसे चिनु म्हाइबा

मत्ती १२:३८-४२

^{२९}येशूला क्युर्नोन म्हिला हुल
तमाहेन्से येशूसे थेनीगदेदा चुहङ् भिसी
सुङ्जी, “एनीगदे दान्देला म्हिंगदे
खाहङ्बा नइबा म्हि! उदेकला चिनु जे
म्हाइबा। तर योना अगमवक्ताला चिनु
बाहेक अर्गु चिनु आउन। ^{३०}निनवे
शहरला म्हिंगदेला लागिरी योना चिनु
तबा हङ्गोन परमेश्वरसे पुङ्खबा
म्हि दान्देला म्हिंगदेला लागिरी

चिनु हिन्ना। ^{३१}निसाफ लबा धुङ्गरी
ल्होङ्ग्याम खबा ग्लेस्यासे दान्देला
म्हिंगदेला दोष उन्ना, तिगदा भिसम
थे सोलोमन ग्लेला ज्ञान बुद्धिला ताम
ङ्यान्बारी ल्हानान थारेङ्ग्याम खबा
मुबा। तर च्यागो, चुरी सोलोमन ग्ले
भन्दा घेन म्हि मुसैनोन थेला ताम
आङ्ग्यान्नी। ^{३२}निसाफ लबा धुङ्गरी
निनवे शहरला म्हिंगदे रेःसी दान्देला
म्हिंगदेला दोष उन्ना। तिगदा भिसम
योना अगमवक्तासे पाङ्बा ताम
ङ्यान्सी थेनीगदेसे हाड हाङ्ला पाप
रूलासी परमेश्वरपट्टि दोःबा मुबा। तर
च्यागो, चुरी योना अगमवक्ता भन्दा
घेन म्हि गिक मुला।

ल्हुङ्ला नाडसल

मत्ती ५:१५; ६:२२-२३

^{३३}“खालैसे नाडसल म्रासी फामसे
घप्सी आथान, ओच्छे छुम्सीनोन
आथान। बरु दिम न्हङरी खबा
म्हिंगदेदा य्हाल तगै भिसी नोबा ग्लारी
थान्ना। ^{३४}एला मी एला ल्हुङ्ला
लागिरी नाडसल हङ्बान हिन्ना।
एला मी ज्यबा मुसम एसे ज्यना लसी
म्राङ्ला। तर एला मी ज्यबा आरेसम
एसे तिगै म्राङ्बारी आखम ओच्छे ए
धोपधोपरी भ्रतोःला। ^{३५}थेतबासेलमा
ए होशियार तउ, तिगदा भिसम एला
ल्हुङ्गरी मुबा नाडसल सिसी धोपधोप
थातगै। ^{३६}चुदे एनीगदेला ल्हुङ्गरी तिगै
धोपधोप आतना जम्मान ल्हुङ्ग य्हाल
तजी भिसम नाडसलसे एनीगदेदा

य्हाल तना लबा हड्‌नोन एनीगदेला
पूरान लहुइ य्हाल तला।”

येशूसे फरिसीदेन यहूदी धर्मगुरुगदेला दोष उन्बा

मती २३:१-३६; मर्कस १२:३८-४०

३७ येशूसे चुहड् सुड्‌सी जिन्माहेन्से
फरिसी गिकसे येशूदा सोल
छ्योइबारी हाडला दिमरी ड्योइजी।
जमाहेन्से येशू थेला दिमरी फेप्सी सोल
छ्योइबारी धन्छयाजी। ३८ तर येशूसे
छ्या आस्याल्ना^१ सोल्बा म्राड्‌सी थे
फरिसी उदेक तजी।

३९ थे उदेक तबा म्राड्‌सी प्रभुसे थेदा
चुहड्‌भिसी सुड्‌जी, “एनी फरिसीगदेसे
खोरेदेन खाबांला पाखापट्टि म्याप्सी
चोखो स्होबा हड्‌लसी एनीगदेएनोन
म्हिदा उन्बारी चोखो दोबा स्होमुला।
तर एनीगदेला सेम लोभदेन नइबा
तामसे प्लिड्‌बा तमुला। ४० एनीगदे
खाहड्‌बा मूर्ख म्हि, जुनसे पाखापट्टि
स्होजी, थेसेन न्हडपट्टिनोन स्होबा
आहिन? ४१ एनीगदेदेन छ्याम मुबा
स्हेगदे प्राडबोगदेदा पिन्गो। जमाहेन्से
एनीगदेला लागिरी जम्मान स्हे चोखो
तला। ४२ परमेश्वरग्याम सजाय
याड्‌तो:बा फरिसीगदे, एनीगदेसे
परमेश्वरदा बाबरीदेन जिरा ओच्छे
अर्गु मसलाला दोडला भो च्युइला
भो गिक मी पिन्मुला, तर एनीगदेसे

म्हिगदेदा ठीक निसाफदेन परमेश्वरदा
लतो:बा मायाला भिसम तिगै वास्ता
आलमुला। तर एनीगदेसे चु गे न्हीनोन
लतो:बा मुबा। ४३ परमेश्वरग्याम
सजाय याड्‌बा फरिसीगदे, एनीगदेसे
यहूदीगदे हुप तबा दिमला मुल
ठिरी चिबारीदेन बजाररी स्थान्दो
म्हिगदेसे मान लगै भिसी सेम
लमुला। ४४ परमेश्वरग्याम सजाय
याड्‌तो:बागदे, एनीगदे म्हिगदेसे
आम्राड्‌बा धुर्सा हड्‌बान हिन्ना।
थेतबासेलमा म्हिगदेसे था आयाड्‌ना
चुहड्‌बा धुर्साथोरी भ्रमुला।”

४५ ओच्छे यहूदी धर्मगुरुगदे न्हडला
गिकसे येशूदा “गुरु हाडसे चुहड्‌
सुड्‌सी डन्नाएनोन बेइज्जत लबा
मुला” भिसी भिमा, ४६ येशूसे चुहड्‌
भिसी सुड्‌जी, “एनी धर्मगुरुगदेएनोन
परमेश्वरग्याम सजाय याड्‌तो:बा
म्हिगदे हिन्ना। तिगदा भिसम एनीगदेसे
म्हिगदेदा पुइनोन आखम्बा धोइ
काप्बा मुला। तर एनीगदेसे चा या
जुम्बीसेनोन आथुर्मुला।

४७ “परमेश्वरग्याम सजाय याड्‌-
तो:बा म्हिगदे, एनीगदेसे हाडला आखे
म्हेमेगदेसे साइबा अगमवक्तागदेला
धुर्सा स्होबा मुला। ४८ तर एनीगदेला
आखे म्हेमेसे तिग लमुबा थे
एनीगदेला गेग्यामसेन उन्बा मुला।
ओच्छे थेन्ना गेदेन एनीगदेला गे

११:३८ यहूदीला ठिम अन्छार या आखुना चबा म्हिदा परमेश्वरला डाच्छा अशुद्ध भिसी
म्हन्मुबा।

ढिक्बा मुला। तिग्दा भिसम थेनीगदेसे अगमवक्तागदेदा साइजी, ओच्छे एनीगदेसे चा म्हिदा उन्बाला लागिरी अगमवक्तागदेला धुर्सा स्होबा मुला।^{४६}थेतबासेलमा परमेश्वरसे हाडला ज्ञान बुद्धियाम चुहङ् भिसी सुङ्बा मुला, ‘डाइ थेनीगदे मुबा ग्लारी अगमवक्तादेन मुल चेला पुइखला थेनीगदेसे कोइदा साइला कोइदा ल्हानान दुख पिन्ना।’^{४०}थेतबासेलमा जम्बुलिङ छ्यामाहेन्से दान्देधोना साइबा अगमवक्तागदेला सजाय दान्देला म्हिगदेसे याङ्ला।^{४१}ओच्छे हाबिलहेन्से परमेश्वरला मन्दिर न्हडला चोखो ग्लादेन धूप म्राबा ग्लाला गुडरी साइबा जकरियाधोनाला सजाय दान्देला म्हिगदेला थोबोरी खला।^{४२}“परमेश्वरग्याम सजाय याङ्तो:बा यहूदी धर्मगुरुगदे, एनीगदेदेन छ्याम परमेश्वरला ज्ञान, बुद्धिला म्राप ठोङ्बा साँचो मुला। तसैनोन एनीगदे न्हडरी आवाङ्नी ओच्छे न्हडरी वाङ्बारी म्हाइबा म्हिगदेदाएनोन वाङ्आपुङ्नी।”

^{४३}येशू थेग्याम थोन्सी फेण्बारी छ्याइमा यहूदी धर्मगुरुगदेदेन फरिसीगदेसे येशूदा ल्हानान बिरोध लसी ल्हानान तामगदे ड्योइबारी छ्याइजी।^{४४}येशूसे जोहाब पिन्मा खानडै गलती स्याप्ला वा भिसी थेनीगदेसे दाउ च्यासी चिजी।

चेलागदेदा होशियार तना लबा

मत्ती १०:२६-३३

१२ थे धुइरी थेरी भ्यासीन भ्याबारी आखम्बाधोनाला म्हिगदे पोप तबासे लमा गिकसे गिकदा नाङ्बारी छ्याइजी, ओच्छे जम्मान भन्दा डाच्छा येशूसे हाडला चेलागदेदा चुहङ् भिसी सुङ्बारी छ्याइजी, “एनीगदे फरिसीगदेला खमीरग्याम जोगब तसी चिउ। थे खमीर चा थेनीगदेसे म्हन्बा कप्टी ताम हिन्ना।^{*} ^२घप्सी आम्राङ्बा स्हे तिगै आरे, ओच्छे छुम्सी था आयाङ्बा स्हे तिगै आरे।^{*} ^३थेतबासेलमा जुन ताम एनीगदेसे धोपधोपरी पाङ्ला थे ताम य्हाल तमा थे:ला। ओच्छे दिम न्हडरी सा ताम लसी पाङ्बा ताम दिमला धुरीग्याम थे:ना लला।

खाल म्राङ्सी लोङ्तो:बा?

मत्ती १०:२८-३३; १२:३२

^४येशूसे दो:सी चुहङ् भिसी सुङ्जी, “डाला होगदे ड्यान्गो, एनीगदे हाडदा साइबा म्हे म्राङ्सी थालोङ्गो। तिग्दा भिसम थेसे एनीगदेला ल्हुइदा जे साइला, तर आत्मादा चा साइबारी आखम।^५तर एनीगदे खाल्देन छ्याम लोङ्तो:ला थे ताम ड्यान्गो, जुनदेन छ्याम एनीगदेदा साइसी नर्गरी भ्याङ्बा शक्ति मुला, थे म्राङ्सी जे

लोड्गो। ६तिग डबल न्हीरी च्युर्गन डा ग्लुबारी आखम? खम्ला। तसैनोन थे न्हडला गिकदाएनोन परमेश्वरसे आम्ले:। ७ओच्छे एनीगदेला थोबोला क्राएनोन परमेश्वरसे भ्यासी जिन्बा मुला। थेतबासेलमा एनीगदे थालोड्गो। तिगदा भिसम थे ल्हानान च्युर्गनगदे भन्दा मी एनीगदे ल्हानान घेन मुला।

स्य्हान्दोगदेदा ख्रीष्टला बारेरी पाङ्बा

मत्ती १०:३२-३३

८“डाला ताम ड्यानो, जुन म्हिसे डादा म्हिला ओन्छाडरी सेमहेन्से प्रभु भिसी पाङ्ला, परमेश्वरसे पुइखबा म्हिसेनोन थेदा परमेश्वरला दूतगदेला ओन्छाडरी चु हाडलान हिन्ना भिसी पाङ्ला। ९तर जुन म्हिसे म्हिगदेला ओन्छाडरी डादा डाइ थेदा डोसेबा आरे भिसी भिला, डाइएनोन परमेश्वरला दूतगदेला ओन्छाडरी थेदा डोसेबान आरे भिसी पाङ्ला। १०च्यागो, जुन म्हिसे परमेश्वरसे पुइखबा म्हिला बिरोधरी ताम लला, थेसे माफ याङ्ला। तर परमेश्वरला आत्माला बिरोधरी ताम लबा म्हिसे खाडमै माफ आयाङ्।*

११“म्हिगदेसे एनीगदेदा चुङ्सी यहूदीगदे हुप तबा दिमला नेतादेन शासन लबा म्हिगदे ओच्छे न्यायाधीश

मुबा ग्लारी भोर्बा धुइरी खाहङ् लसी जोहाब पिन्बा भिसी एनीगदेसे धन्दा सुर्दा थालउ।* १२तिगदा भिसम थे धुइरी खाहङ् लसी जोहाब पिन्तो:ला भिसी एनीगदेदा परमेश्वरला आत्मासेन लोप्ला।”

मूर्ख फ्युकपो म्हिला उखान

१३म्हिला हुल न्हङ्ग्याम म्हि गिकसे येशूदा “गुरु, डाला ज्योज्योदा अंश भो लसी पिन्गो भिसी सुङ्सी पिन्नो” भिसी भिमा, १४येशूसे थेदा “एनीगदेला निसाफ लबादेन अंश भो लसी पिन्बारी डादा खाल्से अधिकार पिन्बा मुला” भिसी सुङ्जी। १५ओच्छे येशूसे थेनीगदेदा “एनीगदे होशियार तसी लोभ्याम जोगब तसी चिउ। तिगदा भिसम म्हिदेन छ्याम जतिन धन सम्पत्ति मुसैनोन थेसे म्हिदा सत्यला जुनी आपिन” भिसी सुङ्बान, १६थेनीगदेदा उखान गिक सुङ्जी, “ग्ला गिकरी फ्युकपो म्हि गिक मुबा, थेला बुरी ल्हानान बाली रोजी। १७थे फ्युकपो म्हिसे सेम सेमरी चुहङ् भिजी, ‘डादेन छ्याम बाली थान्बा ग्ला आरे, डाइ तिग लसे?’ १८ओच्छे थेसे चुहङ् भिजी, ‘दाहेन्से डाइ चुहङ् लला, जम्मान दुकुटीगदे फुप्सी घेन घेन स्होला, ओच्छे जम्मान बालीदेन मालसामान थेरीन थान्ना।

१२:१० मत्ती १२:३२; मर्कू ३:२६

१२:११-१२ मत्ती १०:१६-२०; मर्कू १३:११; लूका २१:१४-१५

१६ओच्छे थेसे हाडला सेम न्हड न्हडरी चुहङ् भिसी भिजी, “डाइ ल्हानान दिडधोनादा छ्योबा बाली पोप लबा मुला। थेतबासेलमा डा सुख शान्तिरी चबा थुङ्बादेन मोजमजा लसी चिला।”

२०“तर परमेश्वरसे थेदा ‘मूर्ख, तिनी म्हुनडनोन एला प्राण डाइ किन्ना, एसे पोप लसी थान्बा धन सम्पत्ति खाल्से चला?’ भिसी सुङ्जी।”

२१चु उखान सुङ्सी जिन्माहेन्से येशूसे “हाडला लागिरी धन सम्पत्ति पोप लबा म्हिला गति चुहङ्बान तला। परमेश्वरसे चुहङ्बा म्हिगदेदा फ्युकपो आम्हन्मुला” भिसी सुङ्जी।

धन्दा सुर्दा थालउ

मत्ती ६:२५-३४

२२जमाहेन्से येशूसे हाडला चेलागदेदा चुहङ् भिसी सुङ्जी, “थेतबासेलमा एनीगदेसे डाला ताम ड्यान्गो, ‘सोबाला लागिरी तिग चसे, तिग क्वान्से भिसी धन्दा सुर्दा थालउ।’ २३तिगदा भिसम चबा थुङ्बादेन क्वान्बा भन्दा एनीगदेला प्राणदेन ल्हुइ घेन हिन्ना। २४एनीगदेसे कावागदेदा च्यागो! थेनीगदेसे न्ह कमाइ लला, न्ह बाली धुइला, न्ह थेनीगदेला ढुकुटीन मुला। तसैनोन परमेश्वरसे थेनीगदेदा चबा स्हे पिन्बान मुला। एनीगदे मी चरागदे भन्दा ल्हानान

घेन मुला। २५एनीगदे न्हडरी खाल्से धन्दा सुर्दा लसी छिन्नडला लागिरी आयू काप्खम्ला? २६चुदे जजा गे मी लआखम्मुला भिसम तिगदा एनीगदे अर्गु तामला धन्दा सुर्दा लबा?

२७“एनीगदेसे म्हेन्दोदा च्यागो, थेनीगदेसे न्ह गे लला, न्ह क्वान राला। तर च्यागो, सोलोमन ग्लेदेन छ्याम ल्हानान धन सम्पत्ति मुसैनोन थे म्हेन्दो तेएनोन जेबा आरेमुबा।* २८तिनी ल्हेबान निसी न्हङगर खर्माहेन्से मेरी फर्बा छेदा मी परमेश्वरसे चुहङ् लसी जेना लमुला भिसम भन एनीगदेदा परमेश्वरसे गाते जेना लला? खाइ एनीगदेला विश्वास? २९थेतबासेलमा एनीगदेसे तिग चबा, तिग थुङ्बा भिसी धन्दा सुर्दा लसी म्हाइसी थाभ्रउ। ३०तिगदा भिसम परमेश्वरदा डोआसेबा जम्बुलिडला म्हिगदेसे चा चुहङ् लसी धन्दा सुर्दा लमुला। तर एनीगदेदा चु जम्मान स्हे तोःला भिसी परमेश्वर आबादा था मुला। ३१थेतबासेलमा डाच्छा परमेश्वरला य्हुल्सा म्हाइगो। जमाहेन्से परमेश्वरसे एनीगदेदा चु जम्मान स्हे पिन्ना।”

हाडला लागिरी स्वर्गरी धन सम्पत्ति सोसी थान्गो

मत्ती ६:१९-२१

३२दोःसी येशूसे चुहङ् भिसी सुङ्जी, “डाला कोलागदे, एनीगदे थालोङ्गो!

तिग्दा भिसम एनीगदेला परमेश्वर आबा ल्हानान ताङ्सी एनीगदेदा थेसे हाडला यहुल्सा पिन्बारी छ्याइबा मुला। ^{३३}थेतबासेलमा एनीगदेसे हाडदेन छ्याम मुबा धन सम्पत्ति चूङ्सी खबा टाङ्गा प्राडबोगदेदा भो लसी पिन्गो। ओच्छे खाइमै आन्होङ्बा दुकुटी स्होसी हाडला लागिरी स्वर्गरी धन सम्पत्ति सोसी थान्गो। थेरी य्होएनोन आख, बुलुङसेनोन आच। ^{३४}तिग्दा भिसम जुन ग्लारी एनीगदेला धन सम्पत्ति मुला, एनीगदेला सेमएनोन थेरीन तला।”

छोर्सी चिउ

मत्ती २४:४२-५१; मार्कस १३:३२-३७

^{३५}दोःसी येशूसे थेनीगदेदा चुहङ् भिसी सुङ्जी, “एनीगदे हाडला क्वान क्वान्सी नाडसल म्रासी तयार लसी चिउ।” ^{३६}ओच्छे एनीगदे ब्याहला भोजरी निसी खबा मालिकदा भ्रान्सी चिबा नोकर हङ्बान तउ। तिग्दा भिसम मालिक खसी म्राप ढ्वक ढ्वक लमैछ्याम थेनीगदेसे हाडला मालिकदा म्राप ठोङ्सी पिन्मुला। ^{३७}च्यागो, थे नोकरगदे गाते ताङ्म्याङ्ला, हाडला मालिक खबा धुइरी थेनीगदेदा छोर्सी चिबा म्राङ्जी। थेतबासेलमा थेसे केः खीसी हाडला नोकरगदेदा चबा स्हे पिन्ना। ^{३८}थे नोकरगदे गाते ताङ्म्याङ्ला, मालिक

म्हुन गुइरी अथवा स्थो तबा धुइरी खसैनोन हाडला नोकरगदे छोर्सी चिबा म्राङ्जी। ^{३९}तर एनीगदेसे चु तामएनोन था याङ्गो, दिमला म्हिसे य्हो खबा धुइ था याङ्सम थेसे हाडला दिम न्हडरी य्हो वाङ्आपुङ्। ^{४०}थेहङ् लसीन एनीगदेएनोन होशियार तसी छोर्सी चिउ। तिग्दा भिसम परमेश्वरसे पुइखबा म्हिएनोन एनीगदेसे आम्हन्बा धुइरी खला।

ज्यबा गे लबा नोकरदेन आज्यबा गे लबा नोकर

मत्ती २४:४५-५१

^{४१}जमाहेन्से पत्रुससे येशूदा “प्रभु, चु उखान डन्ना लागिरी जे सुङ्बा कि स्थान्दो म्हिगदेला लागिरीनोन सुङ्बा हिन्ना?” भिसी ड्योइमा, ^{४२}प्रभुसे थेदा चुहङ् भिसी सुङ्जी, “दिमरी गे लबा बुद्धि मुबादेन भर्तुप्पा म्हि खाल हिन्ना? मालिकसे दिमला स्थान्दो नोकरगदेदा ठीक ठीक धुइरी चबा थुङ्बा ढिकना लसी पिन्बारी जिम्मा पिन्थान्जी।” ^{४३}मालिक दोःसी खबा धुइरीनोन थेसे मालिकसे कुल्सी थान्बा हङ् लसी गे लबा म्राङ्जी भिसम इनाम याङ्बा नोकर थेनोन हिन्ना। ^{४४}च्यागो, एनीगदेसे डाला ताम ड्यान्गो, मालिकसे थेहङ्बा नोकरदा हाडला जम्मान धन सम्पत्ति जिम्मा पिन्ना। ^{४५}तर थे आज्यबा नोकरसे

‘डाला मालिक योनान आख’ भिसी म्हन्सी, ड्य्होइबा म्हिगदेदेन छ्याम चिसी चबा थुड्बा लसी ह्राडदेन छ्यामनोन गे लबा नोकरगदेदा तोबा ग्याड्बा लजी भिसम, ^{४६}थेला मालिक थेसे आम्हन्बा धिनदेन धुइरी धोखसी मालिकसे थेदा ल्हानान सजाय पिन्ना। ओच्छे थेदा परमेश्वरदा विश्वास आलबा म्हिगदे मुबा ग्लारी भ्याड्ला।

^{४७}“ह्राडला दिमला मालिकला सेमला ताम था याइसीनोन सेम निबा गे आलबा नोकरसे तोबा चला। ^{४८}तर ह्राडला मालिकला सेमला ताम था आयाइना तोबा चबा खाल्ला गे लसैनोन थे नोकरदा ल्हाना आतोः। ओच्छे जुन म्हिदा ल्हाना पिन्बा मुला थेसेनोन ल्हानान पिन्तोःला। थेहड् लसीन जुन म्हिदा ल्हानान जिम्मा पिन्बा मुला थेदेन छ्याम ल्हानान किन्ना।

थेमे न्हडरी बिरोध लबा

मत्ती १०:३४-३६

^{४९}“च्यागो, डा जम्बुलिडरी मे सल्कब लबारी खबा हिन्ना। बरु डाच्छान सल्कब तबा हिन्सै तसेला मुबा। ^{५०}डाइ दुखला बप्तिस्मा किन्तोःबा मुला, थे बप्तिस्मा आकिन्तेधोना डादा शान्ति आत।* ^{५१}तिग एनीगदेसे डा जम्बुलिडरी म्हिगदेदा ढिक्ना लबारी खबा भिसी

म्हन्बा? आहिन, डा मी एनीगदेदा फेना लबारी खबा हिन्ना। ^{५२}दाहेन्से गोर डा म्हिला थेमे ह्राड ह्राड न्हडरी फेला। ओच्छे न्हीला बिरोधरी सोम, सोमला बिरोधरी न्ही रेःला। ^{५३}थेहड् लसीन आबाला बिरोधरी भा, भाला बिरोधरी आबा, आमाला बिरोधरी भामे, भामेला बिरोधरी आमा ओच्छे स्युमीला बिरोधरी चाड, चाडला बिरोधरी स्युमी रेःला।”*

धुइ च्यासी भ्रतोःबा

मत्ती १६:२-३; ५:२५-२६

^{५४}जमाहेन्से म्हिला हुलदाएनोन येशूसे चुहड् भिसी सुड्जी, “जम्बुलिडला न्हुपग्याम खसु थोन्माहेन्से ‘दाहेन्से नाम खला’ भिसी एनीगदेसे भिमुला, ओच्छे थेहड् नोन तमुला। ^{५५}थेहड् लसीन जम्बुलिडला ल्होपट्टिसे लाबा खबारी छ्याइमाहेन्से ‘दाहेन्से छेप्बा छला’ भिसी एनीगदेसे भिमुला, ओच्छे थेहड् नोन तमुला। ^{५६}कप्टीगदे, एनीगदेसे सदेन मुरी च्यासी तिग तबारी छ्याइबा मुला भिबा ताम चा था याइमुला। तर दान्दे तिग तबारी छ्याइबा मुला भिबा ताम चा तिगदा था आयाइबा?

^{५७}“डाइ लबा गे ठीक मुला कि आरे’ भिसी एनीगदेसे तिगदा पक्का आलबा? ^{५८}खालैसे एदा मुद्दा युसी न्यायाधीश मुबा ग्लारी भोजी भिसम,

थे म्हिदेन छ्याम ग्यामरीन ढिक्गो।
आहिनसम थेसे एदा न्यायाधीशला
डाच्छापट्टि राप्पुङ्ला। ओच्छे
न्यायाधीशसे सिपाहीगदेला यारी
जिम्मा पिन्ना। जमाहेन्से सिपाहीगदेसे
भोर्सी भ्याल्खानरी भाङ्ला। ५६ एसे
डाला ताम ड्यान्गो, एसे जम्मान
टाङ्गा आफातेधोना थेग्याम थोन्बारी
आम्याङ्।”

पाप ख्लासी परमेश्वरपट्टि दोःबा

१३ थेनोन धुइरी थेरी मुबा
कोइ कोइ म्हिगदेसे
येशूदा चुहङ् भिसी पाङ्जी।
गालीलला म्हिगदेसे परमेश्वरदा
बलि फुल्बान लमा पिलातस भिबा
रोमी अञ्चलाधीशसे थेनीगदेदान
साङ्जी। ओच्छे थेनीगदेला काएनोन
पशुला कादेन छ्याम दोङ्जी।
२ जमाहेन्से येशूसे थेनीगदेदा चुहङ्
भिसी जोहाब पिन्जी, “थे गालीलला
म्हिगदेसे चुहङ् लसी दुख नाजी
भिदेमा एनीगदेसे चु गालीलला
म्हिगदेदा स्थहान्दोगदे भन्दा ल्हानान
पापी मुला भिसी म्हन्बा? ३ आहिन,
एनीगदेसे डाला ताम ड्यान्गो, तिग्दा
भिसम एनीगदेसे हाङ हाङला पाप
ख्लासी परमेश्वरपट्टि आदोःनी भिसम
एनीगदेएनोन थेहङ् लसीन नाश तला।
४ थेहङ् लसीन सिलोआम भिबा
गलाला धरहरा गुर्सी सिबा च्युक भ्रेः
म्हिगदे तिग यरूशलेमला स्थहान्दो
म्हिगदे भन्दा पापी मुबा भिसी म्हन्बा?



अञ्जीरला दोङ (१३:६)

५ आहिन, डाला ताम ड्यान्गो, तिग्दा
भिसम एनीगदेसे हाङ हाङला पाप
ख्लासी परमेश्वरपट्टि आदोःनी भिसम
एनीगदेएनोन थेहङ् लसीन नाश
तला।”

तिगै आरोबा दोङला उखान

६ जमाहेन्से येशूसे थेनीगदेदा उखान
गिक सुङ्जी, “म्हि गिकसे वारीरी
अञ्जीरला दोङ सूबा मुबा। थे म्हिसे
थे अञ्जीरला दोङरी अञ्जीर रोजी वा
भिसी च्याबारी खमा तिगै आस्याप्नी।
७ थेतबासेलमा थेसे हाङला वारीरी
गे लबा म्हिदा ‘डाइ अञ्जीर रोला
वा भिसी च्याबा सोम दिङ तजी,
तर दान्देधोना आरोनी। दाहेन्से चुदा
थासी भ्याङ्गो’ भिसी भिमा, ८ थे गे
लबा म्हिसे ‘अभ तिदिङ भ्रान्गो,
डाइ चु दोङला क्यारक्युर ख्वसी सार
युला। ९ ओते लसीनोन आरोनी भिसम

हाडसे चु दोड थासी भ्याङ्खम्ला' भिसी भिजी।”

येशूसे कुब्रे तबा म्रिडम्हेमेदा खम्ना लबा

१० येशूसे ब्लप्बा न्हबा धिनकुनु^१ यहूदीगदे हुप तबा दिमरी लोप्बान मुबा। ११ थेरी म्हडसे स्याप्सी कुब्रे तबा म्रिडम्हेमे गिक मुबा। थे खाइमै सिधा तसी भ्रबारी आखम्मुबा। थे थेहङ् तबा च्युक भ्रे: दिड तबा मुबा। १२ येशूसे थे म्रिडम्हेमेदा म्राङ्सी हाडला डामरी ड्योडसी, “दाहेन्से ए खम्जी” भिसी सुङ्जी। १३ ओच्छे थेथोरी येशूसे हाडला छ्या थान्मैछ्याम थे कुब्रे तबा म्रिडम्हेमे खम्जी। जमाहेन्से थे म्रिडम्हेमेसे परमेश्वरला जयजयकार लबारी छ्याइजी।

१४ येशूसे थे म्रिडम्हेमेदा ब्लप्बा न्हबा धिनकुनु खम्ना लबा म्राङ्सी यहूदीगदे हुप तबा दिमला नेता बोमो खसी, “म्हिगदेदा गे लबा धिन साता गिकरी ढुरे मुनोन मुला। थेतबासेलमा चु ढुरे न्हडरी खसी खम्ना लउ, ब्लप्बा न्हबा धिनकुनु आहिन” भिसी भिजी।*

१५ प्रभुसे थेदा चुहङ् भिसी सुङ्जी, “कण्टी, तिग एनीगदेसे ब्लप्बा न्हबा धिनकुनु म्हे मुइदेन गधादा ब्लसी क्युइ ख्वाबारी आभोर्मुला?

१६ चु अब्राहामला सन्तानदा च्युक भ्रे: दिडधोना शैतानसे आख्लाबा मुबा भिसम, तिनी ब्लप्बा न्हबा धिनकुनु एनोन खम्ना लतो:बा आहिन?” १७ येशूसे चुहङ् लसी जोहाब पिन्बा म्राङ्सी, येशूला बिरोधीगदे पे:जी। तर थेरी मुबा म्हिगदे चा येशूसे लबा उदेकला गे म्राङ्सी ताङ्जी।

पच्छै ब्लुदेन खमीरला उखान

मत्ती १३:३१-३३; मर्कस ४:३०-३२

१८ जमाहेन्से येशूसे थेनीगदेदा “परमेश्वरला यहुल्सादा डाइ तिगदेन छ्याम दाँजब लसे? परमेश्वरला यहुल्सा खाहङ्बा मुला भिसम, १९ चु चा पच्छै ढापला ब्लु गिक हङ्बान हिन्ना। खालै म्हिसे घुज्यानरी ढ्वमाहेन्से थे ढाप फुइसी ल्हेबान निमुला। जमाहेन्से थे पच्छै ढापला दोडला हाँगारी चरागदेसे जड स्होसी चिला” भिसी सुङ्जी।

२० दो:सी येशूसे थेनीगदेदा चुहङ् भिसी सुङ्जी, “परमेश्वरला यहुल्सादा डाइ तिगदेन छ्याम दाँजब लसे? २१ चु मी गेडरी युबा खमीर हङ्बान हिन्ना। थे खमीर म्रिडम्हेमे गिकसे फाम सोम ब्रारी युसी ज्योप्ला। ओच्छे थे ब्रा आभोतेधोना थेसे घप्सी थान्ना।”

१३:१० “ब्लप्बा न्हबा धिन” चा यहूदीगदेसे परमेश्वरला लागिरी फेसी थान्बा धिन हिन्ना।

१३:१४ प्रस्था २०:६-१०; व्यव ५:१३-१४

साडरो प्राप

मत्ती ७:१३-१४, २१-२३; ८:११-१२

२२ जमाहेन्से येशू शहर शहरदेन नाम्सा नाम्सारी फेप्सी म्हिगदेदा लोप्बान यरूशलेमरी फेप्जी। २३ थेनोन धुइरी म्हि गिकसे, “प्रभु, तिग थाबा याड्बा म्हिगदे ल्हाना आरे?” भिसी येशूदा ड्योइमा, २४ येशूसे थेरी मुबा म्हिगदेदा चुहड् भिसी सुड्जी, “च्यागो, साडरो प्रापग्याम वाड्बारी भड लउ। तिगदा भिसम ल्हानान म्हिगदे वाड्बारी म्हाइमुला, तसैनोन वाड्बारी आखम्मुला। २५ दिमला मालिक रे:सी प्राप दुड्सी जिन्माहेन्से एनीगदेसे मडग्यारग्याम ढ्वक ढ्वक लसी ‘गुरु, डन्दा प्राप ठोड्सी पिन्नो’ भिसी भिमा, थेसे एनीगदेदा ‘एनीगदे खाल हिन्ना? ओच्छे खानडग्याम खबा? डाइ एनीगदेदा डोसेबा आरे’ भिसी भिला। २६ एनीगदेसे ‘हाड डन्देन छ्यामनोन सोल्बा छ्योइबा लबा मुबा। ओच्छे डन्ना नाम्सारीक्यार हाडसे लोप्बा मुबा’ भिसी भिमा, २७ थेसे एनीगदेदा ‘एनीगदे खाल हिन्ना? डाइ डोआसेनी। थेतबासेलमा पाप गे लबागदे, एनीगदे डा मुबा ग्लाग्याम निउ’ भिसी भिला।* २८ ओच्छे

एनीगदेसे अब्राहाम, इसहाक, याकूबदेन जम्मान अगमवक्तागदेदा परमेश्वरला यहुल्सारी म्राड्मा, हाडदा चा मडग्यार भ्याड्मा क्राबा क्रिड्बा लसी स्वा क्रेला।* २९ स्यार, ल्हो, न्हुप, भ्याड जम्मान ग्लाग्यामसे म्हिगदे खसी परमेश्वरला यहुल्सारी थेदेन छ्यामनोन चबा थुड्बा लबारी चिला।* ३० तर च्यागो, दान्दे लिच्छा मुबागदे डाच्छा तला, ओच्छे दान्दे डाच्छा मुबागदे लिच्छा तला।”*

यरूशलेमदा म्राड्सी येशूदा दुख
ड्हम्बा

मत्ती २३:३७-३८

३१ थेनोन धुइरी कोइ कोइ फरिसीगदे येशू मुबा ग्लारी खसी, “हाड चुग्याम थोन्सी फेप्गो। तिगदा भिसम हाडदा हेरोदसे साइबारी छ्याइबा मुला” भिसी भिमा, ३२ येशूसे थेनीगदेदा चुहड् भिसी सुड्जी, “एनीगदे निसी थे ल्हुन्दी हड्बा छट्टुदा चुहड् भिउ, ‘तिनीदेन न्हडगर डाइ म्हाडगदे ताप्बादेन आखम्बागदेदा खम्ना लबा गे लला, ओच्छे रेनी डाला गे जिन्ना।’ ३३ ओच्छे तिनी, न्हडगर, रेनीकुनुधोनारी डा यरूशलेम शहररी धोनोन तो:ला। तिगदा भिसम यरूशलेम शहररी बाहेक अर्गु ग्लारी अगमवक्तादा आसाइ!

यरूशलेमला म्हिगदे म्राड्सी येशूदा

दुख ड्हम्बा

मती २३:३७-३८

३४ “यरूशलेमला म्हिगदे, एनीगदेसे अगमवक्तागदेदा साइला ओच्छे परमेश्वरसे एनीगदे मुबा ग्लारी पुइखबागदेदा युडबासे तोला। डाइ एनीगदेला कोलागदेदा नागा मामासे हाडला कोलागदेदा भ्याप्से घप्बा हड् लसी पोप लबारी म्हाइमा एनीगदेसे आड्यान्नी। ३५ दाहेन्से परमेश्वरसे एनीगदेला दिम खलाला। च्यागो, डाला ताम ड्यान्गो, एनीगदेसे ‘परमप्रभुला मिनरी फेप्खबादा मोलम याड्बा म्हि’ भिसी आभितेधोना डादा आप्राड्।”*

फरिसी गिकला दिमरी येशू फेप्बा

१४ येशू ब्लप्बा न्हबा धिनकुनु फरिसीगदेला नेता गिकला दिमरी सोल छ्योइबारी फेप्जी। थेरी मुबा फरिसीगदेसे येशूला चिवा लसी चिमुबा। २ थेरी टाड्बा बेथासे स्याप्बा म्हि गिक येशूला डाच्छापट्टि मुबा। ३ येशूसे यहूदी धर्मगुरुगदेदेन फरिसीगदेदा “ब्लप्बा न्हबा धिनकुनु आखम्बा म्हिदा खम्ना लबारी तला कि आत?” भिसी ड्योइमा, ४ थेनीगदे कुटिसी चिजी। ओच्छे येशूसे थे आखम्बा म्हिदा हाडला यासे थुर्सी

खम्ना लमाहेन्से “दिमरी निउ” भिसी सुड्जी।

५ जमाहेन्से येशूसे थेनीगदेदा “ब्लप्बा न्हबा धिनकुनु एनीगदेला कोलागदे अथवा ग्लाप इनार न्हडरी ताइजी भिसम तिग एनीगदेसे तुरुन्तन आते:ना चिला?” भिसी सुड्मा,* ६ थेनीगदेसे तिगै पाड्बारी आखम्नी।

हाडसे हाडदान घेन थास्होउ

७ थेरी चबा थुड्बारी खबा म्हिगदेसे मुल ठिगदे धम्सी चिबारी म्हाइबा म्राड्सी येशूसे थेनीगदेदा उखान गिक सुड्जी, ८ “खालैसे एनीगदेदा ब्याहरी निम्तो पिन्जी भिसम मुल ठिरी चिबारी थाम्हाइगो। तिग्दा भिसम थेरी एनीगदे भन्दा घेन म्हिदाएनोन निम्तो पिन्बा मुला तला। ९ एदेन थेदा निम्तो पिन्बा म्हि खसी ‘चु ग्लारी थेदा चिपुड्गो’ भिसी एदा चिबा ग्लाग्याम रे:पुड्गो। जमा ए पे:सी जम्मान भन्दा धिरी चितो:ला। १० थेतबासेलमा एसे निम्तो याड्बा धुडरी निसी जम्मान भन्दा धिला ग्लारी चिउ। जमाहेन्से एदा निम्तो पिन्बा म्हि खसी ‘तोर धन्छ्यागो’ भिसी मुल ठिरी चिपुड्गो।* थे धुडरी एदेन छ्याम चबा थुड्बारी चिबागदेला ओन्छाडरी एसे मान याड्गो। ११ तिग्दा भिसम जुन म्हिसे हाडसे हाडदान घेन स्होला थेदा जम्मान भन्दा जजा स्होला ओच्छे जुन

म्हिसे हाडसे हाडदान जजा स्होला थेदा जम्मान भन्दा घेन स्होला।”*

१२ येशूसे हाडदा निम्तो पिन्बा म्हिदाएनोन चुहङ् भिसी सुङ्जी, “एसे चबा थुङ्बारी होगदे, हाडला ज्योज्यो आलेगदे, हाडला म्हिगदेदेन फ्युकपो खिम्जेमगदेदा जे थाङ्योइगो। तिग्दा भिसम थेनीगदेसेनोन एसे हङ् लसीन निम्तो पिन्सी एला गुण फाला। १३ थेतबासेलमा एसे प्राडबोगदे, कुज्यागदेदेन मी आम्राङ्बा म्हिगदेदाएनोन इयोइगो। १४ थेहङ् लजी भिसम एसे मोलम याङ्ला। तिग्दा भिसम थेनीगदेसे एसे लबा गुण फाबारी आखम्सै परमेश्वरसे म्हन्बा अन्छारला गे लबा म्हिगदे सिबाग्याम सोबा धुइरी परमेश्वरसेन एसे लबा गुण फाला।”

भोजला उखान

मत्ती २२:१-१४

१५ येशूला ताम थे:सी येशूदेन छ्याम चबा थुङ्बा लबा म्हिगदे न्हङला गिकसे “परमेश्वरला यहुल्सारी चबा थुङ्बा लम्याङ्बागदे गाते ताङ्म्याङ्ला” भिसी भिजी। १६ जमाहेन्से येशूसे थेदा उखानग्याम चुहङ् भिसी सुङ्जी, “म्हि गिकसे घेन भोज पिन्बारी ल्हानान म्हिगदेदा निम्तो पिन्जी। १७ भोज ठीक लसी जिन्माहेन्से हाडसे निम्तो पिन्बा म्हिगदेदा जम्मान

ठीक तजी भिसी इयोइबारी हाडला नोकरदा पुङ्जी। १८ तर निम्तो याङ्बा जम्मान म्हिगदेसे निउ गिक गिक लसी चुहङ् भिबारी छ्याइजी, ‘गिकसे चा डाइ बु ग्लुबा मुला थे च्याबारी नितो:ला। थेतबासेलमा डादा माफ लउ, डा खआम्याङ्’ भिसी भिजी। १९ ओच्छे स्थान्दोसे चा ‘डाइ हल डा ग्लाप ग्लुबा मुला, तिनीन थे ग्लाप च्याबारी नितो:बा मुला। थेतबासेलमा डादा माफ लउ, डा खआम्याङ्’ भिसी भिजी। २० थेहङ् लसीन स्थान्दोसेनोन ‘डाइ भर्खर जे ब्याह लबा मुला, थेतबासेलमा डा खआम्याङ्’ भिसी भिजी। २१ नोकरसे चु ताम हाडला मालिकदा पाङ्माहेन्से दिमला मालिक बोमो खसी ‘ए शहरला ग्यामदेन गल्लीगदेरी निसी थेरी मुबा जम्मान प्राडबो, कुज्यादेन मी आम्राङ्बागदेदा इयोइसी चुरी भउ’ भिसी कुल्जी। २२ चुहङ् लसी जिन्माहेन्से नोकरसे दिमला मालिकदा ‘गुरु, हाडसे कुल्बा अन्छार डाइ जम्मादान इयोइसी भजी, तसैनोन अफ ग्ला मुला’ भिसी भिमा, २३ मालिकसे ‘ए शहरला मुल ग्यामदेन गल्ली गल्लीरी निसी म्हिगदेदा कर लसी भसी खउ। तिग्दा भिसम डाला दिम नाङ्नोन म्हिगदे तगै! २४ चु भन्दा डाच्छा निम्तो याङ्बा म्हिगदे खालैसेनोन डाला भोजला ब्रोइ म्हाङ् आम्हाङ्’ भिसी भिजी।”

चेलासे लतोःबा गे

मत्ती १०:३७-३८

२५ महिला हुल येशूदेन छ्याम निबान लबा धुइरी थेनीगदेपट्टि दोःसी येशूसे चुहङ् भिसी सुङ्जी, २६ “चुदे डादेन छ्याम भ्रजी भिसम थेसे हाडला आबा आमा, मिड, कोलागदे, ज्योज्यो आले, नाना आडा ओच्छे हाडलान ज्यानएनोन माया मारब आलनी भिसम थे डाला चेला दोआखम।* २७ जुन म्हिसे आसितेधोना हाडला दुख हाडसेन नासी† डादेन छ्याम आभ्र थे डाला चेला दोआखम।*

२८ “चुदे एनीगदे न्हडरी खालै म्हिसे धरहरा स्होबा सेम लसम थेसे धरहरा स्होसी जिन्बाधोना गाते खर्च निला भिसी डाच्छान हिसाब लतोःला। २९ थेहङ् आलनी भिसम थेसे धरहराला जग थान्सी धरहरा स्होसी जिन्ना लबारी आखम्नी भिसम चु म्हाङ्बा जम्मान म्हिगदेसे थेदा खिसी लसी, ३० “चु म्हिसे स्होबारीम छ्याइमुबा तर स्होसी जिन्ना लबारी चा आखम्नी’ भिला।

३१ “खजिबै ग्लेसे अर्गु यहुल्साला ग्लेदेन छ्याम लडाइ लबारी निमा हाडदेन छ्याम मुबा हजार च्युइ सिपाहीगदे भोर्सी हाडदेन छ्याम

लडाइ लबारी खबा बोगल गिक हजार सिपाहीदा ढाबारी खम्ला कि आखम थे डाच्छान चिसी सल्लाह आल? ३२ लडाइ लबारी आखम्नाम भिसी था याङ्माहेन्से डाच्छान ढिक्बाला लागिरी स्थान्दो ग्ले मुबा ग्लारी हाडला ग्ले ब्लोन पुइला। ३३ थेहङ् लसी एनीगदे न्हडला जुन म्हिसे डाला लागिरी जम्मान स्हे ख्लाआखम थे म्हि डाला चेला दोआखम।

चजा हङ् तबा

मत्ती ५:१३; मार्कस ९:५०

३४ “चजा ज्यबा स्हे हिन्ना, तर चजाला डम्बा स्हे निजी भिसम थेदा दोःसी तिगसे डम्मा लबा? ३५ थे चजा न्ह साप्राला लागिरी गे खेल्बा तला न्ह सारनोन तला। जमाहेन्से म्हिगदेसे थे चजा भ्याङ्ला। जुन म्हिदा ड्यान्बा सेम मुला थेसे ड्यान्सी घोड।”

म्हाबा ग्युला उखान

मत्ती १८:१२-१४

१५ तिरेकुनु तिरो दुइबा म्हिगदेदेन पापीगदे जम्मान येशूला बचन ड्यान्बारी थेला डामरी खजी। २ चु म्हाङ्सी फरिसीदेन यहूदी धर्मगुरुगदेसे “चु म्हि मी पापीगदेदेन छ्याम ढिक्सी थेनीगदेदेन छ्यामनोन

१४:२७ “हाडला दुख हाडसेन नासी” भिबादा ग्रीक बाइबलरी चा “हाडला कुस हाडसेन पुइतोःला” भिसी भ्रिबा मुला।

१४:२६ मत्ती १०:३७ १४:२७ मत्ती १०:३८; १६:२४; मार्क ८:३४; लूका ९:२३

चिसी चबा थुङ्बा लबा चीम” भिसी येशूला तामगन लबारी छ्याइजी।*

^३जमाहेन्से येशूसे थेनीगदेदा उखान गिक सुङ्जी, ^४“एनीगदे खालै म्हिला ग्यार्जा गिक ग्यु न्हडरी गिक म्हाजी भिसम थेसे बोगल बलिसे च्युक कु ग्युगदेदा ख्लासी थे म्हाबा ग्यु आस्याप्तेधोना आम्हाइ? म्हाइला। ^५थे ग्यु स्याप्माहेन्से ताङ्सी ताङ्सी थेसे बमरी पुइसी दिमरी भला। ^६ओच्छे हाडला ह्योगदेदेन खिम्जेमगदेदा ड्योइसी एनीगदेएनोन डा हङ् लसी ताङ्गो। तिग्दा भिसम ‘डाइ डाला म्हाबा ग्यु स्याप्जी’ भिसी भिला। ^७थेतबासेलमा एनीगदेसे डाला ताम ड्यान्गो, चुहङ् लसीन हाडला पाप आख्लाना डनी परमेश्वरला डाच्छा ज्यबा दोसी हाडला पाप ख्लाआतो:बा बोगल बलिसे च्युक कु म्हिगदेला लागिरी भन्दा हाडला पाप ख्लासी परमेश्वरपट्टि दो:बा म्हि गिकला लागिरी स्वर्गरी मुबागदे ल्हानान ताङ्गो।

म्हाबा डबलला उखान

^८दो:सी येशूसे उखान गिकग्याम चुहङ् भिसी सुङ्जी, “खालै म्रिडम्हेमे गिकदेन छ्याम म्हुइला गोर च्युइ डबल मुबा। थे डबल च्युइ न्हडरी डबल गिक म्हाजी भिसम थेसे थे डबल आस्याप्तेधोना नाडसल म्नासी दिम

साडसिड लसी आम्हाइ? म्हाइला। ^९ओच्छे थे म्हाबा डबल स्याप्माहेन्से थेसे हाडला ह्योगदेदेन खिम्जेमगदेदा ड्योइसी ‘एनीगदेएनोन डा हङ् लसी ताङ्गो। तिग्दा भिसम डाइ डाला म्हाबा डबल याङ्जी’ भिसी भिला। ^{१०}थेतबासेलमा एनीगदेसे डाला ताम ड्यान्गो, थेहङ् लसीन खालै म्हिसे हाडला पाप ख्लासी परमेश्वरपट्टि दो:जी भिसम थे पापी गिकला लागिरी परमेश्वरला दूतगदे परमेश्वरदेन छ्यामनोन ताङ्गो।”

म्हाबा भाला उखान

^{११}दो:सी येशूसे उखान गिक सुङ्जी, “च्यागो, म्हि गिकला भा न्ही मुबा। ^{१२}थेला भा च्याङ्बासे चा आबादा ‘डाला अंश भउ आबा’ भिसी भिजी। जमाहेन्से थेसे हाडला सम्पत्ति भा न्हीदान भो लसी पिन्जी।

^{१३}“तिगै धिन लिच्छा थे म्हिला भा च्याङ्बा हाडला जम्मान सम्पत्ति भोर्सी अर्गु यहुल्सारी निजी। थेसे थेरी मोजमजा लसी जम्मान सम्पत्ति जिन्ना लजी। ^{१४}थेला जम्मान धन सम्पत्ति जिन्बा धुइरीन थे यहुल्सारी ल्हानान अनिकाल तजी, ओच्छे थेसे ल्हानान दुख याङ्जी। ^{१५}जमाहेन्से थे, थे यहुल्साला म्हि गिक मुबा ग्लारी गे म्हाइबारी निजी। थे म्हिसे थेदा हाडला ढ्वा छबारी पुइजी। ^{१६}थेदा

खालैसे चबा थुङ्बा आपिन्बासे लमा थेसे ढ्वला दाना चसीन हाडला फो म्रेन्ना लबारी म्हाइजी।

१७ “जमाहेन्से थेसे हाडला दिम ढन्जी। ओच्छे चुहङ् भिबारी छ्याइजी, ‘डाला दिमरी डाला आबाला नोकरगदेसे म्रेन्ना चसीनोन लेङ्बाधोना चबा स्हे मुला। तर डा चा भिसम चुरी फोइथाननोन सिबारी छ्याइबा मुला। १८ दाहेन्से डा आबा मुबा ग्लारी निसी, “आबा, डाइ परमेश्वरदेन हाडला बिरोधरी पाप लजी। १९ दाहेन्से डा हाडला भा भिबाधोनाला आरे। तसैनोन हाडसे डादा दया लसी हाडला नोकरगदे न्हडला गिक म्हन्सी थान्गो भितो:जी” ’ भिसी म्हन्जी।

२० “जमाहेन्से थे आबा मुबा ग्लारी निजी। आबासे थेदा थारेङ्ग्याम खबान लबा म्राङ्सी थेला सेमरी दया रे:जी। ओच्छे ताङ्सी भादा स्याप्बारी यार्बान निसी भादा हाप ख्वाइसी च्योक लजी। २१ ओच्छे भासे ‘आबा, डाइ परमेश्वरदेन हाडला बिरोधरी पाप लबा मुला। डा दाहेन्से हाडला भा भिबाधोनाला आरे’ भिसी भिजी। २२ तर आबासे हाडला नोकरगदेदा इयोइसी चुहङ् भिजी, ‘जम्मान भन्दा ज्यबा क्वान, च्यापदेन लखम योना भसी चुदा क्वान्सी पिन्गो। २३ ओच्छे छोबा हङ्बा बहर भसी साइगो। तिनी य्हाडसे भोज लइ। २४ तिगदा भिसम चु डाला भा सिबा मुबा दान्दे सोबा

मुला, थे म्हाबा मुबा तर दान्दे याङ्बा मुला।’ जमाहेन्से जम्मान ताङ्सी भोज चबारी छ्याइजी।

२५ “थे धुइरी थेला थेबा भा बुरी मुबा। थे बुग्याम खबा धुइरी दिमला डामरी धोखमा दिमरी व्हाइ गोबादेन स्थबान लबा थे:जी। २६ जमाहेन्से थेसे नोकर गिकदा इयोइसी, ‘चुरी तिग लबा?’ भिसी इयोइमा, २७ नोकरसे थेदा ‘हाडला आले दो:सी दिमरी खबा मुला। चुहङ् लसी हाडला भा ज्यना लसी खबासे लमा आबासे जम्मान भन्दा छोबा बहर गिक साइबा मुला’ भिसी भिजी।

२८ “चु ताम थे:सी थे बोमोसे दिम न्हडरी वाङ्बारी आम्हाइनी। थेतबासेलमा थेला आबा मङ्ग्यार खसी थेदा व्हाम्बारी छ्याइजी। २९ तर थेसे आबादा ‘च्यागो, डाइ चुदे दिङ्धोना हाडला नोकरसे हङ् लसी जम्मान गे लसी हाडसे कुल्बा जम्मान तामएनोन इयान्जी। तसैनोन डाला ह्योगदेदेन छ्याम ढिक्सी चबा थुङ्बा लबारी हाडसे डादा खाइमै रा गिकधोना पिन्जी? ३० तर तिनी हाडला धन सम्पत्ति बेश्यागदेदेन छ्याम भ्रसी जिन्ना लबा भा दो:सी खमा चा थेला लागिरी छोबा बहर साइबा?’ भिसी भिमा, ३१ आबासे थेदा ‘भा, ए मी सदन डादेन छ्याम मुनोन मुला। ओच्छे डादेन छ्याम मुबा जम्मान धन सम्पत्ति एलान हिन्ना। ३२ तिनी य्हाडसे ताङ्सी भोज लतो:बा धिन हिन्ना।

तिग्दा भिसम एला आले सिबा मुबा दान्दे सोबा मुला, म्हाबा मुबा दान्दे याङ्बा मुला' भिसी भिजी।”

चलाक नाइके

१६ येशूसे ह्वाडला चेलागदेदा चुहङ् भिसी सुङ्जी, “ग्ला गिकरी फ्युकपो म्हि गिकला गे लबा नाइके गिक मुबा। ‘नाइकेसे ह्वाडला धन सम्पत्ति नाश लजी’ भिसी म्हिगदेसे थे फ्युकपो म्हिदा पाङ्जी। ^२जमाहेन्से थे फ्युकपो म्हिसे ह्वाडला गे लबा नाइकेदा ड्योइसी ‘म्हिगदेसे एला बिरोधरी पाङ्बा ताम तिग हिन्ना? दाहेन्से जम्मान हिसाब किताब डादा घोना लउ। ओच्छे चु गे ख्लागो’ भिसी भिमा, ^३थे नाइकेसे चुहङ् भिसी म्हन्जी, ‘दाहेन्से डादा मालिकसे गेग्याम ते:बारी छ्याइबा मुला, डा तिग लइ? ख्बबा मोइबा लइ भिसम भड आरे, ह्नीसी चबारी डादा पे:बा खमुला। ^४दाहेन्से डाइ तिग लतो:बा थे डादा था मुला, डादा मालिकसे गेग्याम ते:माहेन्से म्हिगदेसे डादा मान लला भिबा ताम डाइ था याङ्सी जिन्बा मुला।’ ^५जमाहेन्से थेसे ह्वाडला मालिकला असामीगदेदा गिक गिक लसी ड्योइजी। ओच्छे थेसे डाच्छा खबा असामीदा ‘एदा डाला मालिकला छे गाते मुला?’ भिसी ड्योइमा, ^६थे असामीसे ‘हजार सोम लिटर छ्युगु मुला’ भिसी भिमाहेन्से थे नाइकेसे ‘दाहेन्से एला तमसुकरी हजार

गिकसे ग्यार्जा डा लिटर जे भ्रिउ’ भिसी भिजी। ^७थेहङ् लसी स्थान्दोदाएनोन ‘एदा डाला मालिकला छे गाते मुला?’ भिसी ड्योइमा, थे असामीसे ‘हजार गिक बोरा ग्वा मुला’ भिसी भिमाहेन्से थे नाइकेसे ‘एला तमसुकरी ग्यार्जा भ्रे: बोरा जे भ्रिउ’ भिसी भिजी।

^८“मालिकसे थे बेइमान नाइकेसे चलाक गे लबा म्नाङ्सी थेला हर्गबढाइ लजी। तिग्दा भिसम चु जम्बुलिडला म्हिगदे ह्वाडला ह्यो स्होबारी परमेश्वरदा डोसेबा म्हिगदे भन्दा ल्हानान चलाक तमुला। ^९थेतबासेलमा एनीगदेसे डाला ताम ड्यान्गो, एनीगदेसे ह्वाडला लागिरी जम्बुलिडला धन सम्पत्तिसे ह्यो स्होउ। तिग्दा भिसम एनीगदेला धन सम्पत्ति जिन्सी निसैनोन थेनीगदेसे एनीगदेदा जुकजुकधोना चिबा ग्लारी मान लला।

जजाबा तामरीन विश्वास लखम्बा ततो:ला

मती ६:१४

^{१०}येशूसे दो:सी चुहङ् भिसी सुङ्जी, “खालैसे जजाबा तामरी विश्वासला गे लजी भिसम थेदा घ्रेन गेरीएनोन विश्वास लला। तर जजाबा तामरी विश्वासला गे आलनी भिसम थेदा घ्रेन गेरीएनोन विश्वास आल। ^{११}थेतबासेलमा एनीगदेसे जम्बुलिडला धन सम्पत्तिरी विश्वासला गे आलनी भिसम खाल्से एनीगदेदा सत्यला धन सम्पत्ति जिम्मा

पिन्ना? १२थेहङ् लसीन स्थान्दोला धन सम्पत्तिरी विश्वासला गे आलनी भिसम एनीगदेदा धन सम्पत्ति खाल्से पिन्ना?

१३“खजिबै नोकरसे मालिक न्हीला गे लबारी आखम। तिग्दा भिसम थेसे गिकदा हेला लला, स्थान्दोदा माया लला, अथवा गिकसे भिबा ताम इयान्ना, स्थान्दोदा वास्तान आल। थेहङ् लसीन एनीगदेसेनोन परमेश्वरदेन धन सम्पत्ति न्हीलान गे लबारी आखम।”*

येशूसे लोप्बा अर्गु तामगदे

मत्ती ११:१२-१३; ५:१८, ३२

१४चु ताम थे:सी थेरी मुबा फरिसीगदेसे येशूदा खिसी लजी। तिग्दा भिसम थेनीगदे टाङ्गाला लिच्छा जे भ्रमुबा। १५ओच्छे येशूसे थेनीगदेदा “म्हिगदेला ओन्छाडरी हाडसे हाडदान डनी ज्यबा म्हि हिन्ना भिसी भ्रबा एनीगदेन हिन्ना। तर परमेश्वरदा एनीगदेला सेम खाहङ्बा मुला भिसी था मुला। तिग्दा भिसम म्हिगदेसे घेन भिसी म्हन्बा तामगदे परमेश्वरला लागिरी ल्हानान नइबा खबा ताम हिन्ना। १६“बप्तिस्मा पिन्बा यूहन्नाला धुइधोना मोशाला ठिमदेन अगमवक्तागदेसे भ्रिबा परमेश्वरला बचन थे:ना लबा मुबा।

थेनोन धुइहेन्से परमेश्वरला यहुल्साला समाचार थे:ना लबान मुला। ओच्छे जम्मान म्हिगदे भङ् लसी परमेश्वरला यहुल्सारी वाङ्बान मुला।* १७मुदेन जम्बुलिङ नाश तसैनोन परमेश्वरसे मोशादा पिन्बा ठिमरी मुबा ताम गिकनोन आम्हा।*

१८“खालै म्हिसे हाडला मिडदेन छ्याम छोडपत्र लसी स्थान्दो मिडम्हेमेदेन छ्याम ब्याह लजी भिसम थे चा ब्रेल्सी भ्रबा हिन्ना। थेहङ् लसी थेसे ख्लाबा मिडम्हेमेदा जुन म्हिसे ब्याह लला थेएनोन ब्रेल्सी भ्रबा हिन्ना।”*

फ्युकपो म्हिदेन लाजरस

१९दो:सी येशूसे चुहङ् भिसी सुङ्जी, “ग्ला गिकरी फ्युकपो म्हि गिक मुबा। थेसे मलमलला महङ्गो क्वान क्वान्सी धिन धिननोन मोजमजा लसी चिमुबा। २०तर थेला प्रापरी चा जिउ नाङ पोरनोन पोर मुबा लाजरस भिबा हीबा म्हि गिकदा भसी थान्मुबा। २१थे फ्युकपो म्हिसे चमा ताइबा भ्राइभुइ चम्याङ्गला वा भिसी च्यासी चिमुबा। नगीगदे चा खसी थेला पोर ल्हेम्मुबा।

२२“तिरेकुनु थे प्राङ्बो म्हि सिजी। जमाहेन्से थेदा स्वर्गदूतगदेसे अब्राहामला डामरी भोर्सी थान्जी। ओच्छे थे फ्युकपो म्हि एनोन सिजी।

१६:१३ मत्ती ६:२४ १६:१६ मत्ती ११:१२-१३ १६:१७ मत्ती ५:१८

१६:१८ मत्ती ५:३२; १ कोर ७:१०-११

२३थे फ्युकपो म्हि नर्गरी ल्हानान दुख नासी चिबा धुइरी थेसे च्यामा थारेङग्याम अब्राहामला डामरी लाजरसदा म्राङ्जी। २४ओच्छे थेसे क्रिङ्सी ‘आबा अब्राहाम, डादा दया लसी लाजरसदा डा मुबा ग्लारी पुइखउ। थेला या जुम्बी क्युइरी ब्लुम्सी डाला लेरी थोपा गिक क्युइ ताइना लगै। तिग्दा भिसम डा चुरी मेसे क्रोसी भोल्सी चिबा मुला’ भिसी भिजी।

२५“जमाहेन्से अब्राहामसे थेदा ‘भा, एसे तिग ढन्बा आरे? ए सोबा धुइरी ल्हानान सुख याङ्बा मुबा, तर लाजरससे चा ल्हानान दुख याङ्बा मुबा। दान्दे चा लाजरससे चुरी सुख शान्ति याङ्बा मुला, एसे चा दुख नासी चितोःबा मुला। २६एदेन छ्याम डन्ना गुडरी घेन व्हाङ मुला। थेतबासेलमा क्याम्सड भासम लबा सेम मुसैनोन क्याम्सड भासम लबारी आखम्मुला’ भिसी भिजी।

२७“जमाहेन्से थे फ्युकपो म्हिसे ‘थेहङ् भिसम आबा अब्राहाम, डाला बिन्ती मुला, लाजरसदा डाला आबाला दिमरी पुइगो। २८तिग्दा भिसम थेरी डाला आले डा मुला। थेसे थेनीगदेदा डा हङ् लसी थाभ्रउ भिसी पाङ्गै, आहिन्सम थेनीगदेएनोन चु दुख नातोःबा ग्लारी खला’ भिसी भिजी।

२९“जमाहेन्से अब्राहामसे, ‘थेनीगदे-देन छ्याम मोशादेन अगमवक्तागदेसे

भ्रिबा परमेश्वरला बचन मुनोन मुला, एला आलेगदेसे थे बचनरी भ्रिबा ताम ड्यान्सम तनोन तला’ भिसी भिजी।

३०“ओच्छे थे फ्युकपो म्हिसे ‘आहिन अब्राहाम आबा, थेनीगदेदा ओतेसे जे आत। सिबा म्हिगदे न्हङला खालै सोसी थेनीगदे मुबा ग्लारी निजी भिसम थेनीगदे ह्वाङ ह्वाङला पाप ख्लासी परमेश्वरपट्टि दोःसेला मुबा’ भिसी भिजी।

३१“तर अब्राहामसे थेदा ‘मोशादेन अगमवक्तागदेला ताम आड्यान्बा-गदेसे सिबा म्हि सोसी निसैनोन थेनीगदेसे विश्वास आल’ भिसी भिजी।”

**येशूसे विश्वासदेन माफ लतोःबा
भिसी लोण्बा**

मत्ती १८:६-७, २१-२२; मर्कूस ६:४२

१७ येशूसे ह्वाङला चेलागदेदा चुहङ् भिसी सुङ्जी, “च्यागो, म्हिदा पापरी फसब लबा तामगदे मी खनोन खमुला। तर स्थान्दोदा पापरी फसब लबा म्हिसे चा परमेश्वरग्याम सजाय याङ्ला। २जुन म्हिसे चु कोलागदेदा पाप लपुङ्ला थेहङ्बा म्हिदा पाप लपुङ्बा भन्दा खारेरी हान्दा च्योसी समुन्द्ररी भ्याङ्बान ज्यबा तला। ३थेतबासेलमा ह्वाङला लागिरी होशियार तसी चिउ! एला आलेसे पाप लजी भिसम थेदा बङ्गो। ओच्छे थेसे डाइ लबा पाप खलाला भिजी भिसम थेदा माफ

लउ।* ४एला आलेसे एला बिरोधरी धिनना निसरेमधोना पाप लसैनोन निसरेमधोनान थेसे डाइ लबा पाप खुलाला भिजी भिसम थेदा माफ लउ।”

५जमाहेन्से प्रभुला मुल चेलागदेसे प्रभुदा “प्रभु, डन्ना विश्वास लहेना लसी पिन्गो” भिसी भिजी।

६प्रभुसे थेनीगदेदा “एनीगदेदेन छ्याम पच्छैला ब्लु गिक ते:बा जे विश्वास मुजी भिसम चु किम्बुला दोडदा ‘ए प्योकसी समुन्द्ररी निउ’ भिजी भिसम थे एनीगदेसे भिबा हङ्गोन तला।

नोकरसे लतो:बा गे

७“एनीगदे न्हडरी खालैला नोकर बु मोइसी तसै ग्यु छसी तसै दिमरी खमा, एनीगदेसे थेदा ‘चबा थुङ्बा लउ’ भिसी खाइमै भिला? आभि। ८बरु एनीगदेसे थेदा ‘निउ, डाला लागिरी चबा थुङ्बा तयार लउ, डाइ चसी आजिन्तेधोना डादा क्योङ्सी चिउ, ओच्छे ए चउ’ भिसी भिला। ९हाङ्गसे कुल्बा अन्छार गे लबा थे नोकरदा एसे खाइमै धन्यवाद पिन्ना? आपिन। १०थेहङ्ग लसीन एनीगदेदा कुल्बा जम्मान गे लसी जिन्माहेन्से ‘डनी मी गे आखेल्ला नोकर हिन्ना। तिगदा भिसम डन्से लतो:बा गे जे लबा हिन्ना’ भिसी भिउ।”

येशूसे कोरे खबा म्हि च्युइदा खम्ना लबा

११येशू यरूशलेम भिबा शहररी फेप्बा धुइरी सामरियादेन गालील अञ्चलग्याम तबान फेप्जी। १२येशू नाम्सा गिकरी वाङ्बारी छ्याइबा धुइरी कोरे खबा म्हि च्युइदा स्याप्जी। थे कोरे खबा म्हिगदे जजाकी कयाथाडनोन राप्सी, १३“येशू गुरु, डन्दा दया लउ” भिसी क्रिङ्गी।

१४जमाहेन्से येशूसे थेनीगदेदा “एनीगदे परमेश्वरला मन्दिररी पूजा लबा म्हि मुबा ग्लारी निसी हाङ्गदा उन्गो” भिसी सुङ्गी। ओच्छे थेनीगदे निना निनान ग्यामरीन खम्जी।* १५थेनीगदे न्हडला गिकसे हाङ्ग खम्बा था याङ्सी परमेश्वरदा जयजयकार लबान दो:सी खजी। १६ओच्छे थे म्हिसे येशूदा धन्यवाद पिन्सी येशूला स्थहापरी फ्या लजी। थे म्हि चा सामरी यहुलला मुबा।

१७जमाहेन्से येशूसे “कोरेग्याम खम्बा म्हि च्युइ न्हडरी चु गिक जेन हिन्ना? स्थहान्दो म्हि कु चा खानड निजी? १८परमेश्वरदा धन्यवाद पिन्बारी चु सामरी बाहेक स्थहान्दो खालै आतनी?” भिसी सुङ्गी। १९जमाहेन्से येशूसे थे सामरी यहुलला म्हिदा “दाहेन्से ए रे:सी निउ, एला

विश्वाससे लमा एला कोरे म्हाबा मुला” भिसी सुङ्जी।

परमेश्वरला यहुल्सा एनीगदेला गुडरीन मुला

मत्ती २४:२३-३८, ३७-४१

२० फरिसीगदेसे परमेश्वरला यहुल्सा खाइमा खला भिसी ड्योइमा, येशूसे थेनीगदेदा “परमेश्वरला यहुल्सा म्हाङ्ना लसी आख। २१ खालै म्हिसे परमेश्वरला यहुल्सा चुरी मुला, थेरी मुला भिसी भिदेमा एनीगदेसे आम्राङ्। तिग्दा भिसम परमेश्वरला यहुल्सा एनीगदेला गुडरीन मुला” भिसी सुङ्जी।

२२ जमाहेन्से येशूसे हाडला चेलागदेदा चुहङ् भिसी सुङ्जी, “एनीगदेसे तिरेकुनु परमेश्वरसे पुइखबा म्हिदा च्याबा सेम लला, तसैनोन एनीगदेसे आम्राङ्। २३ म्हिगदेसे एनीगदेदा थे थेरी मुला, चुरी मुला भिसी भिला, जमा धुइरी एनीगदे थानिउ ओच्छे थेनीगदेला लिच्छा थाभ्रउ। २४ तिग्दा भिसम परमेश्वरसे पुइखबा म्हि तिप्लीड खबा धुइरी मुला कुनी गिकग्याम अर्गु कुनीधोना यहाल तबा हङ् तला। २५ तर डाच्छा थेसे ल्हानान दुखदेन म्हिगदेसे लबा बिरोध नातो:बा मुला।

२६ “ओन्मा नोआला धुइरी तबा हङ्नोन परमेश्वरसे पुइखबा म्हि दो:सी खबा धुइरीनोन तला। * २७ नोआ पानी जहाजरी वाङ्बा धिनकुनुधोना म्हिगदे चबा थुङ्बादेन ब्याह लबान मुबा। थेनोन धुइरी नामदेन भाल बाढी खसी जम्मान नाश लजी। *

२८ “थेहङ् लसीन लोतला धुइरीनोन कोइ म्हिगदे चबा थुङ्बा, कोइ म्हिगदे ग्लुबा चूङ्बा, कोइ सूबा ओच्छे कोइ म्हिगदे दिम स्होबान मुबा। २९ लोत सदोमग्याम थोन्माकुनुन मुग्याम मेदेन बारूद ताइसी जम्मान नाश लजी। *

३० “परमेश्वरसे पुइखबा म्हि खबा धुइरीनोन थेहङ्नोन तला। ३१ थे धुइरी तलाथोरी मुबा म्हिगदे हाडला सामान किन्बारी मार फाप्सी दिम न्हडरी थावाङ्गो, ओच्छे बुरी मुबागदेएनोन दिमरी दो:सी थानिउ। * ३२ थेहङ् लसीन एनीगदेसे लोतला म्रिडदा तबा ताम ढन्गो। ३३ तिग्दा भिसम जुन म्हिसे हाडला ज्यान जोगब लबारी म्हाइला थे म्हिसे जुकजुकधोनाला जुनी आयाङ्। तर डाला लागिरी ज्याननोन पिन्खम्बा म्हिसे जुकजुकधोनाला जुनी याङ्ला। ३४ थेतबासेलमा एनीगदेसे डाला ताम ड्यान्गो, म्हुनड ग्ला गिकरीन म्हेसी चिबा म्हि न्ही न्हडरी गिकदा भोर्ला गिकदा थेरीन रलाला। ३५ ओच्छे हान्दारी बा स्याङ्सी चिबा म्रिडम्हेमे

न्ही न्हडरी गिकदा भोर्ला गिकदा थेरी
खलाला। ^{३६}थेहङ् लसीन बुरी मुबा
म्हि न्ही न्हडरी गिकदा भोर्ला, गिकदा
खलाला।”[†]

^{३७}जमाहेन्से चेलागदेसे येशूदा
“खानड प्रभु?” भिसी ड्योइमा, येशूसे
थेनीगदेदा “जुन ग्लारी सिबा जन्तु
मुला थेरी गिद्वागदे पोप तमुला” भिसी
सुङ्जी।

हेम्बो सिबा मिडम्हेमेदेन

न्यायाधीशला उखान

१८ जमाहेन्से येशूसे हाडला
चेलागदेदा “सदन प्रार्थना
लसी चिगै ओच्छे खाइमै हरेस
थाचगै” भिसी उखान गिक सुङ्जी।
^२“शहर गिकरी न्यायाधीश गिक मुबा।
थेसे परमेश्वरदेन म्हिगदेला वास्ता
आलमुबा। ^३थेनोन शहररी हेम्बो
सिबा मिडम्हेमे गिकएनोन मुबा। थे
मिडम्हेमे घरिघरि थे न्यायाधीश मुबा
ग्लारी निसी ‘डादा डाला बिरोधरी
रे:बा म्हिग्याम ठीक निसाफ लसी
पिन्गो’ भिसी भिमुबा।

^४“तिगै धिनधोना मी थेसे थे
मिडम्हेमेला तामदा आङ्यान्नी।
तर लिच्छा थेसे, ‘डा परमेश्वरदेन
म्हिगदेला वास्ता आलबा म्हि हिन्ना।
^५तर चु हेम्बो सिबा मिडम्हेमेसे डादा
ल्हानान दुख पिन्बासे लमा चुला ठीक
निसाफ लसी पिन्तो:जी। आहिन्सम चु

घरिघरि खसी डादा छेर्ना लला’ भिसी
सेमरी म्हन्जी।”

^६जमाहेन्से प्रभुसे चुहङ् भिसी
सुङ्जी, “च्यागो, थे आज्यबा
न्यायाधीशसे तिग लबा चीम,
एनीगदेसे था याङ्गो। ^७थेहङ् लसीन
परमेश्वरसे धिन म्हुननोन बिन्ती लबा
हाडसे धम्बा हाडला म्हिला ठीक
निसाफ आल? तिग हाडला म्हिदा
हो लबारी घइना लला? ^८च्यागो,
परमेश्वरसे हाडला म्हिला ठीक
निसाफ लबारी खाइमै घइना आल।
तसैनोन परमेश्वरसे पुइखबा म्हि खमा
तिग चु जम्बुलिङरी डादा विश्वास
लबागदे स्याप्ला?”

म्हि न्हीला प्रार्थना

^९हाडसे हाडदान डा ज्यबा म्हि
हिन्ना भिसी दुक्क तसी स्थान्दोदा
चा हेला लबा म्हिगदेदा येशूसे
चुहङ् भिसी उखान गिक सुङ्जी,
^{१०}“फरिसीदेन तिरो दुइबा म्हि
प्रार्थना लबारी परमेश्वरला मन्दिररी
निजी। ^{११}ओच्छे फरिसीसे चुहङ्
भिसी प्रार्थना लजी, ‘परमेश्वर
हाडदा धन्यवाद मुला, तिगदा भिसम
डा स्थान्दो म्हिगदे हङ्बा लोभी,
बेइमानी, स्थान्दोदेन छ्याम ब्रेल्सी
भ्रबा म्हि हङ्बा आहिन। ओच्छे चु
तिरो दुइबा म्हि हङ्बाएनोन आहिन।
^{१२}डाइ सातारी न्हीरेम फोइथान

१७:३६ चु पदला ताम ल्हाना हङ्बा ग्रीक बाइबलरी भ्रिबा आरे।

चिसी प्रार्थना लबा मुला। ओच्छे डाइ याड्बा जम्मान स्हेला भो च्युइला भो गिक हाडदा पिन्बा मुला।’


१३“तर तिरो दुइबा म्हि चा थारेडनोन राप्सी स्वर्गपट्टि आच्याना हाडला कु ठोकवान, ‘परमेश्वर, डा पापीदा दया लउ’ भिसी भिजी।

१४थेतबासेलमा एनीगदेसे डाला ताम इयान्गो, चु तिरो दुइबा म्हि चा स्थहान्दो म्हि भन्दा परमेश्वरदा सेम निबा म्हि दोसी हाडला दिमरी निजी। तिगदा भिसम जुन म्हिसे हाडसे हाडदान घेन स्होला थे म्हि जजा तला। तर जुन म्हिसे हाडसे हाडदान जजा स्होला थे म्हि घेन तला।”*

येशूसे कोलागदेदा मोलम पिन्बा

मत्ती १६:१३-१५; मार्कस १०:१३-१६

१५म्हिगदेसे हाडला कोलागदेदा येशूसे हाडला छ्या थान्सी मोलम पिन्बो भिसी येशू मुबा ग्लारी भजी। चु म्हाड्सी चेलागदेसे थेनीगदेदा बड्जी। १६तर येशूसे थेनीगदेदा इयोइसी चुहड् भिसी सुड्जी, “कोलागदेदा डा मुबा ग्लारी खपुङ्गो, थेनीगदेला ग्याम थाकागो। तिगदा भिसम परमेश्वरला यहुल्सा चु कोलागदे हड्बालान हिन्ना। १७एनीगदेसे डाला ताम इयान्गो, जुन म्हिसे चु कोलागदेसे हड् लसी परमेश्वरला यहुल्सादा विश्वास



ऊंट (१८:१८)

आल, थे म्हि परमेश्वरला यहुल्सारी खाइमै वाड्आम्याड्।”

परमेश्वरला यहुल्सादेन फ्युकपो म्हि

मत्ती १६:१६-३०; मार्कस १०:१७-३१

१८यहूदी नेता गिकसे येशूदा “ज्यबा गुरु, जुकजुकधोनाला जुनी याड्बाला लागिरी डाइ तिग लतो:ला?” भिसी इयोइमा, १९येशूसे थेदा चुहड् भिसी सुड्जी, “एसे डादा तिगदा ज्यबा भिबा? परमेश्वर बाहेक खालै ज्यबा आरे। २०परमेश्वरसे कुल्बा ताम एदा थानोन मुला। म्हि थासाइगो, स्थहान्दोदेन छ्याम ब्रेल्सी थाभ्रउ, य्हो थालउ, लुसीला ताम पाड्सी थाभ्रउ ओच्छे हाडला आबा आमामा मान लउ।”*

२१जमाहेन्से थेसे, “चु जम्मान ताम मी डाइ जधुगुहेन्सेन लसीन चिबा मुला” भिसी भिजी। २२चु ताम थे:माहेन्से येशूसे थेदा “अभ्र एसे गे गिक लतो:बा मुला, दाहेन्से एसे हाडदेन छ्याम मुबा जम्मान धन

सम्पत्ति चूड्सी प्राडबोगदेदा भो लसी पिन्गो। एसे स्वर्गरी धन सम्पत्ति याड्ला, ओच्छे डादेन छ्याम भ्रउ” भिसी सुड्जी। २३तर चु ताम थे:सी थे म्हिदा ल्हानान दुख इहम्जी। तिग्दा भिसम थे ल्हानान फ्युकपो मुबा।

२४थे म्हिला सेमरी ल्हानान दुख तबा था याड्सी येशूसे चुहङ् भिसी सुड्जी, “थेदा च्यासी फ्युकपो म्हिदा परमेश्वरला यहुल्सारी वाड्बारी गाते गाहो मुला। २५तिग्दा भिसम फ्युकपो म्हिदा परमेश्वरला यहुल्सारी वाड्बारी भन्दा ऊँटदा दापला मीग्याम वाड्बारी सजिलो मुला।”

२६चु ताम थे:बागदेसे येशूदा “थेहङ् भिसम खाल्से थार्बा याड्ला?” भिसी इयोइजी।

२७जमाहेन्से येशूसे थेनीगदेदा “चु गे म्हिसे लबारीन आखम्बा गे तसैनोन परमेश्वरसे लखम्ला” भिसी सुड्जी।

२८ओच्छे पत्रुससे, “स्हीगो प्रभु, डन्से हाडला दिमनामनोन रूलासी हाडदेन छ्याम भ्रबा मुला” भिसी भिमा, २९येशूसे थेनीगदेदा “एनीगदेसे डाला ताम ड्यान्गो, जुन म्हिसे हाडला दिम, मिड, ज्योज्यो आले, आबा आमा, ओच्छे भा भामेदा परमेश्वरला यहुल्साला लागिरी रूलाला, ३०थेसे दान्देन थे भन्दा ल्हाना याड्ला, ओच्छे लिच्छा खबा धुइरी थेसे जुकजुकधोनाला जुनी याड्ला” भिसी सुड्जी।

येशूसे हाडला साइला भिसी सुड्बा

मत्ती २०:१७-१८; मर्कस १०:३२-३४

३१येशूसे हाडला च्युक न्ही चेलागदेदा कुनी गिकरी भोर्सी चुहङ् भिसी सुड्जी, “च्यागो, यहाड यरूशलेमरी निबान मुला। दाहेन्से परमेश्वरसे पुड्खबा म्हिला बारेरी अगमवक्तागदेसे भ्रिबा ताम पूरा तला। ३२थेदा अर्गु यहुलला म्हिगदेला यारी जिम्मा पिन्ना। जमाहेन्से थे म्हिगदेसे थेदा खिसी लला ओच्छे थो स्वाबान बेइज्जत लला, ३३जमाहेन्से कोर्से तोला ओच्छे साइला। तसैनोन थे सोमरेमाकुनु सिबाग्याम सोला।” ३४तर चेलागदेसे चु ताम तिगै आघोनी। तिग्दा भिसम चु ताम म्हिला ज्ञान बुद्धिसे घोसी घोआखम्बा तबासे लमा येशूसे तिग सुड्बा हिन्ना भिसी थेनीगदेसे म्हन्बारीएनोन आखम्नी।

**येशूसे मी आम्राड्बा म्हिला मी
प्राड्ना लबा**

मत्ती २०:२८-३४; मर्कस १०:४६-५२

३५येशू यरीहो शहरला डामरी धोमा थेरी मी आम्राड्बा म्हि गिक ग्यामला कुनीरी ह्रीसी चिमुबा। ३६थे मी आम्राड्बा म्हिसे हाडला डामग्याम म्हिला हुल निबान लबा थे:सी, “चुरी तिग तजी?” भिसी इयोइमा, ३७म्हिगदेसे थेदा “नासरतला येशू चुग्यामसेन फेप्बान मुला” भिसी भिजी।

३८ जमाहेन्से थेसे क्रिड्बान, “दाऊद ग्लेला सन्तान येशू, डादा दया लउ” भिसी भिमा, ३९ डाच्छा भ्रबागदेसे थेदा कुटिसी चिउ भिसी बङ्जी। तर थेसे भन क्रिड्बान, “दाऊद ग्लेला सन्तान येशू, डादा दया लउ” भिसी भिजी।

४० थेसे चुहङ् भिबा थे:सी येशू थेन तसी थेदा हाड मुबा ग्लारी भपुङ्जी। ओच्छे थे डामरी खमाहेन्से, ४१ “डाइ एला लागिरी तिग लउ भिसी म्हन्बा मुला?” भिसी ड्योङ्जी। जमाहेन्से थेसे “प्रभु, डाला मी प्राङ्ना लसी पिन्गो” भिसी भिजी।

४२ येशूसे थेदा “लु, एसे प्राङ्गै, एसे विश्वास लबासे लमा एसे प्राङ्बा मुला” भिसी सुङ्जी। ४३ येशूसे चुहङ् सुङ्मैछ्याम थेसे प्राङ्जी। ओच्छे थेसे परमेश्वरदा जयजयकार लबान येशूदेन छ्याम भ्रजी। चु प्राङ्बा म्हिगदेसेनोन परमेश्वरदा जयजयकार लजी।

तिरो दुइबा जखायस

१६ येशू यरीहो शहरग्याम फेप्बान मुबा। २ थेरी जखायस भिबा फ्युक्पो म्हि गिक मुबा। थे तिरो दुइबा म्हिगदे न्हडला मुल म्हि मुबा। ३ थेसे येशूदा खाल चीम भिसी च्याबारी म्हाङ्जी। तर म्हिला हुलसे लमा थेसे येशूदा आम्राङ्नी। तिगदा भिसम थे मेबा मुबा। ४ थेतबासेलमा येशूदा च्याबारी थे डाच्छा डाच्छा यार्बान निसी अञ्जीरला दोडरी क्रे:जी। तिगदा भिसम येशू थेग्यामसेन फेप्बारी

छ्याइबा मुबा। ५ थेरी धोखमाहेन्से येशूसे तोरपट्टि स्हीसी जखायसदा “जखायस, ए योना मार फाप्सी खउ! तिगदा भिसम तिनी डा एला दिमरी चितो:बा मुला” भिसी सुङ्जी।

६ जमाहेन्से जखायस ताङ्सी मार फाप्सी येशूदा फ्याफुल्जी। ७ चु प्राङ्माहेन्से म्हिगदेसे “चु म्हि मी पापीला दिमरी डोन्बो दोसी निजी” भिसी येशूला तामगन लजी।

८ तर जखायससे “प्रभु, दाहेन्से डाइ डाला गडसल धन सम्पत्ति प्राडबोगदेदा भो लसी पिन्ना, ओच्छे डाइ खालैदा ठगब लसी किन्बा मुसम थेदा भो ब्लि ल्हाना दो:सी पिन्ना” भिसी भिजी।

९ जमाहेन्से येशूसे थेदा “तिनीहेन्से चु दिमसे थार्बा याङ्बा मुला। तिगदा भिसम जखायसएनोन अब्राहामला सन्तान हिन्ना। १० परमेश्वरसे पुइखबा म्हि म्हाबागदेदा म्हाइबारीदेन थार्बा पिन्बारी खबा हिन्ना” भिसी सुङ्जी।

म्हरला डबलला उखान

मत्ती २५:१४-३०

११ येशू यरूशलेमला डामरी धोमुबा। म्हिगदेसे दाहेन्से परमेश्वरला यहुल्सा योनान खबान मुला भिसी म्हन्सी येशूला ताम ड्यान्सी चिमुबा। थेतबासेलमा येशूसे थेनीगदेदा चुहङ् भिसी उखान गिक सुङ्जी, १२ “खालै घ्रेन म्हि गिक हाडला ग्लारी शासन लबा सेम लसी थे यहुल्साला ग्ले मुबा

ग्लारी निजी। ^{१३}निबा भन्दा डाच्छा थेसे हाडला नोकर च्युइदा ड्योइजी। ओच्छे जम्मादान म्हरला डबल गिक गिक पिन्सी ‘डा आखतेधोना चु टाडगासे व्यापार लउ’ भिसी कुल्जी। ^{१४}तर थेला यहुल्साला म्हिगदेसे चा थेदा सेम आनिमुबा। थेतबासेलमा थे निसी जिन्माहेन्से ‘चु म्हिसे शासन लगै भिबा डन्ना सेम आरे’ भिसी ग्ले ब्लोनदा पुइजी।

^{१५}“तर थे म्हि शासन लबा अधिकार किन्सी खजी। जमाहेन्से थेसे हाडला नोकरगदेदा व्यापार लसी गाते स्होजी भिसी ड्योइबारी ड्योइजी। ^{१६}ओच्छे डाच्छा खबा नोकरसे ‘मालिक, हाडसे पिन्बा डबल गिकसे डाइ डबल च्युइ स्होजी’ भिसी भिजी। ^{१७}जमाहेन्से थे म्हिसे थेदा ‘स्याबास! ए डाला ज्यबा नोकर हिन्ना! तिगदा भिसम एसे डादा जजा तामरी विश्वास उन्जी। थेतबासेलमा डाइ एदा शहर च्युइरी शासन लबा अधिकार पिन्ना’ भिसी भिजी। ^{१८}ओच्छे स्थान्दो नोकरसे ‘मालिक, हाडसे पिन्बा डबल गिकसे डाइ डबल डा स्होजी’ भिसी भिजी। ^{१९}जमाहेन्से थेदा एनोन थे म्हिसे ‘ए शहर डाला मुल म्हि तला’ भिसी भिजी। ^{२०}ओच्छे स्थान्दो नोकर एनोन खसी ‘मालिक, डाइ हाडला म्हरला डबल रूमालरी भोर्सी थान्बा मुला, थे चुरी मुला। ^{२१}हाड खरो म्हि भिसी

डादा था मुबासे लमा डादा लोड्बा खजी, हाडसे व्यापार आलबा ग्लारी नाफा म्हाइमुला, ओच्छे तिगै आद्ववबा ग्लारी बाली दुइबारी म्हाइमुला’ भिसी भिजी। ^{२२}थे शासन लबा म्हिसे थेदा ‘गे आखेलबा नोकर! एला तामग्यामसेन डाइ ए गे आखेलबा चीम भिसी निसाफ लला। डाइ व्यापार आलबा ग्लारी नाफा म्हाइमुला ओच्छे तिगै आद्ववबा ग्लारी बाली दुइबारी म्हाइबा खरो म्हि भिसी एदा थानोन चीम। ^{२३}थेहड् भिसम एसे तिग डाइ पिन्बा डबल बैकरी आथान्नी? एसे बैकरी थान्बा हिन्सम डाइ दोःसी ब्याजदेन थे डबल किन्म्याड्सेला’ भिसी भिजी। ^{२४}ओच्छे थेसे थेरी राप्सी चिबागदेदा ‘दाहेन्से थेग्याम थे म्हरला डबल ब्यन्सी गोर च्युइ डबल मुबादा पिन्गो’ भिसी भिजी। ^{२५}जमाहेन्से थेनीगदेसे ‘मालिक, थेदेन छ्याम मी डाच्छालान गोर च्युइ डबल मुला’ भिसी भिमा, ^{२६}थे शासन लबा म्हिसे थेनीगदेदा ‘एनीगदेसे डाला ताम ड्यान्गो, तिगदा भिसम जुन म्हिदेन छ्याम मुला थेदा अर्गु एनोन पिन्ना। तर जुन म्हिदेन छ्याम आरे थेदेन छ्याम मुबा जजाकी एनोन थेग्याम ब्यन्ना। ^{२७}थेतबासेलमा डाइ शासन आलगै भिसी म्हन्बा डाला शत्रुगदेदा चुरी भसी डाला डाच्छापट्टि साइगो’ भिसी कुल्जी।”

१६:१३ “म्हरला डबल गिक” भिबा चा थे धुइरी ला सोमला तलब हिन्ना।



येशू यरूशलेमरी फेप्बा (१६:२८-४०)

येशू यरूशलेमरी फेप्बा

मत्ती २१:१-११; मर्कुस ११:१-११;

यूहन्ना १२:१२-१६

२८ चुहङ् सुङ्सी जिन्माहेन्से येशू थेनीगदेला डाच्छा डाच्छा यरूशलेमपट्टि फेप्जी। २९ ओच्छे बेथफागेदेन बेथानिया नाम्साला डामला जैतून भिबा गडरी धोखमाहेन्से येशूसे हाडला चेलागदे न्हडला न्हीदा पुङ्जी। ३० पुङ्बा धुङ्री चुहङ् भिसी सुङ्जी, “एनी जजाकी क्याथाडला नाम्सारी निउ। नाम्सारी धोमाहेन्से

एनीगदेसे दान्देधोना खालै आक्रे:बा गधाला कोला गिक स्याप्ला। थेदा ब्लसी चुरी भसी खउ। ३१ ब्लबारी छ्याइमा खालैसे एनीदा ‘चुदा तिग्दा ब्लाबा’ भिसी ड्योङ्जी भिसम, ‘चु प्रभुदा तो:बा मुला’ भिसी भिउ।”

३२ जमाहेन्से थे चेला न्ही नाम्सारी निजी। ओच्छे थेरी थेनीसे येशूसे सुङ्बा हङ्नोन गधाला कोला स्याप्जी। ३३ थेनीसे थे गधाला कोलादा ब्लबारी छ्याइमा थे गधाला धनीसे “एनीसे चु गधाला कोलादा तिग्दा ब्लाबा?” भिसी ड्योङ्जी।

३४ ओच्छे चेला न्हीसे “चु प्रभुदा तो:बा मुला” भिसी भिजी।

३५ जमाहेन्से थे चेला न्हीसे गधाला कोलादा येशू मुबा ग्लारी भसी हाडला घ तीसी येशूदा थेथोरी धन्छ्यापुङ्जी। ३६ येशू फेप्बारी छ्याइबा धुइरी म्हिगदेसेनोन ग्यामरी हाड हाडला घगदे तीजी।

३७ येशू यरूशलेम डामला जैतून भिबा गडला ग्युरोरी धोखमा येशूदेन छ्याम भ्रबा चेलागदेसे येशूसे लबा उदेकला गेगदे ढन्सी ताड्बान क्रिङ्सी चुहङ् भिसी परमेश्वरदा धन्यवाद पिन्बारी छ्याइजी,

३८ “परमप्रभुला मिनरी फेप्खबा ग्लेसे परमेश्वरग्याम मोलम याङ्गै, स्वर्गरी शान्ति तगै।

ओच्छे स्वर्गरी धन्छ्याबा परमेश्वरदा मानदेन

जयजयकार तगै।

३९ म्हिला हुल न्हङ्ग्याम फरिसीगदेसे येशूदा “गुरु, हाडला चेलागदेदा कुटिसी चिउ भिसी बङ्गो” भिसी भिजी।

४० तर येशूसे थेनीगदेदा “डाला ताम ड्यान्गो, चुगदे कुटिसी चिजी भिसम युड्बागदेन क्रिङ्बारी छ्याइला” भिसी सुङ्जी।

यरूशलेम नाश तला भिबा था याङ्सी येशू क्राबा

४१ यरूशलेम डामरी धोमा येशूसे शहरदा हाडला डाच्छापट्टि म्राङ्सी

क्राबान चुहङ् भिसी सुङ्जी, ४२ “यरूशलेमला म्हिगदे, तिनी शान्तिला लागिरी तिग तो:ला भिसी था याङ्बा हिन्सम तसेला, तर एनीगदेसे था आयाङ्नी! ४३ थेतबासेलमा दाहेन्से एनीगदेला शत्रुगदे ढिक्सी क्युर्सीन खसी एनीगदेदा गुडरी भाङ्ला। ४४ ओच्छे थेनीगदेसे एनीगदेला शहरला पर्खाल फुप्सी एनीगदेला शहरदा नाश लला। जमाहेन्से एनीगदेला कोलागदेदा साइला। तिगदा भिसम परमेश्वरसे एनीगदेदा थानार्न लबा धुइदा एनीगदेसे डोआसेनी।”

येशू परमेश्वरला मन्दिररी फेप्बा

मत्ती २१:१२-१७; मार्कस ११:१५-१९;

यूहन्ना २:१३-२२

४५ जमाहेन्से येशू परमेश्वरला मन्दिररी फेप्जी। ओच्छे परमेश्वरला मन्दिर न्हङ्गरी चूङ्बागदेदा चुहङ् भिसी सुङ्बान ताप्जी, ४६ “च्यागो, परमेश्वरला बचनरी ‘डाला दिम प्रार्थना लबा दिम तला’ भिसी भिबा मुला। तर एनीगदेसे मी यहोगदे चिबा ग्ला स्होबा मुला।”*

४७ जमाहेन्से धिन धिननोन येशूसे परमेश्वरला मन्दिररी लोप्बारी छ्याइजी। थे धुइरी परमेश्वरला मन्दिररी पूजा लबा मुल म्हिगदेदेन यहूदी धर्मगुरुगदे ओच्छे थे यहूल्साला नेतागदे ढिक्सी येशूदा साइबारी म्हाइमुबा। ४८ तर थेनीगदेसे तिगै निउ आयाङ्नी। तिगदा भिसम जम्मान

म्हिगदेसे सेम लसी येशूला ताम
इयान्मुबा।

येशूला अधिकारला बारेरी इयोइबा

मती २१:२३-२७; मर्कूस ११:२७-३३

२० तिरेकुनु येशू परमेश्वरला
मन्दिररी लोप्बान मुबा
ओच्छे परमेश्वरला यहुल्साला
समाचार थे:ना लबान मुबा। थेनोन
धुइरी परमेश्वरला मन्दिररी पूजा लबा
मुल म्हिगदेदेन यहूदी गन्बागदे ओच्छे
यहूदी धर्मगुरुगदे येशू मुबा ग्लारी
खजी। ^२ओच्छे थेनीगदेसे येशूदा
“हाडसे खानङ्ग्याम अधिकार याङ्सी
चु गे लबा हिन्ना? हाडदा चु अधिकार
खाल्से पिन्बा हिन्ना?” भिसी इयोइमा,
^३येशूसे थेनीगदेदा “डाइएनोन
एनीगदेदा ताम गिक इयोइला, थे
ताम डादा पाङ्गो। ^४यूहन्नासे पिन्बा
बप्तिस्मा परमेश्वरग्याम हिन्ना कि
म्हिग्याम हिन्ना?” भिसी इयोइजी।
^५जमाहेन्से थेनीगदे हाड हाड न्हडरी
ताम लबारी छ्याइजी, “परमेश्वरग्याम
भिजी भिसम थेसे यहाडदा ‘थेहङ्
भिसम एनीगदेसे तिगदा यूहन्नादा
विश्वास आलबा?’ भिसी भिला। ^६तर
म्हिगदेग्याम भिजी भिसम म्हिगदेसे
यहाडदा बिरोध लला। तिगदा भिसम
थेनीगदेसे यूहन्नादा अगमवक्ता भिसी
विश्वास लबा मुबा।” ^७थेतबासेलमा
थेनीगदेसे येशूदा “खाइ, थेसे चु
अधिकार खानङ्ग्याम याङ्जी डन्दा
था आरे” भिसी भिमा, ^८येशूसे

थेनीगदेदा “थेहङ् भिसम डाइएनोन
चु गेगदे खाल्ला अधिकारग्याम लबा
हिन्ना, थे एनीगदेदा आपाङ्” भिसी
सुङ्जी।

अधियाँ स्होबा म्हिगदेला उखान

मती २१:३३-४६; मर्कूस १२:१-१२

^६जमाहेन्से येशूसे म्हिगदेदा उखान
गिक सुङ्जी, “म्हि गिकसे वारीरी
अङ्गुर सूसी अधियाँरी पिन्सी थे
ल्हानान धिनना लागिरी अर्गु यहुल्सारी
निजी। ^{१०}अङ्गुर मिन्बा धुइ तमाहेन्से
थे फ्युकपो म्हिसे हाडला भो किन्बाला
लागिरी अधियाँ लबागदे मुबा ग्लारी
हाडला नोकरगदेदा पुइजी। तर
थे अधियाँ लबागदेसे थेदा तोबा
ग्याङ्बा लसी तिगै आपिन्ना पुइजी।
^{११}थे वारीला धनीसे स्थहान्दो नोकर
गिकदा पुइजी। थेदाएनोन थे अधियाँ
लबागदेसे तोसी बेइज्जत लसी
थान्थान पुइखजी। ^{१२}थेहङ् लसीन
थेसे दो:सी स्थहान्दो नोकरदाएनोन
पुइजी थेदाएनोन थे अधियाँ लबागदेसे
सिबाधोनान तोसी ते:जी।

^{१३}“जमाहेन्से थे वारीला धनीसे
‘दाहेन्से डाइ तिग लसे? डाइ माया
लबा डाला भादान पुइतो:जी। डाला
भादा मी थेनीगदेसे मान लला वा?’
भिसी पुइजी। ^{१४}तर थेदा म्राङ्सी
अधियाँ लबागदेसे ‘चु मी यहाडला
धनीला भा हिन्ना, यहाडसे थेदा
साइगे। जमाहेन्से थेला सम्पत्ति
यहाडलान तला’ भिसी हाड हाड

न्हडरी ताम लजी। १५ जमाहेन्से थेनीगदेसे थेदा अङ्गुर वारीग्याम मङ्ग्यार भोर्सी साइजी।”

चुहङ् सुङ्सी जिन्माहेन्से येशूसे थेनीगदेदा “दाहेन्से थे वारीला धनीसे थेनीगदेदा तिग लला तला? १६ थे खसी अधियाँ लबा म्हिगदेदा साइला ओच्छे थे अङ्गुरला वारी स्थान्दोगदेदा स्होबारी पिन्ना।” भिसी सुङ्जी। चु थे:सी म्हिगदेसे “चुहङ्बाम खाइमै थातगै” भिसी भिजी। १७ ओच्छे येशूसे थेनीगदेला लीरी स्हीसी चुहङ् भिसी सुङ्जी, “थेहङ् भिसम परमेश्वरला बचनरी

‘जुन युडबादा दिम स्होबा
कर्मिगदेसे गे आखेल भिसी
भ्याङ्बा मुबा
थेनोन युडबा दिमला सुर युडबा
दोजी’

भिसी भिबा चु तामला अर्थ तिग
हिन्ना? *

१८ थे युडबाथोरी ताइबागदे जम्मान छारछिर निला, ओच्छे थे युडबा खालैथोरी ताइजी भिसम थेरी मुबा म्हि फलातफलेत निला।”

**तिरो फातो:बा कि फाआतो:बा
भिसी येशूदा ड्योइबा**

मत्ती २२:१५-२२; मर्कुस १२:१३-१७

१९ जमाहेन्से यहूदी धर्मगुरुगदेदेन परमेश्वरला मन्दिररी पूजा लबा मुल

म्हिगदेसे थे धुइरी येशूदा चुङ्बारी म्हाइजी। तिग्दा भिसम चु उखान येशूसे थेनीगदेलान बिरोधरी सुङ्बा हिन्ना भिबा ताम थेनीगदेदा था मुबा। तर थेनीगदे म्हिगदे म्हाङ्सी लोङ्मुबा। २० थेतबासेलमा थेनीगदेसे येशूदा चुङ्बारी दाउ च्याजी। थेनीगदेसे येशूदा तामग्याम फसब लसी रोमी अञ्चलाधीशला यारी जिम्मा पिन्बारी म्हाइमुबा। थेतबासेलमा हाडसे हाडदान डा ज्यबा म्हि हिन्ना भिसी भ्रबा म्हिगदेदा थेनीगदेसे येशू मुबा ग्लारी पुङ्जी। २१ थे म्हिगदे येशू मुबा ग्लारी निसी, “गुरु, हाडसे लोप्बा ताम ठीक हिन्ना। हाडसे खालैला ली स्हीसी गे आलमुला, ओच्छे हाडसे परमेश्वरला सत्य ग्याम उन्मुला भिसी डन्दा था मुला। २२ थेतबासेलमा डन्से रोमी ग्याल्बो कैसरदा तिरो फाबा य्हाडला ठिम अन्छार ठीक हिन्ना कि आहिन?” भिसी ड्योइजी।

२३-२४ तर येशूसे थेनीगदेला पापी सेम था याङ्सी येशूसे थेनीगदेदा “डादा डबल गिक भउ। चु डबलरी मुबा छापदेन मिन खाल्ला हिन्ना?” भिसी सुङ्मा, थेनीगदेसे “रोमी ग्याल्बो कैसरला” भिसी जोहाब पिन्जी। २५ जमाहेन्से येशूसे थेनीगदेदा “थेहङ् भिसम रोमी ग्याल्बो कैसरला जति कैसरदा पिन्गो, परमेश्वरला जति

परमेश्वरदा पिन्गो” भिसी सुङ्जी।
 २६ थेनीगदेसे म्हिला ओन्छाडरी
 येशूदा खजिबै तामग्याम फसब लसी
 चुङ्बारी आखम्नी। ओच्छे येशूसे
 सुङ्बा तामरी थेनीगदे उदेक म्हन्सी
 कुटिसी चिजी।

सिबाग्याम सोना लबाला बारेरी ड्योइबा

मती २२:२३-३३; मार्कस १२:१८-२७

२७ जमाहेन्से सिबाग्याम दोःसी
 आसो भिसी विश्वास लबा कोइ
 कोइ सदुकीगदे येशू मुबा ग्लारी
 खजी। २८ ओच्छे थेनीगदेसे येशूदा
 चुहङ् भिसी ड्योइजी, “गुरु, मोशासे
 य्हाङ्दा पिन्बा ठिम अन्छार खालैला
 ज्योज्योसे ब्याह लसी कोलागदे
 आतनान सिजी भिसम ज्योज्योला
 लागिरी कोलागदे तगै भिसी आलेसे
 चाङ्दा ब्याह लतोःला भिसी भिबा
 मुला। २९ ग्ला गिकरी ज्योज्यो आले
 निस मुबा। थेबासे ब्याह लजी, तर
 कोलागदे आतनान थे सिजी। ३० थेहङ्
 लसीन पाराङ्से चाङ्दा ब्याह लजी,
 थेएनोन कोलागदे आतनान सिजी।
 ३१ जमाहेन्से साँजीसे चाङ्दा ब्याह
 लजी, थेएनोन कोलागदे आतनान
 सिजी। थेहङ् लसी जम्मासेन पालोन
 पालो चाङ्दा ब्याह लजी। तर
 जम्मान कोलागदे आतनान सिजी।
 ३२ ओच्छे थे म्रिडम्हेमेएनोन सिजी।

३३ थेतबासेलमा डन्दा सुङ्गो,
 सिबाग्याम सोना लजी भिसम थे
 म्रिडम्हेमे खजिबाला म्रिड तला?
 तिग्दा भिसम थेनीगदे जम्मासेन
 थे म्रिडम्हेमेदेन छ्याम ब्याह लबा
 मुला।”

३४ जमाहेन्से येशूसे थेनीगदेदा चुहङ्
 भिसी सुङ्जी, “दान्देला म्हिगदेसे
 ब्याह लला, ओच्छे ब्याहएनोन लसी
 पिन्ना। ३५ तर स्वर्गरी निम्याङ्सेला
 म्हिगदे सिबाग्याम सोना लबा धुइरी
 ब्याह लसी आपिन ब्याहएनोन आल।
 ३६ ओच्छे थेनीगदे खाइमै आसि
 तिग्दा भिसम थेनीगदे स्वर्गदूतगदे
 हङ्बान तला। ओच्छे सिबाग्याम
 सोना लबाला सन्तान तबासे लमा
 थेनीगदे परमेश्वरला सन्तान हिन्ना।
 ३७ परमप्रभुसे लुङ्बा भाङ्ग्याम
 मोशादा ‘डा अब्राहामला परमेश्वर,
 इसहाकला परमेश्वर ओच्छे याकूबला
 परमेश्वर हिन्ना’ भिसी सुङ्बा ताम
 मोशासे भिबा मुला। चु तामग्यामसेन
 सिबाग्याम सोना लमुला भिसी उन्बा
 मुला।* ३८ परमेश्वर सिबागदेला
 परमेश्वर आहिन, तर सोबागदेला
 परमेश्वर हिन्ना! थेतबासेलमा
 परमेश्वरला लागिरी जम्मान सोबा
 मुला।”

३९ जमाहेन्से कोइ कोइ यहूदी
 धर्मगुरुगदेसे “गुरु, ह्वाङ्से सुङ्बा
 ताम ठीक हिन्ना” भिसी भिजी।

४० जमाहेन्से खालैसेन येशूदा तिगै ताम इयोइबारी आँट आलनी।

येशू खाल हिन्ना

मत्ती २२:४१-४६; मर्कूस १२:३५-३७

४१ जमाहेन्से येशूसे थेनीगदेदा चुहङ्ग भिसी सुङ्गी, “म्हिगदेसे खाहङ्ग लसी थाबा पिन्बा ख्रीष्टदा दाऊद ग्लेला सन्तान भिसी भिबा? ४२-४३ तिगदा भिसम दाऊद हाडसेन भिबा व्हाइला किताबरी चुहङ्ग भिसी भिबा मुला,

‘परमप्रभुसे डाला प्रभुदा डाइ एला शत्रुगदेदा एला काड धिरी आथान्तेधोना

ए डाला दाहिने यापट्टि चिउ भिसी सुङ्गी।’*

४४ दाऊद ग्लेसेन ख्रीष्टदा प्रभु भिला भिसम खाहङ्ग लसी ख्रीष्ट दाऊद ग्लेला सन्तान तला?”

यहूदी धर्मगुरुगदे म्राङ्सी होशियार ततो:बा

मत्ती २३:१-३६; मर्कूस १२:३८-४०

४५ ओच्छे जम्मान म्हिगदेसे इयान्बान लबा धुइरी येशूसे हाडला चेलागदेदा चुहङ्ग भिसी सुङ्गी, ४६ “एनीगदे यहूदी धर्मगुरुगदे म्राङ्सी होशियार तसी चिउ। तिगदा भिसम थेनीगदे ज्यबा ज्यबा क्वान क्वान्सी कोर्बारी निमुला, ओच्छे बजाररीक्यार निमा म्हिगदेसे मान लगै भिसी सेम

लमुला। थेहङ्ग लसीन यहूदीगदे हुप तबा दिमदेन भोज चबा ग्लारीनोन मुल ठिरी चिबारी सेम लमुला। ४७ थेहङ्ग लसी थेनीगदेसे हेम्बो सिबा म्रिडम्हेमेगदेला दिमनाम ब्यन्मुला ओच्छे म्हिगदेदा उन्बाला लागिरी हेङ्बा हेङ्बा प्रार्थना लमुला। थेहङ्गबा म्हिगदेसे ल्हानान सजाय याङ्गला।”

हेम्बो सिबा म्रिडम्हेमेसे पिन्बा भेटी

मर्कूस १२:४१-४४

२१ येशूसे परमेश्वरला मन्दिररी फ्युक्पो म्हिगदेसे भेटी युबा ताडरी भेटी युबान लबा म्राङ्गी। २ ओच्छे हेम्बो सिबा प्राडबो म्रिडम्हेमेसेनोन डबल न्ही युबा म्राङ्गी। ३ चु म्राङ्सी येशूसे, “च्यागो, डाला ताम इयान्गो। स्थान्दो म्हिगदेसे भन्दा चु हेम्बो सिबा प्राडबो म्रिडम्हेमेसे ल्हानान भेटी युबा मुला। ४ तिगदा भिसम स्थान्दो म्हिगदेसे हाडदेन छ्याम मुबा ल्हानान सम्पत्तिग्याम युजी, तर चु हेम्बो सिबा म्रिडम्हेमे प्राडबो तसीनोन हाडदेन छ्याम मुबा जति जम्मान युजी” भिसी सुङ्गी।

परमेश्वरला मन्दिर नाश तला

मत्ती २४:१-२; मर्कूस १३:१-२

५ तिरेकुनु चेलागदेसे, “ज्यबा ज्यबा युडबादेन म्हिगदेसे फुल्बा

भेटीगदेग्याम जेना लसी स्होबा चु परमेश्वरला मन्दिर गाते जेबा!” भिसी ताम लबान मुबा। तर येशूसे थेनीगदेदा, ^६“तिरेकुनु चुहङ्बा धुइएनोन खाल, थे धुइरी दान्दे म्नाङ्बा चु मन्दिरला युङ्बा गिकनोन बाँकी आचिना जम्मान फुप्ला” भिसी सुङ्जी।

जम्बुलिङ नाश तबा धुइला चिनुगदे

मत्ती २४:३-१४, मार्कस १३:३-१३

^७ओच्छे थेनीगदेसे, “गुरु, चु तामगदे खाइमा तला? चुहङ् तबारी छ्याइजी भिसी खाहङ्बा चिनु म्नाङ्ला?” भिसी ड्योइमा, ^८“येशूसे थेनीगदेदा चुहङ् भिसी सुङ्जी, “एनीगदे होशियार तसी चिउ, खालैसे एनीगदेदा भुक्याब थालगै। तिग्दा भिसम डाला मिन किन्सी ‘डानोन थार्बा पिन्बा ख्रीष्ट हिन्ना’ भिसी ल्हानान म्हिगदे खला। ओच्छे ‘धुइ खसी जिन्बा मुला’ भिसी भिला, तर एनीगदेसे थेनीगदेला ताम थाङ्यान्गो। ^९ओच्छे लडाइ तजी भिबा ताम थे:सी एनीगदे आत्तेब थातउ, तिग्दा भिसम चु जम्बुलिङ नाश तबा भन्दा डाच्छा चु तनोन तो:ला। तर थेनोन धुइरी चु जम्बुलिङ नाश आत।” ^{१०}जमाहेन्से येशूसे थेनीगदेदा दो:सी चुहङ् भिसी सुङ्जी, “म्हि यहुलला बिरोधरी

म्हि यहुलनोन ओच्छे यहुलसाला बिरोधरी यहुल्सा रे:ला। ^{११}ओच्छे घेन घेन सङ्गुल खला, जम्मान ग्लारी अनिकालदेन देसान खला। मुरी घेन घेन लोङ्बा खबा चिनुगदे म्नाङ्ला।

^{१२}“तर चु तबा भन्दा डाच्छा म्हिगदेसे एनीगदेदा चुङ्सी दुख पिन्ना। ओच्छे यहूदीगदे हुप तबा दिमरी जिम्मा लसी एनीगदेदा भयाल्खानरी भाङ्ला। ओच्छे एनीगदेसे डादा विश्वास लबासे लमा ग्लेदेन अञ्चलाधीशगदेला डाच्छापट्टि भोर्ला। ^{१३}थे धुइरी एनीगदेसे डाला बारेरी पाङ्बा मौका याङ्ला। ^{१४}तर एनीगदेसे हाङ्दा जोगब लबारी तिग पाङ्तो:बा भिसी धन्दा सुर्दा थालउ। ^{१५}तिग्दा भिसम थे धुइरी एनीगदेसे तिग ताम पाङ्तो:बा थे ताम पाङ्बारी डाइ एनीगदेदा ज्ञान बुद्धि पिन्ना। जमाहेन्से थेनीगदेसे एनीगदेला ताम थाबारी आखम ओच्छे एनीगदेसे पाङ्बा तामला जोहाबएनोन पिन्बारी आखम।” ^{१६}तर एनीगदेदा हाङलान आबा आमा, ज्योज्यो आले ओच्छे हाङला म्हिगदेदेन ह्योगदेसेनोन चुङ्सी पिन्ना। ओच्छे एनीगदे न्हडला कोइ कोइदा मी म्हिगदेसे साइपुङ्ला। ^{१७}थेहङ् लसीन डादा विश्वास लबासे लमा एनीगदेदा

जम्मान म्हिगदेसे हेला लला। ^{१८}तर एनीगदेला थोबोला क्रा गिक सुतै आताइ। ^{१९}जस्तोन दुख तसैनोन एनीगदेसे सेमहेन्सेन विश्वास लसी चिबासे लमा जुकजुकधोनाला जुनी याङ्ला।

येशूसे यरूशलेम नाश तला भिसी सुङ्बा

मत्ती २४:१५-२१; मर्कस १३:१४-१८

^{२०}“यरूशलेम शहरदा सिपाही-गदेसे घेरब लबा म्राङ्माहेन्से शहर नाश तबा धुइ खसी जिन्जी भिसी एनीगदेसे घोउ। ^{२१}थे धुइरी यहूदिया अञ्चलरी मुबागदे गडरीक्यार यागै, शहर न्हडरी मुबागदेसे शहर ख्लागै ओच्छे नाम्सारी मुबागदे शहररी थाखगै। ^{२२}तिगदा भिसम थे धिन चा परमेश्वरग्याम सजाय याङ्बा धिन हिन्ना। ओच्छे परमेश्वरला बचनरी भिबा जम्मान ताम पूरा तनोन तला।* ^{२३}थे धुइरी जिउ न्हीला म्रिडम्हेमेदेन कोलादा इहे ख्वाबा आमागदेदा भन गाते ल्हानान दुख तला! ओच्छे यहूल्सा नाडनोन ल्हानान दुख तला। चु यहूलला म्हिगदेदा परमेश्वरसे ल्हानान सजाय पिन्ना। ^{२४}थे धुइरी कोइ कोइ म्हिगदेदा तरवारसे ताम्सी साइला, कोइ कोइदा चुङ्सी यहूल्सा यहूल्सारी भोर्ला। ओच्छे अर्गु

यहूलला म्हिगदेला धुइ आजिन्तेधोना थेनीगदेसे यरूशलेमरी रजाई लला।

येशू दोःसी फेप्खबा धुइ

मत्ती २४:२९-३१; मर्कस १३:२४-२७

^{२५}“लनी धिनीदेन सारगदेरी खाइमै आम्राङ्बा चिनुगदे म्राङ्ला। ओच्छे समुन्द्र घुर्बादेन समुन्द्रला छालसे लमा जम्बुलिङला जम्मान म्हिगदे लोङ्सी आत्तेब तला।* ^{२६}जम्बुलिङरी तबारी छ्याइबा दुखला बारेरी था याङ्सी म्हिगदे लोङ्सी सिबा तेबान तला। तिगदा भिसम मुरी मुबा जम्मान शक्ति याङयोङ तला। ^{२७}जमाहेन्से परमेश्वरसे पुइखबा म्हिदा घेन शक्तिदेन य्हाल य्हालरी खसुरी खबान लबा म्राङ्ला।* ^{२८}थेहङ् तमाहेन्से आलोङ्ना एनीगदेसे स्वर्गपट्टि च्यागो, तिगदा भिसम एनीगदेदा योनान थाना लला।”

अञ्जीरला दोङ च्यासी लोप्तोःबा ताम

मत्ती २४:३२-३५; मर्कस १३:२८-३१

^{२६}जमाहेन्से येशूसे थेनीगदेदा उखानग्याम चुहङ् भिसी सुङ्जी, “एनीगदेसे अञ्जीर दोङदेन अर्गु दोङगदे, ^{३०}भुबा म्राङ्माहेन्से दाहेन्से छेप्बा छबा ला खबारी छ्याइजी भिसी था याङ्मुला। ^{३१}थेहङ्

२१:२२ होशे ६:७ २१:२५ यशै १३:१०; इज ३२:७; योए २:३१; उन्बा ६:१२-१३

२१:२७ दानि ७:१३; उन्बा १:७

लसीन डाइ पाङ्बा ताम तबान लबा
म्राङ्माहेन्से एनीगदेसे परमेश्वरला
यहुल्सा खबा धुइ तबारी छ्याइजी
भिसी था याङ्गो।

३२ “च्यागो, एनीगदेसे डाला
ताम इयान्गो, चु जम्मान ताम पूरा
आततेधोना दान्देला म्हिगदे आसि।
३३ मुदेन जम्बुलिङ म्हासी निसैनोन
डाला बचन खाइमै आम्हा।”

येशूसे छोर्सी चिउ भिसी लोप्बा

३४ “तर एनीगदे होशियार तसी
चिउ, आहिन्सम मोजमजा लसी
इय्होइसी भ्रबादेन हाङला ल्हुइला
धन्दा सुर्दासे लमा एनीगदेला
सेम न्होङला। ओच्छे परमेश्वरसे
पुइखबा म्हि खमा एनीगदे तिक्खुरीन
पासोरी परब तबा हङ् तला।
३५ थेहङ् लसीन जम्बुलिङरी चिबा
जम्मान म्हिगदेथोरी थे धिन खला।
३६ थेतबासेलमा एनीगदे ‘थे लोङ्बा
खबा धुइरी जोगब तबारीदेन
परमेश्वरसे पुइखबा म्हिला डाच्छा
राप्बारी खमौ भिसी प्रार्थना लसी
छोर्सी चिउ’ भिसी सुङ्जी।”

३७ थे धुइरी येशूसे धिनीरी म्हिगदेदा
परमेश्वरला मन्दिररी लोप्मुबा, ओच्छे
म्हुन तमाहेन्से जैतून भिबा गङ्गी बास
स्थूहारी फेप्मुबा।* ३८ येशूला बचन
इयान्बाला लागिरी म्हिगदे स्थोरीन
परमेश्वरला मन्दिररी खमुबा।

येशूदा साइबारी सल्लाह लबा

मत्ती २६:१-५, १४-१६;

मर्कुस १४:१-२, १०-११

२२ मिश्र यहुल्साग्याम फेसी
खबा धिनदा ढन्सी खमीर
आयुना गेड चसी धङ्बा चाड खबारी
छ्याइमुबा। २थे धुइरी परमेश्वरला
मन्दिररी पूजा लबा मुल म्हिदेन यहूदी
धर्मगुरुगदेसे येशूदा खाहङ् लसी
साइबा भिसी दाउ च्यासी भ्रमुबा। तर
थेनीगदे म्हिगदेदेन छ्याम लोङ्मुबा।
३थे धुइरी च्युक न्ही चेलागदे न्हङला
यहूदा इस्करियोत भिबा चेलाला सेम
न्हङरी शैतान वाङ्जी। ४जमाहेन्से यहूदा
इस्करियोत परमेश्वरला मन्दिररी पूजा
लबा मुल म्हिदेन मन्दिरला सिपाही-
गदेला हाकिम मुबा ग्लारी निसी येशूदा
चुङ्सी थेनीगदेला यारी जिम्मा लसी
पिन्ना भिसी सल्लाह लजी। ५जमाहेन्से
थेनीगदे ताङ्सी यहूदा इस्करियोतदा
टाङ्गा पिन्ना भिसी कबुल लजी।
६जमाहेन्से यहूदा इस्करियोतसे तला,
भिसी म्हिला हुल आरेबा धुइरी येशूदा
चुङ्सी पिन्बारी दाउ च्यासी भ्रजी।

येशूसे भोज तयार लउ भिसी कुल्बा

मत्ती २६:१७-२५; मर्कुस १४:१२-२१;

यूहन्ना १३:२१-३०

७ मिश्र यहुल्साग्याम फेसी खबा
धिनदा ढन्सी धङ्बा चाड खसी

जिन्बा मुबा। थे चाडकुनु ग्यु बोगो बलि पिन्तो:बा मुबा।^८थे धुइरी येशूसे पत्रुसदेन यूहन्नादा “एनीगदे निसी य्हाडला लागिरी चाडला भोज तयार लउ” भिसी कुल्जी।

^९जमाहेन्से थेनीगदेसे “डन्से भोज खानड तयार लउ” भिसी येशूदा ड्योइमा, ^{१०}येशूसे थेनीगदेदा “एनीगदे शहररी धोमैछ्याम दर्बुडरी क्युड पुइसी निबान लबा म्हि गिकदा स्याप्ला, एनीगदे थे म्हिला लिच्छा लिच्छा निउ। ^{११}ओच्छे थे म्हि जुन दिमरी वाड्ला थे दिमला धनीदा ‘डाइ डाला चेलागदेदेन छ्याम चिसी मिश्र य्हुल्साग्याम फेसी खबा धिनदा ढन्सी धड्बा चाडला भोज चबा कोठा खानड मुला? भिसी डन्ना गुरुसे ड्योइबा मुला’ भिसी भिउ। ^{१२}जमाहेन्से एनीगदेदा थेसे डाच्छान जेना लसी थान्बा तलाथोला घेन कोठा उन्सी पिन्ना। एनीगदेसे थेरीन य्हाडला लागिरी भोज तयार लउ” भिसी कुल्जी।

^{१३}जमाहेन्से थेनीगदे निजी ओच्छे येशूसे सुड्बा हड्बान स्याप्जी। ओच्छे थेनीगदेसे थे मिश्र य्हुल्साग्याम फेसी खबा धिनदा ढन्सी धड्बा चाडला भोज तयार लजी।

प्रभु भोज

मत्ती २६:२६-३०, मार्कस १४:२२-२६,

१ कोर ११:२३-२५

^{१४}चबा धुइ तमाहेन्से येशू ह्हाडला मुल चेलागदेदेन छ्याम सोल

छ्योइबारी धन्छ्याजी। ^{१५}जमाहेन्से येशूसे थेनीगदेदा “डाइ दुख नाबा भन्दा डाच्छा एनीगदेदेन छ्याम चिसी चु चाडला भोज चबा सेम ल्हानान मुबा। ^{१६}थेतबासेलमा एनीगदेसे डाला ताम ड्यान्गो, परमेश्वरला य्हुल्सारी चु भोजला अर्थ पूरा आततेधोना डाइ चु भोज दो:सी आच” भिसी सुड्जी। ^{१७}जमाहेन्से येशूसे खोरे यारी थोसी परमेश्वरदा धन्यवाद पिन्माहेन्से “ना, चु एनीगदे जम्मासेन भो लसी थुड्गो। ^{१८}एनीगदेसे डाला ताम ड्यान्गो, तिग्दा भिसम परमेश्वरला य्हुल्सा आखतेधोना डाइ अडगुरला निडगु आथुड्” भिसी सुड्जी। ^{१९}जमाहेन्से येशूसे यारी गेड थोसी परमेश्वरदा धन्यवाद पिन्माहेन्से गेड क्युइसी चेलागदेदा पिन्बान, “चु एनीगदेला लागिरी पिन्बा डाला ल्हुइ हिन्ना। दाहेन्से डादा ढन्सी चिबाला लागिरी एनीगदेसे चुहड्बान लउ” भिसी सुड्जी। ^{२०}थेहड् लसीन गेड चसी जिन्माहेन्से येशूसे खोरे थोसी चेलागदेदा चुहड् भिसी सुड्जी, “चु खोरेरी मुबा अडगुरला निडगु डाला काग्याम स्होबा छार कबुल हिन्ना। चु डाला का एनीगदेला लागिरी बगब तबा मुला। ^{२१}“तर च्यागो, डादा चुड्सी पिन्बा म्हि डादेन छ्यामनोन चिसी चबान मुला। ^{२२}परमेश्वरसे पुइखबा म्हि मी परमेश्वरसे सुड्बा अन्छार निनोन तो:ला। तर परमेश्वरसे पुइखबा म्हिदा चुड्सी पिन्बा म्हिसे

चा परमेश्वरग्याम सजाय याड्ला।”
 २३चु ताम थे:सी चेलागदे हाड हाड
 न्हडरी चुहड्बा गे लबा म्हि खाल
 मुला तला? भिसी ताम लजी।

खाल घेन खाल जजा

२४जमाहेन्से चेलागदे हाड हाड
 न्हडरी खाल घेन भिसी ताम लबारी
 छ्याइजी। २५चु ताम था याड्सी
 येशूसे थेनीगदेदा चुहड् भिसी सुड्जी,
 “चु जम्बुलिडला ग्लेगदेदेन घेन घेन
 म्हिगदेसे म्हिगदेथोरी शासन लमुला।
 ओच्छे म्हिगदेसे थेनीगदेन डन्दा
 दया लबा ज्यबा म्हि हिन्ना भिसी
 भिमुला। २६तर एनीगदे चा थेहड्
 तबारी आत। ओच्छे एनीगदे न्हडरी
 जुन घेन मुला थे जजा दोगै ओच्छे
 नेता दोबासे चा स्थहान्दोगदेला सेवा
 लगै। २७तिगदा भिसम चबारी चिबा
 मालिकदेन चबा पिन्बा नोकररी
 खजिबा चा घेन हिन्ना? तिग चबारी
 चिबा मालिक घेन आहिन? हिन्ना।
 तर डा एनीगदेला ओन्छाडरी
 चबा पिन्बा नोकर हड्बान मुला।
 २८एनीगदे चा डादा दुख तमा हो
 लबागदे हिन्ना। २९थेतबासेलमा
 डाला आबासे डादा यहुल्सा गिकला
 अधिकार पिन्बा हड् लसी डाइएनोन
 एनीगदेदा थे यहुल्साला अधिकार
 पिन्ना। ३०जमाहेन्से एनीगदेसे डाला
 यहुल्सारी टेबुल गिकरीन चबा थुड्बा
 लला। ओच्छे इस्राएलला च्युक न्ही
 वंशला निसाफ लसी ठिरी चिला।”

पत्रुससे येशूदा खलाला भिसी पाड्बा ताम

मती २६:३१-३५; मार्कस १४:२७-३१;
 यूहन्ना १३:३६-३८

३१जमाहेन्से येशूसे पत्रुसदा
 “सिमोन, सिमोन, शैतानसे एदा ग्वा
 य्हाण्बा हड् लसी य्हाण्बारी छ्याइबा
 मुला। ३२तर एला विश्वास याड्योड
 आतगै भिसी डाइ एला लागिरी
 प्रार्थना लजी। ए दो:सी डादेन छ्याम
 खमाहेन्से एसे आलेगदेदा विश्वासरी
 कोड्ना लउ।

३३जमाहेन्से पत्रुससे येशूदा “प्रभु,
 डा हाडदेन छ्याम भयाल्खानरी
 चितो:सै हाडदेन छ्याम सितो:सै
 सिबारी तयार मुला” भिसी भिजी।

३४तर येशूसे पत्रुसदा “पत्रुस,
 डाला ताम ड्यान्गो, न्हडगर स्थोरी
 नागा क्राबा भन्दा डाच्छा एसे डादा
 डोसेबान आरे भिसी सोमरेमधोना
 पाड्ला” भिसी सुड्जी।

खबारी छ्याइबा दुखला लागिरी होशियार तउ

३५येशूसे थेनीगदेदा “डाइ एनीगदेदा
 टाडगा, भोला, लखम आभोर्ना निउ
 भिसी पुइमुबा। थे धुइरी एनीगदेदा
 तिगै स्हेला खाँचो तजी? भिसी
 ड्योइमा, थेनीगदेसे “आतनी” भिसी
 भिजी।

३६जमाहेन्से येशूसे थेनीगदेदा
 चुहड् भिसी सुड्जी, “तर दाहेन्से

टाङगा मुबासे टाङगा थोगो, भोला मुबासे भोला थोगो, ओच्छे जुन म्हिदेन छ्याम तरवार आरे थेसे हाङला क्वान चूङ्सी भिसै तरवार गिक ग्लुउ। ^{३७}एनीगदेसे डाला ताम ड्यान्गो, तिग्दा भिसम परमेश्वरला बचनरी ‘थेदा अपराधीगदेदा हङ्गोन लला भिसी भिबा ताम डाग्याम पूरा तनोन तोःला’ तिग्दा भिसम डाला बारेरी भिबा ताम पूरा तबान मुला।”* ^{३८}जमाहेन्से येशूदा चेलागदेसे “प्रभु, चुरी तरवार न्ही मुला” भिसी भिमा, येशूसे थेनीगदेदा “तजी” भिसी सुङ्जी।

येशूसे लबा प्रार्थना

मती २६:३६-४६; मर्कुस १४:३२-४२

^{३६}येशू सदला हङ्गोन थे ग्लाग्याम थोन्सी जैतून भिबा गडरी फेप्जी। ओच्छे थेला चेलागदेएनोन लिच्छा लिच्छा निजी। ^{४०}थे ग्लारी धोमाहेन्से येशूसे थेनीगदेदा “एनीगदे फसब आतबाला लागिरी प्रार्थना लसी चिउ” भिसी सुङ्जी। ^{४१}ओच्छे येशू थेनीगदेग्याम जजाकी क्याथाड फेप्सी पुइ जूसी चुहङ्ग भिसी प्रार्थना लबारी छ्याइजी। ^{४२}“आबा, तसम डादा चु दुखग्याम फेसी पिन्गो। तर डाइ म्हन्बा अन्छार आहिन, हाङसे म्हन्बा अन्छार पूरा तगै।” ^{४३}जमाहेन्से स्वर्गग्याम स्वर्गदूत गिक खसी येशूदा

दुख नाखम्बा भङ पिन्जी। ^{४४}थे धुइरी येशूदा ल्हानान दुख तबासे लमा थेसे भन प्रार्थना लजी। थे धुइरी थेला टू काला धारा हङ्ग लसी सरी ताइबान मुबा।

^{४५}प्रार्थना लसी हाङला चेलागदे मुबा ग्लारी फेप्खमा येशूसे थेनीगदे दुखसे लमा लारकलुरूक तसी म्हेर्सी चिबा स्याप्जी। ^{४६}जमाहेन्से येशूसे थेनीगदेदा “तिग्दा एनीगदे म्हेर्सी चिबा? रेःगो, पापरी फसब आतबाला लागिरी एनीगदेसे प्रार्थना लउ” भिसी सुङ्जी।

येशूदा चुङ्बा

मती २६:४७-५६; मर्कुस १४:४३-५०;

यूहन्ना १८:३-११

^{४७}येशूसे चु ताम सुङ्बान लबा धुइरी थेरी म्हिला हुल गिक खजी। थे म्हिला हुलला डाच्छा डाच्छा च्युक न्ही चेलागदे न्हङला यहूदा भिबा चेला खजी। येशूदा च्योक लबाला लागिरी थे येशूला डामरी खजी। ^{४८}तर येशूसे थेदा “यहूदा, तिग एसे परमेश्वरसे पुइखबा म्हिदा च्योक लसी फसब लबारी म्हाइबा?” भिसी सुङ्जी।

^{४९}जमाहेन्से येशूला डामरी मुबा चेलागदेसे थेरी तबारी छ्याइबा ताम था याङ्सी येशूदा “प्रभु, डन्से तरवार चलब लउ?” भिसी, ^{५०}थेनीगदे

न्हडला गिकसे परमेश्वरला मन्दिररी पूजा लबा मुल म्हिला नोकरदा ताम्मा थेला दाहिनेपट्टिला नाब्यड च्वाट्टन थाजी। ५१तर येशूसे “तजी थालउ” भिसी थेला नाब्यडरी थुर्सी खम्ना लजी।

५२जमाहेन्से येशूसे हाडदा चुड्बारी खबा परमेश्वरला मन्दिररी पूजा लबा मुल म्हिगदेदेन मन्दिरला सिपाहीगदेला हाकिमगदेदा ओच्छे यहूदी गन्बागदेदा “एनीगदे य्होदा चुड्बारी खबा हड लसी तिगदा कडीदेन तरवार थोसी खबा? ५३डा धिन धिननोन एनीगदेदेन छ्यामनोन परमेश्वरला मन्दिररी मुबा। थे धुडरी एनीगदेसे डादा आचुड्नी। तर दाहेन्से एनीगदेला गे लबा धुड खबा मुला ओच्छे चु धोपधोपसे शासन लबा धुड हिन्ना” भिसी सुड्जी।

पत्रुससे येशूदा डोसेबा आरे भिसी पाड्बा

मत्ती २६:५७-५८, ६६-७५;

मर्कस १४:५३-५४, ६६-७२;

यूहन्ना १८:१३-१८, २५-२७

५४जमाहेन्से थेनीगदेसे येशूदा चुड्सी परमेश्वरला मन्दिररी पूजा लबा मुल म्हिला दिमरी भोर्जी। पत्रुसएनोन थारेडग्यामसेन येशूला लिच्छा लिच्छा निजी। ५५थेरी म्हिगदे खाडगाला गुडरी मे फुड्सी दूबान मुबा। ओच्छे पत्रुसएनोन थेरी खसी थेनीगदेदेन छ्यामनोन चिजी।

५६थेनोन धुडरी नोकरस्या गिकसे पत्रुसदा मे दूसी चिबा म्राड्सी थेदा “चु म्हिएनोन येशूदेन छ्यामनोन मुबा” भिसी भिमा, ५७पत्रुससे थे नोकरस्यादा “माइ, डाइ थेदा डोसेबा आरे” भिसी भिजी।

५८ओच्छे छिन्नड लिच्छा स्थहान्दो म्हि गिकसे पत्रुसदा म्राड्सी, “एनोन थेनीगदेला ह्यो हिन्ना” भिसी भिमा, पत्रुससे “डा आहिन” भिसी जोहाब पिन्जी।

५९ओस्पन घण्टा गिक लिच्छा स्थहान्दो म्हि गिकसे “चु म्हिएनोन पक्कान येशूदेन छ्यामनोन मुबा, तिगदा भिसम चुएनोन गालीलला हिन्ना” भिसी भिमा, ६०पत्रुससे “एसे तिग भिबा, डादा था आरे” भिसी भिमैछ्याम नागा क्राजी। ६१ओच्छे प्रभुसे पत्रुसदा स्हीजी। जमाहेन्से “न्हडगर स्थहोरी नागा क्राबा भन्दा डाच्छा सोमरेमधोना एसे डादा डोसेबान आरे भिला” भिसी प्रभुसे सुड्बा ताम पत्रुससे ढन्जी। ६२जमाहेन्से पत्रुस मडग्यार निसी घ्वाँ घ्वाँ क्राजी।

येशूदा सिपाहीगदेसे खिसी लसी तोबा

मत्ती २६:५६-६८; मर्कस १४:५५-६५;

यूहन्ना १८:१६-२४

६३जमाहेन्से येशूदा चुड्सी भबा म्हिगदेसे येशूदा खिसी लबान तोजी। ६४ओच्छे येशूला मी घप्सी तोबान,

“लु, अगमवाणी पाङ्गो, एदा खाल्से तोजी?” भिसी भिजी। ६५ ओच्छे थेनीगदेसे येशूदा बड्बान बेइज्जत लजी।

येशूदा यहूदीगदेला सभारी भोर्बा

मत्ती २६:५६-६६; मर्कूस १४:५५-६४;

यूहन्ना १८:१६-२४

६६ यहाल तमैछ्याम येशूदा यहूदी गन्बागदे हुप तबा सभारी भोर्जी। थे सभारी परमेश्वरला मन्दिररी पूजा लबा मुल म्हिगदेदेन यहूदी धर्मगुरुगदे मुबा। ६७ जमाहेन्से थेनीगदेसे येशूदा “ए थार्बा पिन्बा ख्रीष्ट हिन्ना भिसम डन्दा पाङ्गो” भिसी भिमा, येशूसे थेनीगदेदा “डाइ पाङ्सैनोन हाडनीसे विश्वास आल। ६८ ओच्छे डाइ तिगै इयोइसैनोन हाडनीसे जोहाब पिन्बारी आखम। ६९ तर दाहेन्से परमेश्वरसे पुइखबा म्हि शक्तिशाली परमेश्वरला दाहिनेपट्टि चिला” भिसी सुड्जी।

७० जमाहेन्से थेनीगदे जम्मासेन येशूदा “थेहङ् भिसम तिग ए परमेश्वरला भा हिन्ना?” भिसी इयोइमा, येशूसे थेनीगदेदा “हाडनीसे सुड्बा हङ्नोन डा थेनोन हिन्ना” भिसी जोहाब पिन्जी।

७१ येशूसे चुहङ् सुड्माहेन्से थेनीगदेसे “थेलान सुड्ग्याम यहाङसे चु जम्मान ताम थे:सी जिन्माहेन्से दाहेन्से यहाङदा थेला बिरोधरी अर्गु प्रमाण तिग्दा तो:जी” भिसी भिजी।

पिलातससे येशूदा इयोइबा छार्बा लबा

मत्ती २७:१-२, ११-१४; मर्कूस १५:१-५;

यूहन्ना १८:२८-३८

२३ जमाहेन्से यहूदीगदेलान सभाला म्हिगदेसे येशूदा पिलातस भिबा रोमी अञ्चलाधीश मुबा ग्लारी भोर्सी जिम्मा पिन्जी। २ ओच्छे थेनीगदेसे येशूदा दोष लबान, “चुसे हाङसे हाङदान डा थार्बा पिन्बा ख्रीष्ट हिन्ना भिबादेन रोमी ग्याल्बो कैसरदा तिरो फाआतो: भिसी यहाङला यहुल्साला म्हिगदेदा न्होङ्ना लबा डन्से स्याप्जी” भिसी भिजी। ३ थेनीगदेला ताम थे:सी पिलातससे येशूदा “तिग ए यहूदीगदेला ग्ले हिन्ना?” भिसी इयोइमा, येशूसे पिलातसदा “थे मी हाङसेन सुड्बा मुला” भिसी जोहाब पिन्जी।

४ जमाहेन्से पिलातससे परमेश्वरला मन्दिररी पूजा लबा मुल म्हिदेन थेरी मुबा जम्मान म्हिगदेदा “डाइ चु म्हिला तिगै गल्ती आस्याप्नी” भिसी भिमा, ५ थेनीगदेसे क्रिड्बान, “चुसे यहूदिया अञ्चलदेन गालील अञ्चलहेन्से चुधोनाला म्हिगदेदा हाङला ताम लोप्सी न्होङ्ना लबा मुला” भिसी भिजी।

६ जमाहेन्से पिलातससे “चु म्हि गालीलला हिन्ना?” भिसी इयोइजी। ७ येशू हेरोदसे शासन लबा अञ्चलला चीम भिसी था याड्माहेन्से पिलातससे

येशूदा हेरोद मुबा ग्लारी पुइजी।
 थे धुइरी हेरोद यरूशलेमरी मुबा।
 ८ येशूदा म्राड्माहेन्से हेरोद ल्हानान
 ताइजी। तिगदा भिसम थेसे येशूला
 बारेरी थे:बासे लमा ल्हानान धिनहेन्से
 येशूदा च्याबा सेम लमुबा। ओच्छे
 थेसे येशूसे लबा तिगै उदेकला गे
 च्याम्याङ्ला भिसी आश लबा मुबा।
 ९ थेतबासेलमा थेसे येशूदा ल्हानान
 ताम ड्योइजी तर येशूसे तिगै जोहाब
 आपिन्नी। १० ओच्छे परमेश्वरला
 मन्दिररी पूजा लबा मुल म्हिगदेदेन
 यहूदी धर्मगुरुगदे क्रिड्बान येशूदा
 दोष लबारी छ्याइजी। ११ जमाहेन्से
 हेरोददेन थेला सिपाहीगदेसे येशूदा
 खिसी लबान बेइज्जत लजी। ओच्छे
 येशूदा ग्लेसे क्वान्बा हड्बा क्वान
 क्वान्सी पिन्सी पिलातस मुबा ग्लारी
 दो:सी पुइजी। १२ डाच्छा हेरोददेन
 पिलातस आढिकबा मुबा। तर थे
 धिनकुनुहेन्से थेन्नी ढिकजी।

येशूदा सिबाला सजाय पिन्बा

मती २७:१५-२६; मार्कस १५:६-१५;


यूहन्ना १८:३६-१८:१६

१३ जमाहेन्से पिलातससे परमेश्वरला
 मन्दिररी पूजा लबा मुल म्हिगदेदेन
 यहूदी नेतागदेदा ओच्छे म्हिगदेदा
 ड्योइसी, १४ “एनीगदेसे चुसे म्हिगदेदा
 न्होइना लजी भिसी डा मुबा ग्लारी
 भजी, तर डाइ एनीगदेला डाच्छापट्टिन

चुदा ड्योइबा छाबा लमा डाइ
 हाडनीसे लबा दोष तिगै आस्याप्नी।
 १५ हेरोदसे एनोन तिगै दोष आस्याप्बासे
 लमा चुदा यहाड मुबा ग्लारी पुइखजी।
 च्यागो, साइनोन तो:बा खाल्ला गे चा
 चुसे तिगै लबा आरे। १६ थेतबासेलमा
 डाइ चुदा सजाय जे पिन्सी पुइला”
 भिसी भिजी। १७ यहूदीगदे मिश्र
 यहुल्साग्याम फेसी खबा धिनदा ढन्सी
 धड्बा चाडला धुइरी पिलातससे
 भयाल्खानरी मुबा म्हि गिकदा
 पुइतो:मुबा।† १८ तर जम्मान म्हिगदेसे
 “चुदा साइनोन तो:ला, बरु डन्ना
 लागिरी बारब्बादा पुइसी पिन्गो” भिसी
 क्रिड्जी। १९ थे धुइरी जम्मान म्हिसे
 डोसेबा बारब्बा भिबा आज्यबा गे लबा
 म्हि गिक भयाल्खानरी थान्बा मुबा।

२० पिलातससे येशूदा पुइबा सेम
 लसी म्हिगदेदा घोना लबारी म्हाइजी।
 २१ तर थेनीगदे जम्मासेन, “चुदा कुसरी
 टांगब लसी साइगो, कुसरी साइगो!”
 भिसी क्रिड्बाला क्रिड्बान लजी।
 २२ दो:सी एनोन पिलातससे थेनीगदेदा
 “तिगदा? चुसे थेहड्बा आज्यबा गे तिग
 लबा मुला? डाइ मी चुदा साइतो:बा
 दोष तिगै आस्याप्नी। थेतबासेलमा
 डाइ चुदा सजाय पिन्सी पुइला” भिसी
 भिजी। २३ तर थेनीगदे भन क्रिड्सी,
 “कुसरी साइनोन तो:ला” भिसी
 भिजी। चुहड् लसी क्रिड्सी म्हिगदेसे
 ढाजी। २४ जमाहेन्से पिलातससे येशूदा

२३:१७ चु पदला ताम ल्हानान हड्बा ग्रीक बाइबलरी भिबा आरे।



येशूदा क्रुसरी टाँगब लबा (२३:३२)

थेनीगदेसे भिबा हङ्गनोन लपुङ्गी।
 २५ ओच्छे आन्दोलन लसी म्हि
 साइबासे लमा भयाल्खानरी भाङ्बा
 बारब्बादा पिलातससे पुइसी पिन्जी।
 तिगदा भिसम म्हिगदेसे थेदान पुइसी
 पिन्गो भिसी भिमुबा। तर येशूदा चा
 थेनीगदेसे पाङ्बा अन्धार थेनीगदेला
 यारी जिम्मा लसी पिन्जी।

येशूदा क्रुसरी साइबा

मत्ती २७:३२-४४; मर्कुस १५:२१-३२;

यूहन्ना १९:१७-२७

२६ जमाहेन्से थेनीगदेसे येशूदा
 थेग्याम भोर्बान लमा कुरेनी भिबा

गलाला सिमोन खबान मुबा। थेदा
 चुङ्सी येशूला क्रुस पुइपुङ्सी येशूला
 लिच्छा लिच्छा भ्रपुङ्गी। २७ ओच्छे
 म्हिला हुल येशूला लिच्छा लिच्छा
 निजी। थेरी म्रिडम्हेमेगदेएनोन
 क्राबा क्रिङ्बा लबान मुबा। २८ तर
 थेनीगदेपट्टि दोःसी येशूसे चुहङ्ग भिसी
 सुङ्गी, “यरूशलेमला भामेगदे,
 डाला लागिरी थाक्रागो, तर हाडलान
 लागिरी ओच्छे हाडलान कोलागदेला
 लागिरी क्रागो। २९ तिगदा भिसम
 चुहङ्गबा धुइएनोन खबान मुला।
 थे धुइरी म्हिगदेसे कोला आन्हबा
 म्रिडम्हेमेदेन इहे रूवाआतोःबा

मिडम्हेमेगदेदा परमेश्वरग्याम मोलम याङ्बा म्हि हिन्ना भिसी भिला।
 ३० थेनोन धुइरी म्हिगदेसे गडगदेदा डनीथोरी ताइगो ओच्छे डन्दा ल्हुउ भिसी भिला।* ३१ दोड पिङ्गै मुबा धुइरीन चुगदेसे चुहङ् लमुला भिसम दोड खर्माहेन्से भन तिग लला?” भिसी सुङ्जी।

३२ थेनीगदेसे यहो न्हीदाएनोन येशूदेन छ्यामनोन साइबारी भोजी। ३३ जमाहेन्से थेनीगदे खप्पर भिबा गडरी धोखजी। थेरी थेनीगदेसे येशूदा कुसरी टांगब लजी। ओच्छे थे यहो न्हीदाएनोन गिकदा येशूला दाहिनेपट्टि, गिकदा देब्रेपट्टि लसी कुसरी टांगब लजी। ३४ थे धुइरी येशूसे “आबा, चुगदेदा माफ लउ। तिगदा भिसम चुगदेसे तिग लबान मुला थे चुगदेदा था आरे” भिसी सुङ्जी। ओच्छे सिपाहीगदेसे चिट्ठा युसी येशूला क्वान हाड हाड न्हडरी भो लजी।*

३५ थेरी राप्सी च्यासी चिबा म्हिगदेदेन यहूदी नेतागदेसे येशूदा खिसी लबान, “चुसे स्थहान्दो म्हिदा मी जोगब लजी। चु परमेश्वरसे धम्बा थार्बा पिन्बा ख्रीष्ट हिन्सम हाडसे हाडदान जोगब लगै” भिसी भिजी।*

३६ ओच्छे सिपाहीगदेसे एनोन येशूदा अङ्गुरला कम्बा निङ्गु पिन्सी खिसी लबान,* ३७ “ए यहूदीगदेला ग्ले

हिन्सम हाडसे हाडदान जोगब लउ” भिसी भिजी।

३८ ओच्छे येशूदा “यहूदीगदेला ग्ले” भिसी दोष उन्बा ताम भिसी येशूला थोबोथोरी थान्जी।

३९ येशूदेन छ्यामनोन कुसरी टांगब लबा यहो न्ही न्हडला गिकसे येशूदा खिसी लबान, “ए थार्बा पिन्बा ख्रीष्ट आहिन? लु, एसे हाडदा जोगब लउ, ओच्छे डन्दाएनोन जोगब लउ” भिसी भिजी। ४० तर स्थहान्दो यहोसे थेदा बङ्बान चुहङ् भिसी सुङ्जी, “एदा परमेश्वर माङ्सी लोङ्बा आखमुला? थेसे याङ्बा सजाय एसे याङ्बा आरे? ४१ यहाडसे मी आज्यबा गे लबासे लमा ठीक सजाय नाबान मुला, तर चुसे मी थेहङ्बा तिगै आज्यबा गे लबा आरे।”

४२ जमाहेन्से थेसे येशूदा “येशू, हाडला यहुल्सारी फेण्बा धुइरी डादाएनोन ढन्गो” भिसी भिजी।

४३ ओच्छे येशूसे थेदा “एसे डाला ताम ड्यान्गो, तिनीन ए डादेन छ्याम स्वर्गरी तला” भिसी सुङ्जी।

येशू सिबा

मत्ती २७:४५-५६; मार्कस १५:३३-४१;

यूहन्ना १९:२८-३०

४४ ओस्पन धिनना बाह बजेहेन्से तीन बजेधोना यहुल्सा नाङ्गोन

धोपधोप तजी। ४५थे धुइरी धिनीला
व्हाल म्हाजी, ओच्छे परमेश्वरला
मन्दिर न्हडला पर्दा परुले न्ही तसी
ढेजी।* ४६जमाहेन्से येशूसे क्रिड्बान,
“आबा, डाला आत्मा किन्गो” भिसी
सुड्माहेन्से येशूला सा निजी।*

४७चु म्राड्सी रोमी कप्तानसे
परमेश्वरदा जयजयकार लबान, “चु
म्हि पक्कान परमेश्वरला डाच्छा
ज्यबा म्हि चीम” भिसी भिजी।

४८चु म्राड्सी थेरी च्याबारी खबा
जम्मान म्हिगदेदा ल्हानान दुख तसी
क्राबा क्रिड्बा लबान दिमरी निजी।
४९ओच्छे येशूदा डोसेबा म्हिगदेदेन
गालीलग्याम येशूदेन छ्याम छ्याम
खबा म्रिड्महेमेगदे थारेड्ग्यामसेन चु
ताम च्यासी चिबा मुबा।*

येशूदा धुर्सारी थान्बा

मती २७:५७-६१; मर्कस १५:४२-४७;

यूहन्ना १९:३८-४२

५०योसेफ भिबा म्हि ज्यबादेन
परमेश्वरसे कुल्बा ताम ड्यान्बा
म्हि मुबा। थे यहूदी सभाला सदस्य
मुबा। ५१थेसे स्थान्दोगदेसे येशूदा
साड्बारी सल्लाह लबा धुइरी बिरोध
लमुबा। तिगदा भिसम थेसे परमेश्वरसे
शासन लबा धुइ खला भिसी भ्रान्सी
चिबा मुबा। थे यहूदिया अञ्चलला
अरिमाथिया भिबा नाम्साला म्हि मुबा।

५२थे पिलातस मुबा ग्लारी निसी येशूला
लास ह्नीजी। ५३ओच्छे थेसे येशूला
लास क्रुसग्याम तेःसी मलमलला
क्वानसे रिल्जी। जमाहेन्से युड्बाला
पहरारी ठ्वाइसी स्होबा धुर्सारी
थान्जी, थे धुर्सारी चु भन्दा डाच्छा
खालैला लास थान्बा आरेबा। ५४थे
धिन ब्लप्बा न्हबा धिनना डाच्छाकुनु
मुबा। थेतबासेलमा ब्लप्बा न्हबा धिन
खबारी छ्याइमुबा। ५५गालीलग्याम
येशूदेन छ्याम खबा म्रिड्महेमेगदेएनोन
योसेफदेन छ्यामनोन निजी ओच्छे
येशूला लास धुर्सारी थान्बा च्याजी।
५६जमाहेन्से थेनीगदे दिमरी निसी
येशूला लासरी फोर्बाला लागिरी ज्यबा
खाल्ला छ्युगुदेन अत्तर तयार लजी।
तर न्हडगरदड चा यहूदीगदेला ठिम
अन्छार ब्लप्बा न्हबा धिन धड्जी।*

येशू सिबाग्याम सोबा

मती २८:१-१०; मर्कस १६:१-८;

यूहन्ना २०:१-१०

२४ जमाहेन्से थे म्रिड्महेमेगदे
आइतवारकुनु स्थोरीन
हाडसे तयार लबा ज्यबा खाल्ला
छ्युगुदेन अत्तर भोर्सी येशूदा थान्बा
धुर्सारी निजी। २थेनीगदे थेरी धोमा
धुर्साला म्रापरी थान्बा युड्बा ब्लिड्सी
थान्बा म्राड्जी। ३तर थेनीगदे धुर्सा
न्हडरी वाड्सी च्यामा थेरी येशूला



धुर्साला प्राप ठोड्बा (२४:२)

लास आम्राङ्नी। ४थेरी थेनीगदे अलमल तसी चिबा धुइरी भक्भक्बा क्वान क्वान्बा म्हि न्ही थेनीगदेला डामरीन राज्जी। ५थे म्हि न्हीदा म्राङ्सी म्रिडम्हेमेगदे लोङ्सी सरी रल्लुप तजी। जमाहेन्से थे म्हि न्हीसे थेनीगदेदा चुहङ् भिसी भिजी, “एनीगदेसे सोबा म्हिदा तिग्दा सिबागदे थान्बा धुर्सारी म्हाइबा? ६थेशू चुरी आरे। थेदा सिबाग्याम सोना लसी जिन्बा मुला! येशू गालीलरी मुबा धुइरी एनीगदेदा तिग भिसी सुङ्बा मुबा थे ताम एनीगदेसे ढन्गो। ७परमेश्वरसे पुड्खबा

म्हिदा पापीगदेला यारी जिम्मा लला, ओच्छे कुसरी टाँगब लला तसैनोन डादा सोमरेमाकुनु सिबाग्याम सोना लला।” ८जमाहेन्से येशूसे सुङ्बा ताम थेनीगदेसे ढन्जी।

९जमाहेन्से थे म्रिडम्हेमेगदे धुर्सा-ग्याम दोःसी निसी ह्वाडसे म्राङ्बा जम्मान ताम च्युक गिक चेलागदेदेन स्थहान्दो जम्मान म्हिगदेदा पाङ्जी। १०थे म्रिडम्हेमेगदे चा मरियम मगदलिनी, याकूबला आमा मरियमदेन योअन्ना मुबा। ओच्छे थेनीगदेदेन छ्याम स्थहान्दो म्रिडम्हेमेगदेएनोन

मुबा। थेनीगदेसेन मुल चेलागदेदा हाडसे म्राड्बा जम्मान ताम पाङ्मुबा।
 ११तर चेलागदेसे “एनीगदेसे तिग आतोःबा ताम लबा?” भिसी पत्याब आतनी। १२तर पत्रुस चा डोड रेःसी धुर्सापट्टि यार्बान निजी। थेरी धोसी धुर्साला म्रापग्याम योइ तसी च्यामा येशूदा बेरब लबा क्वान जे म्राङ्जी। चुहङ् तबा म्राङ्सी थे उदेक म्हन्बान दिमपट्टि निजी।

इम्माउस नाम्सारी निबा ग्यामरी येशूदा स्याप्बा

मर्कुस १६:१२-१३

१३थेनोन धिनकुनु येशूला चेलागदे न्हडला चेला न्ही यरूशलेमग्याम ओस्पन कोस सोमसे गडसल थारेडला इम्माउस भिबा नाम्सारीक्यार निबान मुबा। १४थेनीगदेसे यरूशलेमरी तबा तामला बारेरी हाड हाड न्हडरी ताम लबान मुबा। १५चुहङ् लसी ताम लसी भ्रबान लबा धुइरी येशूएनोन थेनीगदेदेन छ्यामनोन फेप्जी। १६तसैनोन थेनीगदेसे येशूदा डोआसेनी। तिगदा भिसम परमेश्वरसे थेनीगदेदा डोसेना आलनी।

१७जमाहेन्से येशूसे थेनीगदेदा “एनीगदेसे तिग ताम लसी भ्रबा?” भिसी इयोइमा, थेनीगदेला ली धोपधोप लसी थेन तजी।

१८थे न्ही न्हडला क्लेओपास भिबासे येशूदा “यरूशलेमरी कोर्सी खबा म्हि तसीनोन थेरी तिनी न्हडगर

तिग तबा मुला थे ताम था आयाङ्बा चा हाड जे चीम” भिसी पाङ्मा, १९येशूसेएनोन थेनीगदेदा “तिग ताम?” भिसी इयोइजी।

जमाहेन्से थेनीगदेसे “नासरतला येशूला बारेरी तबा ताम हाडदा था आरे? थे म्हि अगमवक्ता हिन्ना। थेसे लबा गेदेन लोप्बा ताम परमेश्वरदेन म्हिला ओन्छाडरी शक्तिशाली मुबा। २०तर थेदा परमेश्वरला मन्दिररी पूजा लबा मुल म्हिदेन यहूदी नेतागदेसे चुदा साइगो भिसी कुसरी टांगब लपुङ्जी। २१यहाड इस्राएलीगदेदा येशूसेन पापग्याम फेला भिसी डन्से आश लमुबा। तर येशूदा साइबाएनोन तिनी सोमरे तजी। २२-२३चुदे जे आहिन, तिनी स्थोरीन डन्ना कोइ कोइ नाना आडागदे येशूदा थान्बा धुर्सारी निमा, थेनीगदेसे येशूला लास आस्याप्नी। थेरी थेनीगदेसे स्वर्गदूतगदेदा म्राङ्जी। थे स्वर्गदूतगदेसे “येशू सोसी जिन्बा मुला” भिसी थेनीगदेदा पाङ्बा ताम डन्दाएनोन पाङ्सी उदेक तना लजी। २४चु ताम थेःसी डन्ना कोइ कोइ होगदे येशूदा थान्बा धुर्सारी च्याबारी निजी। थेनीगदेसेएनोन थे म्रिडम्हेमेगदेसे पाङ्बा हङ्नोन स्याप्जी, तर येशूदा भिसम आम्राङ्नीम।”

२५जमाहेन्से येशूसे थेनीगदेदा चुहङ् भिसी सुङ्जी, “ताम आघोबा म्हि, अगमवक्तागदेसे पाङ्बा ताम विश्वास लबारी एनीगदेदा खाहङ्बा गाहो तबा? २६तिग थार्बा पिन्बा

ख्रीष्ट हाडला शक्तिदेन यहालरी फेप्खबा भन्दा डाच्छा चु दुख नातो:बा आरेबा?” २७ओच्छे येशूसे हाडला बारेरी मोशाहेन्से जम्मान अगमवक्तागदेसे परमेश्वरला बचनरी भिबा ताम थेनीगदेदा घोना लजी।

२८ थेनीगदे इम्माउस नाम्साला डामरी धोखमाहेन्से येशू अफ थेग्याम क्यारनोन फेप्बारी छ्याइजी। २९तर थे चेला न्हीसे येशूदा “म्हुन तबारी छ्याइजी, थेतबासेलमा तिनी हाड डन्देन छ्यामनोन धन्छ्यागो” भिसी भिमाहेन्से येशू थेनीगदेदेन छ्याम धन्छ्याबाला लागिरी दिम न्हडरी फेप्जी। ३०येशू थेनीगदेदेन छ्याम सोल छ्योइबारी धन्छ्याजी। जमाहेन्से येशूसे गेड छ्यारी थोसी धन्यवाद पिन्सी गेड क्युइसी थेनीगदेदा पिन्जी। ३१जमाहेन्से थेनीगदेसे येशूदा डोसेजी। तर थेनोन धुइरी थेनीगदेसे येशूदा थेरी आम्राइनी। ३२ओच्छे थेनीगदेसे “येशू यहाडदेन छ्याम ग्यामरी ताम लबान परमेश्वरला बचन घोना लबा धुइरी यहाडला सेम गाते ताड्बा मुबा” भिसी हाड हाड न्हडरी ताम लजी।

३३जमाहेन्से तुरुन्तन थेनीगदे यरूशलेमपट्टि निजी। थेरी धोमा थेनीगदेसे च्युक गिक चेलागदेदेन छ्याम पोप तसी चिबा म्हिगदेसे, ३४“प्रभु सिबाग्याम सोबादेन सिमोन मुबा ग्लारी फेप्बा ताम चा पक्कान हिन्ना चीम” भिसी ताम लसी चिबा स्याप्जी। ३५जमाहेन्से थेन्नीसेएनोन

ग्यामरी तबा तामदेन प्रभुसे गेड क्युइबा धुइरी थेन्नीसे प्रभुदा डोसेजी भिबा ताम थेरी मुबागदेदा पाड्जी।

येशू चेलागदे मुबा ग्लारी फेप्खबा

मत्ती २८:१६-२०; मर्कूस १६:१४-१८;

यूहन्ना २०:१६-२३; मुल चेला १:४-८

३६ थेनीगदेसे चु ताम लबान लबा धुइरी येशू थेनीगदेला डाच्छा राप्जी, ओच्छे “एनीगदेदा शान्ति तगै” भिसी सुड्जी।

३७तर येशूदा म्राड्सी, “चु म्हड कि तिग” भिसी थेनीगदे लोड्सी आत्यब तजी।

३८जमाहेन्से येशूसे थेनीगदेदा “एनीगदे तिग्दा सेमरी शङ्का लसी लोड्बा? ३९एनीगदेसे डाला यादेन काडरी थुर्सी च्यागो, डानोन हिन्ना। तिग्दा भिसम म्हडला स्यादेन नखु आत, तर डाला मी मुला” भिसी सुड्जी।

४०चुहड् सुड्माहेन्से येशूसे थेनीगदेदा हाडला छ्यादेन स्थहाप उन्जी। ४१जमाहेन्से थेनीगदे ताड्सी उदेक तसी अफ येशूला ताम विश्वास आलनी। जमाहेन्से येशूसे थेनीगदेदा “एनीगदेदेन छ्याम तिगै चबा स्हे मुला?” भिसी इयोइमा, ४२थेनीगदेसे दुम्बु गिक तार्डाला स्या येशूदा पिन्जी। ४३थे तार्डाला स्या तासी येशूसे थेनीगदेलेन डाच्छापट्टि छ्योइजी।

४४जमाहेन्से येशूसे थेनीगदेदा “डाला बारेरी परमेश्वरसे मोशादा

पिन्बा ठिमरी, अगमवक्तागदेसे भिबा किताबगदेदेन व्हाइला किताबरी भिबा जम्मान ताम पूरा तबा मुला। चु ताम एनीगदेदेन छ्याम मुबा धुइरीन डाइ एनीगदेदा पाड्बा मुबा” भिसी सुड्जी।

४५ जमाहेन्से येशूसे थेनीगदेदा परमेश्वरला बचन घोखम्बा ज्ञान पिन्जी। ४६ ओच्छे येशूसे थेनीगदेदा चुहड् भिसी सुड्जी, “थार्बा पिन्बा ख्रीष्टसे दुख नातोःला ओच्छे सोमरेमाकुनु थे सिबाग्याम सोला, ४७ थेला मिनरी ह्वाड ह्वाडला पाप ख्लासी परमेश्वरपट्टि दोःजी भिसम पापला दोष मेटब तला। चु ताम यरूशलेमहेन्से जम्मान यहुलला म्हिगदेदा थेःना लतोःला भिसी परमेश्वरला बचनरी भिबा मुला। ४८ तिग्दा भिसम चु जम्मान ताम

म्राड्बा एनीगदेन हिन्ना। ४९ च्यागो, डाला आबासे पिन्ना भिसी कबुल लबा शक्ति डाइ एनीगदे मुबा ग्लारी पुइखला। थेतबासेलमा तोरग्याम शक्ति आयाड्तेधोना एनीगदे चु शहररीन चिउ।”

येशू स्वर्गरी फेप्बा

मर्कूस १६:१६-२०; मुल चेला १:६-११

५० जमाहेन्से येशूसे थेनीगदेदा बेथानियाधोना भोर्जी, ओच्छे ह्वाडला या थीसी थेनीगदेदा मोलम पिन्जी। ५१ चुहड् लसी मोलम पिन्माहेन्से येशूदा थेनीगदेग्याम फेसी स्वर्गरी भोर्जी। ५२ येशूदा फ्या लमाहेन्से थेनीगदे ताड्सी यरूशलेमरी दोःसी निजी। ५३ ओच्छे थेनीगदेसे परमेश्वरला जयजयकार लबान सदन परमेश्वरला मन्दिररी चिजी।